



Buyuk o'zbek shoiri. O'zbekiston Qahramoni va O'zbekiston xalq shoiri. Shoir o'z hayot yo'lini shunday tasvirlaydi: Mening tug'ililib o'sgan, bolaligim o'tgan joylar Qarshi (qadimgi Nasaf) shahridan besh-o'n chaqirim shimolroq tomondagi Qo'ng'irtov etaklaridir: Bobolarimizning aytishicha, qaysi bir zamonlarda Navoiy bobomiz Samarqanddan Buxoroga ana shu Qo'ng'irtovni oshib o'tgan emishlar. Albatta, bu gaplar xalqning xotirasida o'qtin-o'qtin chaqnab turadigan xayol uchqunlari bo'lishi mumkin.

O'sha Qo'ng'irtovda bizning bolalik yillarimiz o'tgan. Bahor kelganda havoni o't-o'lanning yoqimli xushbo'y hidi qoplar, sharros yomg'ir quyganda biz tog' cho'qqisi unguridagi kichik-kichik g'orlarga bekinib olardik. O'sha yuksaklikdan shimol tarafdagi yam-yashil bepoyon kengliklarni tomosha qilar edim, to'yib-to'yib nafas olar edim. Ayniqsa, bu joylarda janub kechalari, yulduzli osmon nihoyatda go'zal bo'lar edi. Tim qora osmonda qo'l cho'zsang yetgudek ulkan-ulkan novvotrang yulduzlar charaqlab turadi. Hayotimda bunday go'zal manzaralarni keyin uchrata olmadim.

Biz oilada to'rt o'g'il, to'rt qiz o'sganmiz. Akalarim Buxoro, Toshkent oliy o'quv yurtlarida til-adabiyot fakultetlarida o'qishardi. Tabiiyki, ular ko'tarib yurgan kitoblarning aksariyati badiiy adabiyot namunalari edi. Mening allaqachon savodim chiqqan, kitoblarni sharillatib o'qiy olardim. Men bugungi kunda g'oyatda ajablanib shularni eslayman. Negadir bolaligimda hotiram nihoyatda kuchli edi. Bir o'qiganim esimda qolaverar edi. Radio, televidenie yoxud boshqa tomoshalar bolmaganidan keyin ermagim kitob edi-da. Duch kelgan narsalarni o'qib, duch kelgan narsani yodlab olardim. Bu kitoblar orasida halq dostonlari ham, Navoiy bobomizu Pushkindan tarjimalar ham, G'afur G'ulom, Hamid Olimjon she'riyati va yana boshqa ko'p ro'monu qissalar bo'lardi. Darvoqe, qish kunlarida to'ylarga qo'shni tumanlardan nomdor baxshilar kelib, tong otguncha doston aytishardi. Biz bolalar baxshini tinglay-tinglay bir-birimizga biqinishib uxlab ham qolar edik. Yanglishmasam, o'shanda Umur shoir degan baxshining dostonlarini ko'p eshitganman.

Endi birinchi she'rlar yoza boshlaganimga nima turtki bo'lganini aniq bilmayman. Har holda so'zlarni qofiyalashga ishqiboz bo'lib qolganim esimda. Balki zerikkanimdan, balki zavqim toshib, nimanidir yozgim kelaverardi. Fikr esa yo'q. Yozmaslikning ham iloji yo'q. Shuning uchun ona, ota, maktab, brigadir Nodir kabi gaplarni o'zimcha she'rga solib aylantirib yurardim.

Maktabni oltin medal bilan bitirdim va 1958 yil Toshkent Davlat universiteti filologiya fakultetining jurnalistika bo'limiga kelib qoldim.

Universitetda adabiy jarayon g'oyatda qizg'in edi. Adabiyotimizda iz qoldirgan va qoldirayotgan ko'pdan-ko'p ijodkorlar o'sha yillari dorilfununning turli kurslarida tahsil olishardi: Fakultetimizda adabiyot to'garagi muttasil faoliyat ko'rsatardi. Ozod Sharafiddinov, Matyoqub Qo'shjonov kabi ustozlarimiz biz bilan soatlab mashg'ulot olib borardilar.

She'rlarim matbuotda tez-tez bosila boshladi. Ozod akaning 'Oq yoli' bilan 'Sharq yulduzi'da she'rlarim chiqdi. Yozuvchilar uyushmasidagi mushoiralardan birida 'Munojatni tinglab', 'Burgut' degan she'rlarimni o'qidim, o'sha kuni Abdulla Qahhor nazariga tushdim. Mirtemir domla atrofida ko'p shogirdlari qatori saboq oldim. Shayxzodadek donishmand ustozga ergashib, u kishi she'r o'qigan minbardan men ham she'r o'qidim. Esimda, Eski shahardagi hozirgi 'Turon' kutubxonasida o'qigan she'rlarimni tinglovchilar juda iliq kutib oldilar. Uchrashuvdan qaytayotganimizda Shayxzoda domla bilagimdan tutib, 'Shoir, sizga bitta gapim bor. Ehtiyot bo'lgaysiz, ishqilib qarsaklardan taltayib ketmasangiz bo'lgani', degan. Bu gaplar ham mening qulog'imga qo'rg'oshinday quyilib qoldi.

Bu orada kitoblarim ketma-ket nashr qilindi. Ustoz G'afur G'ulom qatnashgan davralarda she'rlarini o'z og'izlaridan necha-necha bora eshitdim. Bir safar G'afur aka yelkamga qoqib, 'Kecha televizorda she'r o'qigan bola senmisan. Yozaver, o'g'lim' deganlarini hech qachon unutmayman. Va nihoyat, bir kuni meni Oybek domla yo'qlayotganini aytib qolishdi. Bu ulug' zot bemorroq bo'lganlari sababdanmi yoki salobatlari g'oyat buyukligidanmi, xonadonlariga har qanday qalamkash yurak yutib borolmas, bahaybat cho'qqiga boqqanday domlani uzoqroqdan tomosha qilib yurardik. Oybek domla bilan uchrashuvlarimni hamda kechirgan hayajonimlarimni qog'ozga tushirsam bir risola bo'lar. Domlaga 'Armaniston' degan sherimni o'qib berganimda 'ingichka, ingichka', deb qoyganlarini eslayman. Bu hitob sheringizda nozik qochirimlar bor degani bo'lsa kerak, deb o'ylayman. Oybek domla keyingi safar chorlanganlarida qo'limga O'zbekiston Yozuvchilar uyushmasiga a'zolikka tavsiya qog'ozini tutqazdilar. Ikkinchi tavsiya Mirtemir domladan keldi. Shu yosinda uyishmaga Komil Yashin rayisliklarida a'zo bo'lib kirdim.

So'ng turli matbuot idoralarida xizmat qildim, katta-kichik mukofotlarga, xalq shoiri unvoniga sazovor bo'ldim. Mustaqillik yillarimizning buyuk in'omi O'zbekiston Qahramoni unvoniga ham loyiq topishdi. Mustaqil O'zbekistonning birinchi Davlat madhiyasi matnini yozishga musharraf bo'ldim. Asosiy ish faoliyatim ijod va ijodiy sohaga tegishli xizmatlar bilan o'tayotir.' (*"Ko'rgan bilganlarim". 2000-yil 23-yanvar.*)

.....

## **O'ZBEK PAXTASI**

Dunyoda qutlovlar bor  
Biri biridan go'zal,  
Dunyoda tabriklar bor  
Biri biridan ezgu.  
Va lekin bu olamda  
Topilmas hech bir mahal

Ona-yurt qutlovidan  
Balandroq biror tuyg'u.

Shu mo''jaz hayotimni  
El-yurtga bog'labman to,  
Bir ketmonchi o'g'liday  
Unga eshman, tirikman.  
Kahrabo tizimchani  
Donasi kabi go'yo  
Mustahkam shu qatorning  
Taqdiriga sherikman.

Tong bilan jahon bo'ylab  
Bir xabar qoqdi qanot,  
O'zbek yana o'z so'zin  
Ustuvor do'ndiripti.  
Betimsol taloto'pda  
Muzaffaru bosabot,  
O'zbek yana do'ppisin  
Qiyalab qo'ndiripti.

Million yillik so'z erur  
Paxta bizning lug'atda,  
Jo'yaklarda boshlangan  
Onalar to'lg'oq dardi.  
Mabodo o'simlikka  
Zabon bitsa, albatta,  
Paxta navi eng avval  
O'zbekcha gapirardi.

Odati nurin sochar  
Olamga har kun quyosh,  
Bag'rida ne sirlar bor,  
Sig'maydi tasavvurga!  
Shu bir chanoq paxta ham  
Zohirdan ma'sum, yuvosh  
Va lekin zahmatlari  
Sig'mas onnga, shuurga.

Dunyoda insonlar bor,  
Mayda bir armon sabab,  
Bir-birin yoqavayron,  
Tuproqqa qorishadi...  
Olamning egnin butlash .  
O'zbekka shudir matlab,  
Shu armon, deb cho'ng xalqim  
Bir umr olishadi.

Bizning uygan xirmonga  
Chambar qilsang chechakdan,  
Yulduzlar shabnam misol  
Bo'ladi unga inju.  
Bolasi uyda qolgan  
Mushtipar kelinchakdan  
Xizrsifat cholgacha .  
Barchaning mehnati bu!

Xalqim, sensan ellarga  
To'kin dasturxon tuzgan,  
Ne'mating o'zingga ham  
Barqaror bo'lsin, deyman.  
Uygan bu xirmoning ham  
Quyoshga qo'lin cho'zgan  
Muhtasham haykalingga  
Poydevor bo'lsin, deyman!  
1981

## UY

Ijroqo'm uy bermish,  
Ko'zlaringda yosh...  
Shunchalar ko'pmida dilingda darding.  
Yetar, ta'zim bilan egaverma bosh,  
Yetar, yuragimni ezib yubording.

Seniki atalar shu yer, shu zamin,  
Yo uni nazarga ilmaganmiding?  
Senga ham taqdirning xatlab berganin  
Shuncha yil o'tibdi, bilmaganmiding.

Ijroqo'm uy bermish,  
Bag'oyat savob,  
Lekin ko'rmay seni mute shaklida.  
Haqiqatning tagin izlasang shu tob  
Mutlaq senikidir uylar aslida.  
1981

\* \* \*

Baxtiyor har dilga oshno topilgay,  
G'ussali yurakka lekin yo'q hamdam.  
Do'stlar eshigi ham taq-taq yopilgay  
G'ussali qalb u yon gar qo'ysa qadam.  
Horg'in bir yo'lchingman, darvozungni och,  
Boshlab keldi dema kulfat, qayg'uni.  
Nogoh ko'zlarimda ko'rsang qatra yosh

Sog'inch yoshlari deb qabul et uni.  
1981

## **BOLALAR SHOIRLARIGA HAZIL**

Soat bo'ldi to'rt yarim, .  
Dedi Dilbarga Karim.  
Buni eshitdi G'ulom,  
Salim bilan Dilorom,  
Shoira-yu, Gulnoza,  
Xadicha bilan Roza.  
Alisher-u Baxtiyor,  
Xurshid, Vitya, Ixtiyor,  
Azim, Moyli, Dadashvoy,  
Shukur, Ahmad, Adashvoy,  
Mavluda-yu, Ilhomjon,  
G'ayrat, Sa'di, In'omjon,  
Toshpo'lat, Yulduz, Zohir,  
Zarifa, Mahkam, Omon,  
Miraziz, Safar, Rahmon,  
Shavkat, Yo'ldosh, Uzoqboy,  
Bolta, Tesha, Tuzoqboy,  
Eshmirza, Eldor, Jur'at,  
Muqimiy bilan Furqat...  
Endi soat besh yarim, .  
Dedi Dilbarga Karim.  
1981

## **YOZG'UVCHILIKKA ARIZA** *(Bir g'alamis tilidan)*

Meni nazariga ilmaydi birov,  
Sizga shu gaplarni aytayin tikka.  
Kecha bir davrada o'ynadim garov,  
Meni qabul qiling, yozg'uvchilikka.

Har xil soyuzlar bor.  
Masalan, kino,  
Demangiz men o'zni unga uraman.  
Sabil texnikasi qiyinmish, ammo  
Tomosha qilishni yaxshi ko'raman.

Rassom bo'lishlikka toqatim hech yo'q,  
Chunki zaril bunda g'alat iste'dod.  
Masalan, xo'tikka o'xshasin xo'tik,  
Sharmanda qiladi bundaqa ijod.

Bastakorlarda ham bor emish soyuz,  
Bu ham to'g'ri kelmas, rostini aytsam.

Vijdonim yo'l bermas, chidamaydi yuz,.  
Qo'shiq aytmaganman umrimda hech ham.

Shoirlik-chi, tegsin xudo urganga,  
Sotib olayinmi tekin kulguni.  
Dab-durust jumlar qator turganda,  
Teskari aytmoqlik shartmikan uni.

Yozg'uvchilik esa, oh, bu g'aroyib,  
Mening talantimga shu soha nuqta.  
Pastu balandlarga turfa, ajoyib  
Maktublar bitganman g'oyaviy puxta.

Xullas, o'rtoq rais, aylangiz imdod,  
Men sizga haq gapni aytaman tikka.  
Ko'pirib yotibdi menda iste'dod,  
Meni qabul qiling yozg'uvchilikka.  
1981

### **ZO'R ARMON** *(Bir noshudning deganlari)*

Hamma har narsaga erur ishqiboz,  
Kimdir marka yig'ar, kimdir it boqar.  
Kimlarga qish yaxshi, kimlargadir yoz,  
Menga esa faqat qarsaklar yoqar.

Osonmi, dunyoda yashadim qancha!  
Ochib, pusib yurdim zamonlar o'tib.  
Mana, savlatim bor, yoshim ham ancha,  
Va lekin o'rtandim qarsakni kutib.

Ajabo, xalq buncha bo'lmasa o'jar,  
Bunchalar xasis u oddiy qarsakka.  
Nechun boshqalarni shon-shuhrat quchar,  
Bu holdan fig'onim chiqar falakka.

Ey, siz, studentlar, insof bormi hech,  
Bunchalar shakkoksiz, bunchalar nodon?!  
Siz qarsak chalyapsiz kimga erta-kech,  
Men-chi, qolaverdim bir chetda nolon.

Garchand, ba'zi joyda topdim e'tibor,  
Ko'ksimda nelardir taratur ziyo.  
Dashnom eshitdim-u umrimda ko'p bor,  
Qarsak tinglamadim nechundir aslo.

Dunyoning ishlari chindan notugal,  
Siz uning xatosin bir bor tuzating,

Do'stlar, o'lgan chog'im, rahm eting bir gal,  
Meni qarsak chalib go'rga uzating.  
1981

\* \* \*

Muallaq gaplarni so'ylama menga,  
Endi men yer uzra topganman qo'nim.  
Inson deb falakka hayqirmoq nega,  
Inson yoningda-ku, u mening qo'shnim.

Iqbol deb behuda chekasan yohu,  
Ohing bu - folbinning daraklaridir.  
Asrim, asrim deysan, asring nima u!  
U to'zg'oq kalendar varaqlaridir.

Bog'ingda bir nihol gullabdi bu kech,  
Erta qiyg'os bo'lar olma noparmon.  
Ilk bahor zahrini o'yladingmi hech,  
Zaminda ne armon, senda ne armon.

Bir vaqtlar ilhomning o'tli tig'ida,  
Falakni ko'zlardi mening ham sozim.  
Lekin ikki daryo oralig'ida,  
Qolib ketdi mening o'sha ovozim.  
1981

\* \* \*

Dunyoda diyonat hali mavjuddir,  
Hali mard yigitlar yashab yuribdi.  
Onalar oq suti hamon oq sutdir,  
Quyosh ham falakda porlab turibdi.  
Hali qay dillarda yashar tangri ham,  
Hali afsonalar o'lib ketmagan.  
Hali sof tuyg'ular topmagan barham,  
Inson orzusiga hali yetmagan.  
1981

## **SHOIR UMRI**

Daraxtni hamisha o'raydi shamol,  
Shoirni tashvishlar chulg'ar hamisha.  
Sen shoir umrini dema bezavol  
Uning ham har oni tashvishga pesha.

Qara-ya, o'tibdi qirq yil muttasil,  
Yashabman yulduzlar ostida karaxt.  
Oh, shoir umriga havas qilmagil,

U quyun ichida ungan bir daraxt.  
1981

\* \* \*

Yerdan o'zga joyda hayot yo'q emish,  
Yo'q emish samoda biror-bir jonzot.  
Olimlar shundayin qarorga kelmish,  
Sira ajablanmang bu holdan, ustod.

Ular xo'p tinchibdi, tolei kulib,  
Asli yo'q narsani axtarmoq bekor.  
Men esa to hanuz umidga to'lib  
Izlayman zaminda do'sti vafodor.  
1981

### **QAYRAG'OCH**

Assalom, azizim, qayrag'och og'a,  
Balki men jiyanman, sen menga tog'a.

Farqimiz bittadir: sening tiling yo'q,  
Yurarga oyog'ing, ketar yo'ling yo'q.

Lekin baxtlidursan, soya solursan,  
Bahra olganlardan duo olursan.

Tog'ajon, mening-chi, ahvolim mushkul,  
Mendan panoh topgan qarg'aydi nuqul.

Bitta iltimos bor: o'rin almashsak,  
Men ham daraxt kabi yashasam andak.

Sen-chi, bu dunyoga Inson bo'lib boq,  
Mayli, bir kun meni o'tin qilib yoq.  
1981

### **QIRQ YOSH**

Qirq yosh ham keldiyu qo'limdan tutdi,  
Borman na ertakda, na afsonada.  
Qirq yilning naq yarmi yo'llarda o'tdi,  
Yarmi esa o'tdi bemorxonada.  
Shu mo''jaz uyimda yonsin deb chiroq,  
Ne aziz zotlarga yondoshdim gohi.  
Birin aka dedim, birini o'rtoq,  
Ba'zan nom chiqardim: davron maddohi!  
Kim alam chekmabdi umrida bir bor .  
U meni anglamas, anglamas aslo!  
Kim haqqa tashnadir, kim mehrga zor,



Men unga umrimni etgumdir fido.  
Ming bora roziman ona yurtimdan,  
Ko'rdi u erkalik chog'larimni ham.  
Kimdir tosh otsa ham goho ortimdan,  
Qoshimda bosh egdi kelib so'nggi dam.  
Qirq yillik umrimning eng avj pallasi  
Kelajak kunlarga munglig' qarayman.  
Ukajon, navbating yetdi chamasi,  
Endi men saflarga qanday yarayman?!  
Bir vaqtlar jo'r bo'lib o'tli yoshlikka  
Yurardim hech so'nmas tilagim bilan.  
Bugun-chi, dardlashib turibman yakka  
Shu majruh, shu xasta yuragim bilan.  
Afrosiyob kabi vayrondir dilim,  
Cho'ng larza yuz berdi unda nogahon.  
Oh, faqat ko'milib ketmasin yo'lim,  
Faqat o'tib tursin ko'chamdan zamon!  
1981, Moskva

## **XAYRLASHUV**

Xayr, ey, bearmon kezgan qirlarim,  
Xayr, ey, yiroqqa qochgan so'qmoqlar.  
Xayr, ey, maskanim - tuqqan yerlarim,  
Xayr, ey, sahrolar, xayr, ey, tog'lar.  
Endi sizni qayta qucha bilmasman.  
Inja diydoringiz endi o'zgardir.  
Shamollar, siz bilan ucha bilmasman,  
Chechaklar, endi siz menga beqadr.  
Oshno kengliklarga tashlab jim nazar,  
Tirqirab keladi ko'zlarimga yosh.  
Shamollar holimdan olganday xabar,  
Bir lahza teppamda tinganday quyosh,  
Ulardan nogahon tinglayman xitob:  
Shoirim, sen qayga qaytmoq bo'libsan?  
Kim seni badarg'a qilmish, ber javob,  
Sen nechun alvido aytmoq bo'libsan?  
Oltin bolaliging o'tgan tuproqda  
Nahot topilmasa senga bir madad?  
Nahot onang ruhi qolmish yiroqda,  
Nahot bobolaring qo'llamas minba'd?  
Go'zal bu dunyoga kelib ketmoqlik  
Nahotki shuncha jo'n, shunchalar oson?!  
Yulduzlar shivirlar, dillari dog'lik:  
Yo o'zga sir bormi? Aytgil, qadrdon!  
Yo'q, deyman va lekin sim-sim yig'layman,  
Qirq ko'zgu keladi qarshimga bot-bot,  
Dilbar kunlarimni bir-bir ilg'ayman,  
Misli oinaga boqqanday Farhod.

Endi qaytib kelmas u damlar sira,  
Shul sabab dilda g'am, ko'zlarimda yosh,  
Qoldi qaylardadir yoshlik - bokira  
Oduuq tublariga cho'kkanday quyosh.  
Men ko'rar endigi bu go'zal olam,  
Sirli u damlarning mavhum soyasi.  
Shul sabab qalbimni o'rtaydi alam,  
Shul sabab g'amimning yo'q nihoyasi.  
Hayajon bu - o'lim, kulfatdir - qo'shiq,  
Qilt etgan shamoldan titramas yurak.  
Unga endi na dard, na quvonch, na ishq,  
Balkim to'ng'ib qolgan bir orom kerak.  
Bir hovuch kul emish otash qismati,  
Men ham yona-yona tindim nogahon.  
Endi tillarimda vido hasrati,  
Endi ko'zlarimga tiyradir jahon.  
Olam tin oladi, tinurman men ham,  
Endi u sirlarin so'ylamas ortiq.  
Faqat derazamda bir qushcha beg'am  
Menga qo'shiqlarin etadi tortiq.  
Hayot deb atalgan xush tilak bilan  
Kechalar behudud o'yga tolurman.  
Tosh qotgan, nogiron shu yurak bilan  
Mo'ysafid quyoshni qarshi olurman.  
1981, Moskva

## **MENI OLIB KETING**

Tinch edi hamma yoq, tinch edi har yon,  
Titradi go'yoki yer bilan osmon.  
Boshimga xastalik tushdi nogahon,  
Meni olib ketimg o'z diyoriga.  
Issiq jon, deydilar, jon bo'lsa bo'lar,  
Payt kelsa chechak ham sarg'ayar, so'lar.  
Kim bilgay paymonang qay yerda to'lar,  
Meni olib ketimg o'z diyoriga.  
Ginam bor bu yurtning na havosidan,  
Mehribon doktorning na davosidan.  
Qaytarmang xastani muddaosidan,  
Meni olib ketimg o'z diyoriga.  
Sha'nimga g'ayurlar bir so'z demasin,  
Har kim o'zi tortar umr kemasin.  
Hech kimni mushtoqlik dardi yemasin,  
Meni olib ketimg o'z diyoriga.  
Talpingan diyorigim, u - O'zbekiston!  
Sehrini aytishga bormi hech imkon!  
Yo'q, o'zga yurtlarda berolmasman jon,  
Meni olib ketimg o'z diyoriga.  
1981, Moskva

## RANGLAR

*Irinaga*

Qachondir Shimolning oppoq qoridan,  
Seni yaratgandi zukko tabiat.  
Ko'zingga rang berdi osmon qa'ridan,  
Shul sabab moviydir bu ko'zlar behad.  
Sunbul sochlaringni yaratgan chog'da  
Za'faron shafaqqa bo'yab oldi u.  
Boqib lablaringga, o'zi ham dog'da,  
Qontalash bir rangni bera qoldi u.  
Rosa pardoz qildi tabiat to'lib,  
To oydin ranglari tortguncha xira.  
Barcha rang ustidan qo'riqchi qilib  
Qora Otelloni yaratdi so'ngra.  
1981, Moskva

\* \* \*

Rejami? Oldindan gapirish qiyin,  
Hayot ham, ijod ham nozikdir qildek.  
Ta'na toshlarini otmay turasiz,  
Hakim bilan bir oz hamkorlik qildik.  
1981

## TALPINAMIZ MANZILLAR SARI

Olis dengizdanmi yo yiroq tog'dan,  
Bulutlar keldilar bilmam qay yoqdan,  
U bahor, yoz bo'yi so'l ila sog'dan,  
Paxtakor xalqimga daf qila qoldi.

Ha, yashar tabiat gulduros solib,  
Daryoga suv sochar tashna yer qolib,  
Garchi paxtakor el hamisha g'olib,  
Lekin ushbu safar tinchi yo'qoldi.

Oyning u yarmida yomg'ir, qor yog'ar,  
Qimtinib Toyloqov beradi xabar,  
Muxbir-chi, uqdirar: . bizniki zafar,  
Dovda Bobodehqon haqqini oldi!..

Paxta deb, ha, qachon tortmadik tashvish,  
O'sha-o'sha yoz bu, o'sha-o'sha qish,  
Bobolardan meros - bitmagan bu ish,  
O'zbekning qay mahal bilagi toldi.

Yana zahmat chekar elda yosh-qari,  
Yana talpinamiz manzillar sari,  
Donolar dunyoni demish ko'pkari,  
Boqing, O'zbekiston dadil ot soldi!  
1981

## **BIZNING SHE'R**

Bizni pisand qilganlarga ming bora qulluq...  
Paxtakorlar va ishchilar pisand qildilar.  
Ziyolilar, yumushchilar pisand qildilar,  
Studentlar, to'quvchilar pisand qildilar,  
Maktabdagi o'quvchilar pisand qildilar,  
Bizni pisand qilganlarga ming bora qulluq.

Lekin bizni ancha zotlar pisand qilmadi,  
Yayov edik, saman otlar pisand qilmadi,  
Shoh surgandik, biroq motlar pisand qilmadi.  
Taajjubmas, she'rga yotlar pisand qilmadi,  
Bizni pisand qilganlarga ming bora qulluq.

Shoirni hech taniganmi hissiz dimog'dor,  
Muqimiyning avlodimiz kamtar va nochor.  
Lekin shoir so'zi bilan hamisha poydor,  
Aminxo'ja bu borada guvohdir zinhor,  
Bizni pisand qilganlarga ming bora qulluq.

Shoir zoti yuragiga bo'libdir mahkum,  
Ijro bo'lmas, u bo'lsa-chi, o'qiydi hukm.  
Asrlardan qolib kelgan oqibat shulkim,  
Quloq solmas unga ba'zan oshno ijroqo'm,  
Bizni pisand qilganlarga ming bora qulluq.

Men kichkina uvoqdirman, dunyo tomidan  
So'zlagayman o'tgan-ketgan shoir nomidan.  
Har kim ichgay sho'r qismatning achchiq jomidan  
Lekin degum bu davronning xush ayyomidan,  
Bizni pisand qilganlarga ming bora qulluq.  
1982

## **HAYRONLIK**

Chindan g'alat erur dunyo ishlari,  
Miyang g'ovlab ketar o'ylagan sari,  
Diyonat, xiyonat aralash bari,  
Boqib bu savdoga, hayron o'tdik biz.

Ko'rdik inson fe'lin o'ru qirini,  
Baham ko'risharlar avval sirini.

So'ngra nimta qilar biri birini,  
Boqib bu savdogaga, hayron o'tdik biz.

Goho sendan aziz ostingda oting,  
Goh bir g'alamisga bog'liq hayoting,  
Yaxshiyam qatorda bordir bayoting,  
Boqib bu savdogaga, hayron o'tdik biz.

Sen deysan, dilim pok, rashkdan yiroqman,  
Sen unding, men esa hanuz tuproqman.  
Yo'q, do'stim, men sendan bechoraroqman,  
Boqib bu savdogaga, hayron o'tdik biz.

Ne qilay, yomonga o'qiyimi la'nat,  
Yo shodon qo'shiqlar aytaymi faqat.  
Birovda mehr mo'l, birovda nafrat,  
Boqib bu savdogaga, hayron o'tdik biz.

Har qalay baxtlimiz - tirikmiz magar,  
Qolgan gaplar esa o'tarda ketar.  
Bamisli karnayga ishq tushgan kar,  
Boqib bu savdogaga, hayron o'tdik biz.  
1982

\* \* \*

Senga bu dunyoning guli, ne'mati,  
Senga, ey qay bir dam yaralgan san'at.  
Senga oshufta bu dilning rag'bat,  
Senga ohista bu arzi muhabbat.

Yillar o'tib ketmish, qayoqda eding,  
Qaysi gulshanlarda yasharding, armon.  
Xazonli bu boqqa nechun ham kirding,  
Nechun xasta dilga solding g'alayon.

Sobit esam-da, gar topolmasman ep,  
Qarshimda osmonni past qila qolding.  
Sen o'tgan dunyoga qaydan yo'l topib,  
Kechmish bir insonga qasd qila qolding.  
1982

## **O'ZBEGIM TOJIK BILAN**

Do'stu qardoshdir azaldan  
O'zbekim tojik bilan,  
Ikkisi bir bayt g'azaldan  
O'zbekim tojik bilan.

Qay yo'sin aylay qiyos men  
Bul shirin do'stlik so'zin,  
Totlidir boldan, asaldan,  
O'zbekim tojik bilan.

Baxtga yor doim Navoiy toki  
Jomiy bor ekan,  
Biz ular qo'ygan tamaldan,  
O'zbekim tojik bilan.

Fahm etib boqsang agarda,  
Biz qo'sha sayyoramiz,  
Bu Ali so'zlar Zuhaldan,  
O'zbekim tojik bilan.

Bir egatning boshi senu  
Bir egatning boshi men  
Yer ekib tinmas hamaldan,  
O'zbekim tojik bilan.

Bul qadrdon ikki do'stga  
Xohishimdir, to abad  
Topsa bir ma'no masaldan,  
O'zbekim tojik bilan.  
1982

## **SAVOB**

Avji saratonda hansirab, yonib,  
Qovrilib olovli yo'llar taftida,  
Muzdayin buloqdan suv ichgach qonib,  
Hordiq olganmisan chinor tagida?

Ruhingda safoyu taningda mador,  
Umidbaxsh qo'shiqlar kuylaganmisan?  
O'sha payt, o'sha on hech qursa bir bor  
Chinorni kim ekkan - o'ylaganmisan?

Ro'baro' kelding sen toshqin daryoga,  
Qolding sohil uzra chorasiz, giryon,  
Lekin yo'liqqanday ajib ro'yoga,  
Qarshingda bir ko'prik bo'ldi namoyon.

Bamisli uzala tushgan xor vujud,  
Ko'targay u turfa insonlar korin.  
O'tding sen daryodan salomat va but,  
Lekin o'yladingmi ko'prik me'morin?

O'rmonlar bag'rida sayr etgan sayyoh,  
Changalzor qo'ynida sargardon ovchi,  
Mo'jaz boshpanani ko'rdingmi nogoh,  
Uni qoldirmishdir qay bir yo'lovchi.

Qoldirmish u senga qaro kun uchun,  
Bir chimdim tuz bilan bir juft chaqmoq tosh.  
O'ylab ko'rganmisan, bu himmat nechun,  
O'ylab ko'rganmisan, kimdir u g'amdosh?

Ha, inson umrining kechmishi ajab,  
Goh to'ng'ar, goho u yashnar qulf urib...  
O, balki qaysi bir fidoyi sabab,  
Yuribsan sen hayot nash'asin surib.

Ayt, axir o'zing ham to borsan sobit,  
Kimsaga nasiba uzatganmisan?  
Ko'changdan lapanglab o'tganda tobut,  
Sen uni to'rt qadam kuzatganmisan?

Chorasiz bir inson uchragan damda,  
Unsiz so'rog'iga qildingmi javob?  
Ayt-chi, bilarmisan, yorug' olamda  
Bularning barchasi atalgay savob.

Yo'q, yo'q, o'zga erur bid'at va karam,  
Himmatu saxovat tiriklarga xos.  
Bobolar beta'ma qurgan dunyo ham  
Asli savob uchun qolgan bir meros.

Kimdir tuzar uni, kimdir buzadi,  
Kimdir borini ham qiladi barbod.  
Kimdir ta'ma bilan dunyo kezadi,  
Kimdir o'ksuk dilni etadi obod.

Savob deb ingraydi dunyomiz behol,  
Zordir u najotbaxsh hislar sehriga.  
Janglarda toliqqan majruh zot misol,  
Suyanib yashar u inson mehriga.

To hayot ekanmiz savobga zormiz,  
Yilt etgan shu'ladan dillar fayziyob.  
Goh g'amgin, goh esa umidga yormiz,  
Yo'qolmasa deymiz dunyodan savob.

Axir uning bilan gullagay ochun,  
Axir uning bilan umrlar shoyon.  
Faqat savob borki, jahon bus-butun,  
Faqat savob borki, azizdir Inson!

## ARSLON CHORLAGANDI ...

*Erkin Vohidovga*

Biz ham yuksaklarga tikkandik ko'zni,  
Bizda ham bor edi matonat, bardosh.  
Arslon chorlagandi qoshiga bizni,  
Lekin qumursqalar bo'ldi safardosh.

Jami tiriklikka tanish shu xatar,  
Qumursqa yaralgan yoppa talarga.  
Do'stim, alam qilar, arslon bexabar,  
Yem bo'lib ketsak shu qumursqalarga.  
1982

\* \* \*

Sen uzoq yashaysan,  
Hammadan ziyod.  
Hali toychoqlaring o'ynab yuribdi.  
Meni-chi, shum ajal eshikda, hayhot,  
Egarlangan otday kutib turibdi.

Sen balki baxtlisan,  
Umringda ko'klam,  
Tunlar rang oladi hali sochingdan.  
Men-chi, nazaringda yovqur bo'lsam ham  
Bir kunda to'rt fasl kechar boshimdan.

Yuz yil yashab o'tar dunyodan birov,  
Fursat manglayiga sololmas izlar.  
Yo'q, yo'q, yillar emas umrga egov,  
Uni yemiradi beomon hislar...  
1982

\* \* \*

Yiroq Yevropada, Oxrit bahrida,  
Jahon shoirlari jam bo'lgan oqshom,  
Kimdir she'r o'qidi boshhoq haqida,  
Rizqini tanidi hamma shu ayyom.

Falastinlik shoir arz etdi dodin,  
Men ham insonman deb, bo'lay deb otlik.  
So'ng daryo qa'riga otdi kitobin,  
Uning bir talabi edi ozodlik.

Ha, nonu tuz bilan tirikdir inson,  
Erkinlik, istiqlool mening ham jonim.



Xayriyat, ust-boshing butundir, jahon,  
Paxtangni o'yladim, O'zbekistonim.  
1982, Makedoniya

## **TOSHKENT SHA'NIGA**

Goho oddiy maskanday tuyuladi, ochiq gap,  
Har kuni yashayverib ko'nikib qolgan uying.  
Toshkentim, ajib kentsan, muhtasham qo'rg'onsan zab,  
Ming-minglab chaqirimdan ko'rinib turar bo'ying.  
Necha-necha ellarda duch keldim turfa zotga,  
Toshkan desang yugurar yuzlariga tabassum.  
Toshkent so'zi uyqashdir tinchlik bilan hayotga,  
Toshkent desa anglanur mehr bilan tarahhum.  
Shunday payt goh o'ylayman: buning boisi nedur,  
Nechun shoir tilidan tushmaydigan nazmsan!  
Axir, bunda har bir g'isht tarixdan mujda erur,  
Beruniy ta'rif etgan ko'hna shahri azimsan.  
G'afur G'ulom so'zini har lahzada yod etib,  
Toshkentning kamolidan mening ham ko'kda boshim.  
Nega uning dovrug'i olamni ketmas tutib,  
Bu yerda ijod etsa dovrug'li zamondoshim.  
Toshkentdir kamon yasab degrezlarga bo'lgan joy,  
Bugun o'zbek yurtining eng katta korxonasi.  
O'n to'rt go'dak haykalin ko'rgandirsiz hoynahoy,  
O'sha turfa millatning Toshkent bo'lgan onasi.  
Jahon voqeotida sening ta'rifing shoyon,  
Necha zotlar mehringdan ilhomu zavq olmishdir.  
Men ham kamtar fuqarong,  
madh eturman bu zamon,  
Mening ham qatra qonim  
tuprog'ingda qolmishdir.  
Hamisha ustuvor bo'l, barqaror bo'l hamisha,  
Ey, ko'hna Sharqimizning  
hech so'nmas mash'alasi.  
Noming kabi mustahkam, poydor bo'l hamisha,  
Do'stlik, baxt, muruvvatning  
mangu boqiy qal'asi.  
1982

## **QONUNIYAT**

Oqshom baroq mushuk labini yalab  
Uyquga ketadi sichqonni o'ylab.  
Sassiz qanot qoqar boyqush tunlari,  
Es-hushida faqat qushning inlari.  
Tulki to'qaylarda izg'iydi giryon  
Xayolida uning tovuq yo quyon.  
Burgut yuksaklarda qanot qoqadi,

U ham o'lja izlab tuban boqadi.  
Bu-ku, tabiatda qonundir azal,  
Foydasiz bu yerda axtarsang masal.  
Lekin olamda bor o'zga bir holat  
Uni sharh etolmas hech kimsa, hech vaqt.  
Oh, faqat odamzod - farzandi bashar.  
Bir-birin mahv etish qasdida yashar.  
1982

## **NIYAT**

Magar kelganda ham qiyomat qoyim,  
Yor bo'lsin yigitga niyati doim.

Tabarruk keksaning gapin eshitdim,  
Boshing toshdan bo'lsin, derdi, iloyim.

Dilovar dardida tortdim uzangi,  
Men kim deb ado-yu, kimdir adoyim.

Gohida safardosh bo'ldim g'animga,  
Sodiq do'st topolmay qaytganda royim.

Boshimga chiqdi goh poyim to'zoni,  
Ulug'lar qoshida goh bo'ldi joyim.

Qismat qahr bilan yo'lim poyladi,  
Agarchi, baxt menga boqdi muloyim.  
1982

\* \* \*

Zamin aylanadi, chiqadi quyosh  
Hargiz kibr bilan ko'tarmagin bosh.  
Oyoq ostingdagi xarsangni tepma,  
Balki haykal bo'lar senga o'sha tosh.  
1982

\* \* \*

Sizga tilaklarim bir jahon bo'lsin,  
Boshingiz oftobli osmon bo'lsin.  
Kunduzning g'aroyib chog'idir oqshom,  
Saodat birla u nurafshon bo'lsin.  
1982

## **EPIGRAMMA**

Sen o'lsang nimangni ko'mamiz ekan,  
Shuni o'ylab qoldik bilonihoya...

Sen axir jismi yo'q ko'lankadirsan,  
Sen axir birovdan tushgan bir soya.  
1982

### **SIZDAN NIMA KETDI**

Garchi, yashamadim beiqbol, nigun,  
Garchi, davralarim nurlik, otashlik,  
Nega, mening dilim, titraysan nechun,  
Nechun yuragimni tirnaysan, g'ashlik.

Ne bu, erta ketgan yoshligimmi bu,  
Yoki do'stlarimdan orttirgan hasrat?  
Ne bu, qandayin his, qandayin tuyg'u,  
Qanday nomsiz mehr, ismsiz nafrat?

Qirq yil ham o'tibdi misli bir damdek,  
Qolgani ne kechar - menga noayon.  
Vayrona tagida majruh odamdek  
Tirmashib yashayman hayotga tomon.

Sizdan nima ketdi, ey do'sti aziz,  
Sog'inmang menga har bir zum yomonlik.  
Mendan nima ketdi, sizga ham cheksiz  
Saodat tilayin, tilay omonlik.  
1983

### **BAHOR TILAKLARI**

Nechun ko'klam madhi tushmas g'azaldan,  
Shoirlar bahorni kuylar azaldan?

Oshiqqlar zangori kenglikka boqib,  
Oo'shiqlar aytadi bag'rini yoqib.

Tabarruk chollarning chakkasida gul,  
Momolar o'yida bahordir nuqul.

Bir lahza yasharar qarri qo'rg'onlar,  
Ajib dilbar bo'lib qolar insonlar.

Ha, bahor misrasi menda ham talay,  
Bu holning boisi bordir harqalay.

Azizim, g'unchaga nazar sol bir on,  
Bag'rida hozircha turfa hol pinhon.

Ranglar yashar unda balki pushti, oq,  
Ajab, tikoni ham hozircha yumshoq.

Tong chog'i shabboda ko'taradi bosh,  
Oh, nechog' latifu nechog'lik yovvosh.

Asli qahratonning nabirasi u,  
Nash'u namolari hozircha ezgu.

Inson fe'li qiziq, yashagay hurkib,  
Shervachchani silab, sherdan-chi, qo'rqib.

Bahor norasida go'dakday shirin,  
Qo'ynida ezgulik armon yashirin.

Nashtar bo'lmasidan g'unchaning xori  
Shirin tuyuladi uning diydori.

Bo'ronga aylanmay shabboda - go'dak  
Ozurda dillarni yayratar beshak.

Odam bolasiga doim umid yor,  
Shul sabab bahorga tilagi bisyor:

Olamga qabohat zahrin sochmasa,  
Mas'um yuraklarda yara ochmasa.

Qoplamasa basdur yeru samoni  
Mudhish qirg'inlarning qora to'zoni.  
1983

\* \* \*

Yashasang dunyoda yorug' yuz bilan,  
Hurmat ko'rguzsang va bo'lsa izzating!  
Ketsang, eslasalar shirin so'z bilan,  
Yaxshi noming qolsa, qolsa xizimating.

G'anim nafratingga kelolmasa bas,  
Kulsang, sidqidildan yayrab kulolsang.  
Dilda g'ashlik bo'lmay yashasang, xullas,  
Baxtli odamlarday baxtli bo'lolsang.  
1983

## **BOBUR**

Men-ku, oddiy odam,  
Shundoq bo'lsa ham  
Shukr, bas, degancha g'animlarim bor.  
Shart emas ularga ta'rif chinakam,  
Biri jununsifat, birovi hushyor.

Biroviga yoqmas jindek jur'atim,  
Biroviga yoqmas men yurgan yo'lak.  
Nogoh biror joyda chiqsa suvratim  
Biri uxlay olmay qiynalsa kerak.

Biz shunday o'tamiz,  
Ya'ni kun ko'rib...  
Maydagina kuchsiz, maydagina zo'r.  
Hayotning mana shu burjidan turib,  
Men Sizni o'yladim, hazrati Bobur.

Siz - zobit, dastini cho'zgan dunyoga,  
Siz - shoir, mangu bir alanga yoqqan.  
Nainki bandalar, Sizning siymoga  
Ne-ne saltanatlar kek bilan boqqan.

Bahodirlik ichra yor Sizga Humoy,  
Siz ulug' zotlarning izin bosgan er.  
Nazmiy sajdagohda Sizga, hoynahoy,  
Imomlikka o'tgay faqat Alisher.

Ha, yolg'iz she'r qoldi, boshqasi, abas,  
Yetti iqlim aro doston naqlingiz.  
Ne baxt, parchin bo'lib toj degan qafas,  
Bizga yetib keldi olmos aqlingiz.

Ayting, ne topdingiz Siz kezib dunyo,  
Hanuz boqisharlar sho'rishga to'lib.  
Shoirsiz, yaxshisi, qolingiz, Mirzo,  
Mushfiq yurtigingizda bir shoir bo'lib.  
1983

### **BIR SIRKI...**

Dedingki, mumkinmas senga hayajon,  
Kulfatdan yiroq yur, may ham shart emas.  
Magar yer yuzini bossa ham to'fon  
Sening to'pig'ingga chiqmasa, shu bas!

Ha, do'stim, hayajon endi muvaqqat,  
Shodligu g'amni ham totganman bir oz.  
To'fon bosganda ham yer yuzin, faqat  
Qutulib qolardi o'rdak yoki g'oz.

Lekin ogoh etay seni bir sirdan,  
Balki, tanish senga bu holning foli.  
Ayt-chi, qay ahvolga tusharding, birdan  
Yelkangda o'rmalab qolsa chumoli.

O, kibor tuyg'ular, ezgulik, vijdon...  
Bular hayotdagi mavjud bir ishdir.  
O'zingni osmonda sanama, Inson,  
Seni yengadigan... mayda tashvishdir.  
1983

### **DO'STIM MUROD HAMROEV XOTIRASIGA**

Men ko'rib turibman,  
Yer-osmon parchin,  
Farzanding fig'oni ko'klarga o'rlar.  
Bir yonda o'zbeklar egibdi boshin,  
Bir yonda bolam deb yig'lar uyg'urlar.  
Nima qilib qo'yding,  
O, do'stim Murod,  
Nahot o'limda ham sen bo'lding pesha,  
U ahdu paymonlar bo'ldi-ku barbod,  
Yakka ov qilarkan ajal hamisha.  
Minglab yil o'tsa ham osmon qa'rida  
To'qnashmas falakning ikki to'zoni.  
Ne baxtkim, o'zbekning munis bag'rida  
Menga do'st bo'lganding, uyg'ur o'g'loni.  
Nega yaxshilarga notanti hayot,  
Nega g'anim qolib, do'st ketar nega?  
Zukko olim eding, o'zing ayt, Murod,  
Tabiat ishiga bormikin ega?  
Netay, janozangga kechikdim o'zim,  
Nogoh bu zarbadan qoldim dovdirab.  
Kimga xitob aytay, Murod, azizim,  
Boqurman qabringga endi jovdirab.  
1983

### **QUYOSH SHAHRI**

Eng teran chashmadek tinib, sizilib,  
Asrlar qa'ridan keladi xabar:  
Ikki ming yil burun chayla buzilib,  
Qo'rg'on barpo bo'ldi, yaraldi shahar.

Turon yulduzlarin silsilasida  
Chaqnadi yana bir qo'lbola quyosh.  
Ulug' shaharlarning bo'ysirasida  
Abadiy o'rnini topa olgan Shosh.

Toshkentim, oftobsan, Sharqda nur sochgan,  
Quyoshdek tutilding necha boralar.  
Tosh mag'zing chaqolmay tamshanib qochgan  
Necha Qutayba-yu, necha Dorolar...

O'zbekka maqtanish odatmas, garchand,  
Bag'rimni to'lg'azar ushbu kun g'urur:  
Toshkent Buxoro, Xevoq, Samarqand,  
Har biri jahonning bezagi bo'lur.

Qalbing ko'zi bilan nazar sol, Inson,  
Mana bu Mingo'rik, manov Ko'kaldosh.  
Moziyga bitsaydi zabon nogahon,  
Erk deb qo'zg'alardi bunda har bir tosh.

Qadimiy Nasafda topdim tavallud,  
Tanishdir Kushonning biyobonlari.  
Ne baxtkim, dilimga soldi she'riy o't  
Toshkentning sehrli xiyobonlari.

Farzandman, bag'ringda kezurman men ham,  
Sensan mening uchun maskan mo'tabar.  
Toshkentdan boshlanur menga ham olam,  
Dengizlardan nari, qit'alar qadar.

Ne-ne zilziladan chiqolgan omon.  
Manglayi yarqiroq makonsan buyuk.  
Baynalmilal ma'vo, asl qahramon,  
Jahon tarixida noming bor suyuk.

Ishchisan, olimsan, arbobsan, me'mor,  
Senga ham muntazir boqar yer yuzi.  
Tinchlik degan joyda Toshkent ruhi bor,  
Toshkent degan joyda osoyish so'zi.

Ne ulug' tarixlar kechdi boshingdan,  
Xislating ne erur - olam biladi:  
Bugun har burjingdan, har bir toshingdan  
Faqat do'stlik degan sado keladi.

Yiroq afrikalik sargashta adib,  
Bombay g'azalxoni shoshar sen tomon.  
Ezgu niyatlarning bayroqdori deb,  
Seni sharaflaydi zaminu zamon.

Sen quyosh shahrison, faxrimsan azal,  
Omon bo'l hamisha o'zbeki yerim.  
Sensan munis, mushfiq Sharqimga haykal,  
Tuhfa bo'la qolsin senga shu she'rim!  
1983

## **BOG'BON**

*Mashhur bog'bon Temur aka Mirzaevga bag'ishlayman*

Qashqadaryo degan so'z aytilgan chog',  
Hanuz miyig'ida kulguvchilar bor.  
Emishkim, u yerga noravodir bog',  
To'rt tuyoq yemishin o'ylar chorvador.

Mana paydo bo'ldi Temur Mirzolar,  
Turfa chechaklarni o'stirgan inson.  
Ne-ne bog'bonlar ham undan dars olar,  
Mana, nimalarga qodir tirik jon.

Qarshi ko'chasidan o'tsangiz magar,  
Sizni kuzatadi ming-minglab charog',  
Qayoqdan kelmoqda bu hid muattar!  
Bu - Temur Mirzolar barpo etgan bog'.  
1983

### **JANGDAN QAYTMAGAN SHOIRLARGA**

Isming balki Sulton, balki Qodirsan,  
Sen jangdan qaytmagan shahid shoirsan.  
Lekin g'olibsan - safda hozirsan,  
Sen saqlab qololgan jahoning menda.

Urush deganiga bo'lsin ming la'nat,  
Neki tirik bo'lsa - aylagay g'orat.  
Sening qalaming ham sindirmish bevaqt,  
Yetib-etolmagan armoning menda.

Beiz ketmadi, yo'q, shahidlar qoni,  
Quzg'undan asradi mas'um dunyoni.  
Agar ko'kka yetsa tiriklar shoni,  
O'zing orzu qilgan osmoning menda.

Har nechuk, shoirman - sen bilan jondosh,  
To'yingda to'ydoshman, tirik yelkadosh.  
Degayman, yosh umring o'ylab, ey, qondosh,  
Bitgum, bitilmagan dostoning menda.  
1983

### **SO'NGGI URUSH**

*... Nahotki insoniyat o'z kashfi bilan o'zini o'zi vayron etadi.  
Javoharla'l NERU*

Bir qadam qo'ysang bas - naryog'i o'lim,  
Bir qadam qo'ysang bas. shaksiz halokat.  
Odamzod boshida turibdi shu zum  
Qazoyi muallaq, mudhish falokat.



Entikib ketadi nogoh yuragim,  
Mash'um bu so'zlarni tinglaganim dam.  
Bugun faqat toshlar befarqdir, balkim,  
Bugun, balki, faqat bulutlar beg'am.

Asrlar so'ngida yaralgan inson  
Nahot endi o'zin aylasa barbod.  
Nahot oxiratga yuz bursa jahon,  
Nahot karomatlar haq chiqsa, nahot.

Navoiy abasdir, Pushkin ham abas,  
Rim yo'q, Samarqand yo'q, dahshat, alhazar!  
Moziydan biror nom qolarmidi, bas,  
Kelajakning o'zi bo'lmasa magar.

O, odam, har nega topinding nechun,  
Ayt, u yaradimi biror-bir korga!  
Falloh manglayidan o'q yeydi bugun,  
Sig'inib turgan chog' parvardigorga.

Yo'q, bu pok dillardan yiroq malomat,  
Bu - bani odamga ko'rgulik, sho'rish.  
Bu - sho'rlik zaminga chang solgan ofat,  
Bu - do'zax, bu - o'lim, bu - so'nggi urush.

Alhazar, olamda nainki odam,  
Hayotning o'zi ham kirsqa qabrga.  
Koinot qa'rida zamindan u dam  
Nahot eshitilsa so'nggi qasirg'a.

Nahotki, tangri ham, iblis ham ko'r-kar,  
Osiy banda bilan ketsa jonhalak.  
Ayt-chi, sobit kuching bor bo'lsa magar,  
Bizni ne murodda yaratding, falak?!

Bu bari - asrimiz kashf etgan balo,  
Bu - yovuz sarmoya, ko'ru kar, so'qir.  
Boshimiz ustida turibdi guyo  
Bir soch tolasiga bog'langan shamshir.

Ummon ortidagi mitti qiz Smit  
Jahon taqdiri deb jar solar bu choq.  
Hayhot, o'shal joyda qaysidir palid  
Uning qismatiga qayraydi pichoq.

Munis O'zbekimning osoyish chog'in,  
Kuylamog' menga ham baxtdir bazavol.  
Kurashlarda o'tgan farzandlar dog'in  
Unutmoqni lekin kim qilar xayol.

Har kim ona deydi mushfiq yerini,  
Oh, ne g'am, onani kulfatda ko'rish.  
Mayli, shoir yozsin so'nggi she'rini,  
Faqat, bo'lmasa bas, so'nggi bu urush!  
1983

## **INJU DIYOR UCHUN**

Outlug' davralarda jam bo'lgan mahal,  
Do'stlarga baxt tilash azaliy odat.  
Keladigan bu yil tinch bo'lsin avval,  
Baxsh etsin har kimga oliy saodat.

Yoshlik - bu karvonning erka noridir,  
Daryoday toshqindir, jilg'a kabi sof.  
Yoshlik - kelajakning xaloskoridir,  
Sira tark etmasin yoshlikni insof.

Mo'tabar onalar - xonamiz ko'rki,  
Otalar hayotdir - yorug'dir jahon.  
Tiriklik nomiga bir o'tinch shulki,  
O'rtaga tushmasin bemahal hijron.

Inju diyorimiz ko'z bo'lsa agar,  
Mudom omon bo'lsin to'garak zamin.  
Boshimiz silagan shu xalq mo'tabar,  
Daf'atan chekmasin farzandlar dog'in.

Yangi yil sha'niga aytmoqdamiz so'z,  
Balki o'tib ketar bir zum bu farah.  
Xalqimning mehnatin aylagin ko'z-ko'z  
Million chanoqlarda ko'pirgan qadah.  
1983 yil, noyabr

## **HASADGO'Y HAQIDA**

O'zi oddiygina,  
Kam yo'q ishida,  
Tonnalab ko'mir bor  
Lekin ichida.  
1983

\* \* \*

Samoda yuribdi hanuz yolg'iz oy,  
Tanholik qiynaydi uni hoynahoy.  
Yo'qlikdan axtardim sening vaslingni,  
Kim qayga sig'insa, Ka'ba o'sha joy.  
1983

\* \* \*

Shukr aytay, ko'p yaxshi umr ko'rdim men,  
Goh yaydoq shamolday davron surdim men.  
Lekin seni ko'rsam bulut oldida  
Chorasiz yo'lbarsday hayron turdim men.  
1983

\* \* \*

Azizim, payt keldi, ko'nglim yoraman,  
Insonman, sen horsang, men ham horaman.  
Oting qamchilama o'zg'irman deya,  
Sen borgan u joyga men ham boraman.  
1983

\* \* \*

Tug'ilsang baxt bilan kamol o'shadir,  
Tark etsang olamni zavol o'shadir.  
Oxir chog' tuprog'ing ustiga kelib,  
Kimdir yod aylasa, iqbol o'shadir.  
1983

## **ETNA VULQONI**

Hanuz yonib yotar Etna vulqoni,  
Daf'atan o'xshar u olovrang gulga.  
Oqib tubanlarga lava to'foni,  
Sekin aylanadi qop-qora kulga.

Men uning qoshida saqladim sukut,  
Ha, bir chog' olovli edi yo'llarim.  
Endi u otashlar bo'ldilar unut,  
Poyingda yotibdi endi... kullarim.  
1984, Sitsiliya oroli, Italiya

## **SAVOL**

Tanho sahrolarga bosh olib ketsam.  
Yo yiroq g'orlarni oshyon etsam,  
Bedo'stu beyoron tugasam, bitsam,  
Ko'ngling to'ladimi, o'shanda, ayt-chi?

Qolmasa dunyoda mendan xotirotn,  
Nainki xotirotn, oddiy, jo'n bir ot.  
Bo'lsa na bir qavmim, na xesh, na avlod,  
Ko'ngling to'ladimi, o'shanda, ayt-chi?

Olamga o't qo'ysa har aytar so'zing,  
Yiqsang dunyolarni - tikkan choq ko'zing,  
So'ngra mo'ri kabi qolsang bir o'zing,  
Ko'ngling to'ladimi, o'shanda, ayt-chi!  
1984

## **O'TINCH**

Chindan ham asrimiz bormoqda o'sib,  
Har qanday kulfatga turmoq kerak shay.  
Ajabmas, bobosin burchakka qisib,  
Nasihat o'qisa biror bolakay.

Ajabmas, erta kun bir shoir ukam,  
She'rlar yozib yursa Somon yo'lida.  
Ajabmas, yo'qolsa ajab so'zi ham,  
Tahrir topsa Inson zamon qo'lida.

Har kimga o'z davrin yo'rig'idir yor,  
Mayli, tap tortmagin sen ham har ishdan.  
Bolam, faqatgina bir o'tinchim bor,  
Hazar qilsang basdir harom-harishdan.  
1984

## **MUSTAY KARIMGA**

Ajab, bitta yurtning uchta nomi bor,  
Garchi u uch nomlik bitta bo'stondir.  
Uzoq tarixlardan bir nom barqaror,  
O'rta Rossiyada Oygulistondir1.

Ajab, bitta yurtning uchta nomi bor,  
Oyguldan tarqalgan bir gulistondir.  
Bu kun nomi uning metin va poydor,  
U - aziz, mo'tabar Boshqirdistondir.

Ajab, bitta yurtning uchta nomi bor,  
Uchinchi ushbu nom menga ayondir.  
Bu she'riy qo'rg'ondir, manguликka yor,  
Bu ulug' she'r yurti - Mustayistondir.  
1984

## **OFTOBSHUVOQ**

Bahor kunlarida,  
Oftobshuvoqda,  
Hordiq olar edi ko'pincha onam.  
Naykamalak balqsa Qo'ng'irtov yoqda,  
Nechog' yosharardi bu ko'hna olam.

Xastalik qiynardi onamni biroq,  
U chetga termulib uh tortar edi.  
Bahor yoqsa hamki olamga charoq,  
Mening yuragimda g'am ortar edi.

Men onam yonida ivirsib beun,  
Kun bo'yi yurardim dilgir, betoqat.  
Yiroq-yiroqlardan mungli va uzun,  
Turnalar tovushin tinglardim faqat.

Shu-shu o'nglanmadi onam rahmatlik,  
Mening ham yillarim topdilar to'zim.  
Bugun onam kabi yolg'iz, toqatlik,  
Bahor quyoshiga boqaman o'zim.

Endi meni ezar ming bitta xayol,  
Ular o'tkinchi do'st, vafosiz yorlar.  
Endi o'zim dardkash, o'zim jim va lol,  
Endi o'zim uchun tiyra bahorlar.

Iliq tomchilagan yomg'ir ham goho  
Tuyular onamning ko'z yoshi bo'lib.  
Onam turganiday teppamda go'yo  
Bahorning mehribon quyoshi bo'lib...  
1984

### **ODAM BOLALARI**

Odam bolalari turfa naqadar,  
Biri mo'min bo'lsa, boshqasi asov,  
Biriga quyuqroq salom bersang gar,  
Xushomadgo'y deydi, nomingni darrov.

Mayliga, ataylab biror kun sen ham  
Qad kerib, sipoyu o'ychan bo'lib yur.  
Malomat yog'ilar boshingga shu dam,  
Seni ataydilar darhol takabbur.

Yaxshisi dilingda bo'lsin muhabbat,  
Oshkor etaverma uni jo'rttaga.  
Avliyo misoli jim yurgin faqat,  
Ko'zlardan yiroq bo'l, chiqma o'rtaga.  
1984

### **QARDOSH SHOIRGA**

Shahar talashmagin, daryo talashma,  
Iste'dod talashma, daho talashma.  
Tabiat yaratgan yaylovda xurram,

Bizdek o'tlab yurgan jonzodsan sen ham.  
Bu ko'hna tuproqni kovlasang agar,  
Chiqar necha nomsiz daryo va shahar.  
Kechmish daholarning aytgan so'zlari .  
Ahli diyonatning mulkidir bari.  
Tangrini ilk bora o'ylab topgan kim?  
Bu savol qoshida barchamiz ham jim...  
Qurbing yetsa magar qo'rg'on yaratgin,  
Olamni o'zingga mayli, qaratgin.  
Qimmat bergin bizga asl, bebaho,  
Nomingni ataylik mayliga, daho!  
Tariqday zamin bir va Inson birdir,  
Bilmagan mardumga bu holni bildir!  
Shunda men qoshingda egarman boshim  
Va seni atarman chindan qardoshim!  
1984

## **TUNISLIK BOLA**

*Rimda Tunisdan ish axtarib kelgan bir o'spirinni ustidan benzin quyib yoqib yubordilar*

Afsus, razolatga botdi bu ochun,  
Aybni yaratganga to'nkamoq nechun.  
Senga o't qo'ydilar bir ermak uchun,  
Rimga nega kelding tunislik bola?

Bilaman, sen uchun parcha non qahat,  
Zamin mozor bo'lsa, Afrika lahad.  
O't qo'ysa, o't qo'ysin o'z eling faqat,  
Rimga nega kelding tunislik bola?

Bu shundoq manzilki, do'stni yovlaydi,  
Ota o'z farzandin avrab tovlaydi.  
Bu yurtning sayyodi odam ovlaydi,  
Rimga nega kelding tunislik bola?

Shundoq holga kelmish qadimiy Lotin,  
Bulg'alar sharafin, bulg'alar zotin,  
Chumolicha ko'rmas odam hayotin,  
Rimga nega kelding tunislik bola?

Ha, olov ostida butkul yer yuzi,  
Tutunga to'lmoqda odamzod ko'zi,  
Yonib ketmasaydi zaminning o'zi,  
Rimga nega kelding tunislik bola?  
1984

\* \* \*

Ravo ko'r, yuzingda bir xol bo'layin,  
Ko'rsat ag'yoringni, zavol bo'layin.  
Kattakon to'y qilib nog'ora chalgin,  
To'yingda suv tashib hammol bo'layin.  
1984

\* \* \*

Oftob botib ketdi, egildi boshim,  
Yulduzdek sochildi ko'zimdan yoshim.  
Hajringda bag'rimni yerga berurman,  
Tun bir lahad bo'lsa, oy qabr toshim.  
1984

\* \* \*

Oqar daryoga ham kimdir band bergan,  
Hayot kimga zahar, kimga qand bergan.  
Ey, g'ofil, sarkash deb meni kamsitma,  
G'anim senga emas, menga pand bergan.  
1984

\* \* \*

Bilaman, o'tadi shodlik bilan g'am,  
Bilaman, g'animat erur har bir dam.  
Payg'ambar atadim har zotni, ammo,  
Muridim demadi hech bitta odam.  
1984

\* \* \*

Oh, o'tgan u kunlar qaytmagay zinhor,  
O'chgan muhabbatning yonmog'i dushvor.  
Nigohing qadama qarog'imga sen,  
Unda to'kilmagan ko'z yoshlarim bor.  
1984

## **O'ZBEKISTON BAYROG'I**

Har qanday lashkarning ham  
O'z tug'i, yalovi bor,  
Sen qaysi saltanatdan,  
Sen qaysi davlatdan kam.  
Qo'rg'onlar qatorida  
Bir qo'rg'on san ustuvor,  
Vallamat, tug'dor yurtim,  
Muhtasham Respublikam.

O'ylayman, ha, olamda  
Nisbiy erur ko'p holat,  
Zamona g'alviridan  
Har narsa o'taverar.  
Tarix uchun va lekin  
Kim ham bergay kafolat,  
Yakka inson bir yo'lchi:  
Kelaru ketaberar.

Qadim-qadim zamonda  
Yunonlik haykaltarosh,  
Bir san'at yaratibdi,  
Maqsadi - bir burda non.  
Haykal esa asrlar  
Sinoviga bermish dosh,  
Bugun uni ko'klarga  
Ko'tarar butkul jahon.

Ko'zni kattaroq ochib  
Boqsang bu muammoga,  
Alam qilgulik qadar  
Kam yashar inson zoti,  
Faqatgina xalq sohib  
Bardavom bu dunyoga,  
Asragay har kas nomin  
Faqat xalqning hayoti.

Sanasang hodisot mo'l  
O'zbekning tarixida,  
Har biriga bir noma  
Yoki doston bitgulik.  
Ne zotlar oqmagan bu  
Asrlar arig'ida,  
Har biri bitta xalqning  
G'ururiga yetgulik.

Barchaga ayon erur  
Men aytgan ushbu gaplar,  
To hanuz asablarni  
Ezg'ilar bu shum o'tmish.  
Moziyga o'qtin-o'qtin  
Sochsak hamki g'azablar,  
Lekin ayting, o'zbekning  
Qo'lidan kim ham tutmish?

Bir kuni yovqur shoir  
Ya'ni Turdi Farg'oniy,  
Bo'ltak bo'lgan bu xalqqa  
Birlash deb qildi xitob.



Bejavob qolaberdi  
Uning dardli so'rog'i,  
O'sha-o'sha zamin kar,  
O'sha-o'sha gung oftob.

Bugun zimdan nazar sol  
Sen mana bu bayroqqa,  
Mayliga bir daqiqa  
Unutgin turfa kekni.  
Shu bayroq nomimizni  
Elti yiroq-yiroqqa,  
Shu bayroq birlashtirdi  
Parokanda o'zbekni.  
1984

### **KO'ZGU PARCHALARI**

Ko'zgu parchalari yo'lakda yotar,  
Unsiz sharpalari ruhimga botar.

Yuzlarim aks etar bir parchasida,  
Ko'zlarim aks etar bir parchasida.

Birida osmon aks etsa agar,  
Birida qushlarning raqsi jilvagar.

Olamning yaxlit bir suvratin ammo,  
Namoyon etolmas bu ko'zgu aslo.

Xilqat uning uchun but bo'lmas mangu,  
Axir, parcha-parcha singan ko'zgu bu.

Meni ma'zur tutgin, muhtaram Inson,  
Suvrating chizolmay turibman hayron.

Bir kun fazilating olsam qalamga,  
Bir kun qabihliging yoygum olamga.

Bir kun ko'z yoshlaring qog'ozimdadir,  
Bir kun zaharxandang ovozimdadir.

Bir kun o'tmishingdan faryod solurman,  
Bir kun iqbolingdan o'yga tolurman.

Sening bo'y-bastingni ko'rsatmoq uchun,  
Ko'zgu kerak axir yaxlit va butun.

Shoir yuragi-chi, olamda yakkash  
O'sha chil-chil singan ko'zguga o'xshash.  
1985

## **MENGA HAYOTNI BER**

Sen mening dardimga qilibsana havas,  
Havasing kelibdi shifoxonamga.  
Demishsan: - Yor unga omad har nafas,  
Ayricha iltifot bor bu odamga....

Sen-ku, yovqur Inson, sog' va salomat,  
Tog'larni yiqadi purkkan nafasing.  
Bilmadim, yuz bermish qanday adovat,  
Zaqqum dorularga kelmish havasing.

Menga odam fe'li ayondir bir oz,  
Oshnoman men uning ginalariga.  
Ajabo, bor ekan sendek ishqiboz,  
Doktorning tig'iyu ninalariga.

Ruhimda osoyish, dilimda charog',  
Shifokor ahliga o'qurman tahsin.  
Lekin xitob aylay senga ushbu chog':  
Olgin, dardlarimning olgin barchasin!

Oydin palatalar sengadir tortiq,  
Shiftga boqqaningcha qomating kergil.  
Menga bu hashamlar kerakmas ortiq,  
Menga o'z kulbai xonamni bergil.

Jarroh nashtari ham sengadir nisor,  
Senga, tabobatning jami malhami.  
Menga-chi, bir umr baxsh etsin mador,  
Munis do'stlarimning mehr olami.

Darddan arimasin vujuding hech bir,  
Yo'ldosh niyatingga yetishgin shitob.  
Menga mashaqqatli tiriklikni ber,  
Menga bo'la qolsin mangu shu azob.

Shoir yashamaydi aslo bealam  
Va biron kimsaga istamas balo.  
Lekin o'zgalarning kulfatiga ham,  
Hasad qilganlarga shu tilak ravo...  
1985

## **DIALEKTIKA**

Men hayotni sobit holda ko'rmadim aslo,  
Tuzilgan u agarlardan va magarlardan.  
Deylik, biror firibgarga duch kelgan asno,  
Iboratmi deysan hayot firibgarlardan.

Qattol urush davom etgan elning shoiri  
She'r bitadi hasratga yo g'azabga to'lib.  
Kimki agar biror dardning bo'lsa asiri,  
Tuyuladi butun olam unga dard bo'lib.

Sevishganlar uchun esa dunyo bir jannat,  
Oy-chi, nondek tuyuladi qorni ochlarga.  
Butkul hayot diydasi yo'q tosh erur faqat,  
Kuning qolsa deylik faqat bag'ritoshlarga.

Faylasuflar so'z ochsa gar abadiyatdan,  
O'ylaysizki, har bir onim mangulikka yor.  
Inson zoti ayri tushmas aslo niyatdan,  
Ne tilasang shuni bergay, degan gap ham bor.

Modomiki shundoq ekan tabiat asl,  
Sobit narsa qanday o'zi? Boqiylik qayon?!  
Bo'larmikan bu dunyoda bir murod hosil,  
Tugallikka yetisharmi biror kun jahon!

Shoir ahli kuylarmikan bitta qo'shiqni,  
Bormi ekan bu dunyoda oliy, komron dam.  
Quyosh bir kun chulg'armikan har to'rt ufqni,  
Tug'ilarmi baxti komil, bus-butun odam?

Bu - bir xayol, chorasi yo'q armondir xolos,  
Hamishalik qo'shni erur kunduz bilan tun.  
Yolg'on dasti gar dunyoda bo'lolmas daroz,  
Lekin haqning qo'llari ham emasdir uzun.

Chora bitta: Niyatingni ezgulikka bur,  
Faqat shunda go'zal bo'lib ko'ringay falak.  
Yo'qsa hasrat og'ushida o'tgaydir umr,  
Bamisoli o'ra ichra qolgan kapalak...  
1985

### **HAR QANDAY DAMDA HAM...**

Ko'ngling sovimasin qilar ishingdan,  
Hafsalang so'nmasin hech qachon.  
Ma'no topolmaysan o'z turmushingdan,  
Tussiz, zerikarli ko'rinar jahon.  
Ko'hna objuvozday aylana dunyo,  
Ohangi miyanga sassiz quyular.  
Mingga kirgandaysan o'zing ham go'yo,  
Kelajak o'tmishing kabi tuyular.  
Yashaysan nomi yo'q bir dardga to'lib,  
Tomirdan qoning ham go'yo oqmaydi.  
Nainki do'st so'zi, nainki mahjub,

Bolangning sho'xligi yoqmaydi.  
Sokin kechalari, ayvonda yolg'iz,  
Olis yulduzlarga boqasan to'nib.  
Ular ham ko'zingga ko'rinar bu kez,  
Juda uzoq borsa, yonar qurt bo'lib.  
Shundoq, inson dili ajib muammo,  
Koyima bundayin holati uchun.  
Oo'lingdan kelsa gar madad ber, ammo,  
Har qanday damda ham sen uni tushun.  
1985

### **YOLG'IZ ODAM**

Qiyin, senga, qiyin,  
Juda ham qiyin,  
Salomingga birov alik olmasa.  
Vaqt-soating yetib, o'lganingdan keyin.  
Boshingda bir kimsa faryod solmasa.  
Chindan ham sevmasang yorug' olamni,  
Dildagi arzingni kimga ochursan.  
Balki shu sababdan, jami odamni,  
Ozurda qilishga shoshursan...  
1986

### **VA'DALAR**

Men qo'rqaman Yangi yilga  
She'rlar bitmoqdan  
Qquvchimga yo'q narsani  
Va'da etmoqdan.  
Aytildimi - bajarilsa  
Va'da va tilak,  
Yo'qsa, bir yil ko'zdan yiroq  
Yurmoqlik kerak.  
Va'da berib aytamiz biz:  
Yo'qolgay nifoq,  
Mehnat qilgan katta-kichik  
Bo'lib ittifoq.  
Qarabsizki, qay birovlar  
Ahdni buzgaylar,  
Zum o'tmayin o'zlaricha  
Reja tuzgaylar.  
Va'damizdan o'rin olar  
Albatta vijdon,  
Yangi yilda, deymiz, har kim  
Bo'lgay pokdomon.  
Lekin riyo bir burchakda  
Poylab turadi.  
U ham endi kimlarnidir

Yo'ldan uradi.  
Shuhratparast, lo'ttibo'zga  
O'rin yo'q sira!  
Har birimiz bo'lajakmiz  
Sof va bokira!  
Yangi yilda ana shunday  
Yangrar so'zimiz,  
So'ng yil bo'yi begonadir  
Kimlarga diydor.  
Yangi yil-chi, barchasiga  
Qaragay kulib,  
Kela berar, keta berar  
Ishonchga to'lib.  
Qarimayman, mangu yoshman  
Deganning, biroq,  
Qasamiga bovar qilmas,  
Solmagay quloq,  
Undaylarning ko'zin jindek  
Yoshlab o'tar u,  
Sochlariga bir tola oq  
Tashlab o'tar u.  
1986

### **TO'QAY**

Men demam aslo seni: sho'rlik To'qay,  
Dardlisan, lekin mudom nurli To'qay,  
Chunki sen ozod zamonnini istading,  
Maqsading hurlik edi, hurlik, To'qay.  
O'zbeku totor, qozoq, boshqird bo'lib,  
Ko'rinarsan menga goh turlik To'qay.  
Sen qorong'u kechalar bitding yonib,  
Chiqdi go'rga aslida zo'rlik, To'qay.  
Haq so'zingga millating ko'z tiksa ham,  
Necha zotlar qildilar ko'rlik To'qay.  
Hech ajab ermas Seni yod aylasam,  
Ikkimiz ham bir qiya, o'rlik, To'qay.  
1986, Qozon

### **G'ALATI ZOT**

Yong'oqning tagidan o'tganmi bu zot,  
Na do'stin, na yorin xushlaydi.  
Boshini silasang, shu zahot,  
Qo'lingni tishlaydi...  
1986

### **KEKSA MUHOJIR**

- Nega qadding egik, nega boshing xam  
Nega nigohingni tortadi tuproq?  
- Mening yer ustida tanishlarim kam  
Mening yer ostida do'stlarim ko'proq.  
1986

### **AQL HAQIDA**

Shunchalar go'zalsan, go'zalsan, sanam,  
Ta'rifing bitmoqqa ojizdir qalam,  
Bir yigit umrini obod etarding,  
Aql ham berganda falak bokaram...  
1986

### **QALDIRG'OCH**

Deydilar, qaygadir o't ketsa, albat,  
Chumchuq xas tashirmish, qaldirg'och-chi,  
Balki, bu chumchuqning sha'niga tuhmat  
Yong'in nimaligin, balki, bilmas u...

Sen dunyo holiga nazar sol birpas,  
Nazar sol ko'zlardan oqqan yoshlarga.  
Dunyoda kulbalar yonar har nafas,  
U doim muhtojdir qaldirg'ochlarga.  
1986

### **XUSUMAT**

Dunyoning bori shu,  
Har qanday zot ham,  
Aybin olavermas bo'yniga.  
Balki, shu boisdan, qanchalar odam,  
Tosh solib yuradi qo'yniga.

Xusumat, deydilar ushbuning otin,  
Dastidan yig'inlar, uylar bezovta.  
Bezovtadir hamma oshkor yo botin,  
Azalar bezovta, to'ylar bezovta.

Har holda bo'lmagay qiyomat qoyim,  
Bularning ko'plari quruq savlatlar.  
Yomondir, yomondir, qo'yniga doim,  
Tosh solib yursa gar davlatlar.

Gar ular yursalar kuchin pesh qilib,  
Jim tinglar zaminning dardli na'rasin.  
Mayda toshchalar-ku o'tar, ishqilib,

Uning kattasidan xudo asrasin.  
1986

## **TO'LIN OY**

Keksaygan hilolim, ey sen, to'lin oy  
To hanuz buzursan halovatimni.  
Yodimga solursan endi, hoynahoy,  
Sochlari oqargan muhabbatimni.

Yillarim kechdilar yeldirim misol,  
G'unchalar bag'riga xayolday indim.  
Endi-chi, toliqib, horg'in va behol,  
G'orlarga bekingan shamolday tindim.

Bilmadim, qaydadir yotar sarg'ayib,  
Otashin hislarim o'ralgan daftar.  
Qaysidir go'shada bo'lmishdir g'oyib,  
Bir zamon qo'limdan uchgan u kaptar.

Endi visol o'zga, o'zgadir firoq,  
To'lin oy, o'tinchim yodingda tutgin.  
Bizning tomonlarga yo'ling tushgan chog'  
Mening kulbamga ham mo'ralab o'tgin..  
1986

## **SIZNI UCHRATGUNCHA**

Qay fursat men sizni ko'rdim banogoh  
Endi zarra hijron dilimni g'ashlar.  
Buncha yarashmasa o'zingizga, oh,  
Munis tabassumu ma'yus qarashlar.

Hech kimni hayratga solmas hech qachon  
Mening yoningizda yo'g'im yo borim.  
Yo falak, shuncha yil kezibman sarson  
Sizni uchratguncha, erka dilbarim...  
1986

## **INSON HURMATI**

Soqli ko'ksiga tushsa ham garchand,  
Inson atalmagay masalan, serka.  
Odamlik hurmati shunchalar baland,  
Uni uraberma har nafas yerga.

Buguncha emaklab yurgan shu jujuq,  
Ertan kashf etadi balki dunyolar.

Tiriklik sen bilan barham topmas, yo'q  
Hamisha oqadi oqqan daryolar.

Itqit jaholatni, aqlga yuz tut,  
Bunchalar e'tiqod qo'yma jabrga.  
Bir kuni ko'z yumsang, seni ham el-yur  
Boshida ko'tarib eltar qabrga.  
1986

### **OYBEK HAQIDA QO'SHIQ**

Qalbi pok mardona elning,  
Sen aziz farzandisan.  
Ganju mulkka bergisiz el,  
Gavhari, dilbandisan.  
Har kalimang ma'rifatning  
Ufqida oydek to'lib,  
El aro topding sharaf sen,  
Ustoz Oybek bo'lib.  
Shan hayoting odamiylik  
Xayru soflikdan nishon,  
Chaqnadi she'ringda nurli  
E'tiqod birlan imon.  
Goh Navoiy suhbatingda,  
Goh Torobiy, Yo'lchi goh,  
Sen sevikli davrim o'g'li  
Begumon, beishtiboh.  
Xizimatingdan, hikimatingdan  
Elu yurt mangu rizo,  
O'chmagay, noming asrlar  
So'ngidan bergay sado.  
1986

### **AHMAD ZOIRNI TINGLAB...**

Shoshmagin, ey, karvon, to'xtagin biroz  
So'zlayin ezgulik, shafqat otidan.  
To barpo bo'libdi ko'hna bu jahon,  
Karvonlar oh chekar yovlar zotidan.

Shoshmagin, ey, karvon, to'xtagin biroz  
Ona Sharq sehri bor jihozlaringda.  
Senda yig'lab borar Sa'diy navjuvon  
Rudakiy mehri bor bayozlaringda.

Shoshmagin, ey, karvon, to'xtagin biroz  
Chashmi zilol bo'lib dardingni olay.  
Yo bir yaproq misol bo'lay soyabon,  
So'ngra xazon yanglig' yo'lingda qolay.



Shoshmagin, ey, karvon, to'xtagin biroz  
Umidli bu jahon g'amga bo'lmas g'arq.  
Izingdan termulib qolmay to nolon,  
Qumliklar bag'rida g'oyib bo'lma, Sharq.  
1987

### **ISM HAQIDA**

Xayolimga kelar goh g'alat bir gap,  
Har uni el aro so'ylab yurmasman.  
Bilmadim ne bois, bilmam ne sabab,  
Ismimni birovga ravo ko'rmasman.

Ulug' otdoshlarim maqomi yuksak,  
Men shogird erurman garchand alarga.  
Har nechuk, bir gapni aytmog'im kerak:  
Oson bo'lmagan hech Abdullalarga.  
1987

### **HAZIL**

Ellikda odamlar qirol bo'lishgan,  
Qirol bo'lmaganlar qarol bo'lishgan.  
Aravakash bo'lgan uquvsizlari,  
Shu yoshda boyigan zargarning bari.

Shoirlar shu yoshda dovrug' qozongan,  
Yonsa - so'nggi muhlat - oshiq ham yongan,  
Oh, do'stim, bizlar-chi, nimani ko'rdik,  
Ellikka shunchaki lallayib kirdik.  
1987

### **UQTIRISH**

Unga uqtirdilar,  
Oqni qora, deb,  
Chunki bir qorani,  
Oqlash lozim edi.

Unga uqtirdilar  
Toqni bu - juft, deb,  
Chunki bitta juftni  
Toqlash lozim edi.

Unga uqtirdilar  
Qing'ir to'g'ri, deb,  
Chunki bir qing'irni  
Yoqlash lozim edi.  
1987

## **OROL UCHUN**

Goho miyamizni qoplasa savdo,  
G'alat tasavvurlar xayolga kelar:  
Registon yo'qolib qolsa mabodo,  
Ayting-chi, do'stlarim, ne hol yuz berar?

Ayting-chi, qandayin kunga tushardik,  
Buxoro bo'lmasa, bo'lmasa Xevoq?  
Ular abadiydir deya behadik  
O'tib borayotir umrimiz mudroq.

Shaharlar joyida turibdi bu kun,  
Ularning zavoli kelmas xayolga.  
Merosiy xudbinlik borligi uchun  
Qaramay qo'yibmiz afsus, Orolga.

Otang ketsa agar, ota bo'larsan,  
Onaning o'rnini bosgay qiz, singil.  
Dengizing qurisa ne ham qilursan,  
Qayga bosh urarsan ey, munglug' ko'ngil.  
1987

## **OTALAR ILGIDA ZAMON BILAN VAQT**

Otalar sha'niga loyiq so'z demoq  
Tabarruk bir kitob yozish bilan teng.  
Ularning mehri-ku, bamisli charoq,  
Bag'ri ham yulduzli osmon kabi keng.

Sharqona tashbehni olsam gar yodga,  
Bir nomi buzurgu bir nomi faqir.  
Zaminni kaftida tutib, avlodga  
Bus-butun yetkazgan otalar, axir.

Yuksak-yuksaklarda uchgan sor lochin  
Nazar uzmagandek polaponidan.  
Bardavom naslini asramoq uchun  
Axir ota qavmi kechgan jonidan.

Non, degan farzandning dardli xitob  
Goh uni tiriklay chohlarga tiqqan.  
Bardoshli umrning zaqqum zardobi  
Sochlari qirovdek ko'pirib chiqqan.

Taxti Sulaymondan balanddir beshak  
Ota deb atalgan martabayu baxt.  
Farzand bunyod bo'ldi, o'lim yo'q demak  
Otaning ilgida zamon bilan vaqt.

Men ko'kka termulib kutmasman madad  
Do'st izlab har yonda kezmasman sarson  
Do'stu madadkor ham otadir abad,  
Shoni - shoning erur, armoni – armon.  
1987

### **ESKI QUDUQ**

Hamma biladigan rivoyat buldir:  
Emish Iskandarning bor ekan shoxi.  
Uni yashirolmay sartarosh qurg'ur  
Quduqqa aytibdi, shuldir gunohi.

Yashab kelmoqdaman o'zimga ko'ra,  
O'tgan-ketgan sirdan ko'nglim erur to'q.  
Lekin nedir menga yetishmas sira,  
Balki yetishmaydi u eski quduq.  
1987

### **BEMAHAL QOR YOO'QAN KUNI**

Bul chog'i, bo'stonga ishtiyiq baland,  
Nechundir bemahal yog'a ketdi qor.  
Diktorning bir og'iz e'loni bilan  
Chindan ham qaygadir berkindi bahor.

Bu fursat chamansiz ko'ngillar yarim,  
Bulbulni quvlamang dostonimizdan.  
Sizdan nima ketdi, diktor do'stlarim,  
Qorni kurab qo'ying bo'stonimizdan.  
1987

### **SARHADLAR**

Kimsaga baho berish ilinjida yurganlar,  
Eng avval o'z-o'ziga boqishlari kerakdir.  
Qadimiy bobolar ham ming o'ylab bir degan  
Har kimning go'ri boshqa, azroili bo'lakdir  
Qanchalik ishing bordir hayotim bilan, ey yov  
Seni tangri teppamga posbon qilib qo'ygan  
O'z tushim o'zimga, goh otliqman, goh yayov,  
Men yegan burda nondan sening qorning to'y  
Muqaddas sarhadlar bor insonning hayotida  
Ularni bosib o'tish odamlikka yot erur.  
Qancha-qancha sir yashar har kimning bisoti  
Shul sabab u INSONDIR, shu sabab u ZOT  
Kimga muhabbat qo'yib, kimga nafrat bildi  
Nafas olish singari ixtiyoriy jo'n bir gap  
Afsonaviy devlar u - qo'llarida urto'qmoq,

O'tgan-ketgan bandani o'zicha yurgan tergap.  
Mana bu buloq menga g'oyatda yoqib qolmish,  
Mana bu shabboda ham menga g'oyat alomat.  
Sening esa hushingni, deylik, dengizlar ol  
Yo'lingdan sira qolma, joning bo'lsin salom  
Azizim, dil qasriga beso'roq kira ko'rma,  
Unda qo'sh-qo'sh ilonlar, ajdaholar yotadi.  
Sen birovni toptay deb behudaga ot surma .  
Har kimning o'z quyoshi o'z ufqiga botadi.  
O'z uying, o'z to'shaging o'z-o'zingga buyurib,  
O'z farzanding, o'z yoring bo'laversin seniki  
Xohla tingla xohlama - ketaver qanding ur  
Ixtiyor senikidir, bu she'r esa meniki.  
1987

## **KOMETA**

*Chingiz Ahmarovga*

Har zamon, har zamon Yer yaqinidan,  
Noyob kometalar o'tib qoladi.  
Kimlardir ko'z uzmay nur chaqinidan,  
Ularning suratin oladi.  
Kimlardir payqamas, yo bo'lmas ogoh,  
Ko'p borsa ta'birlar ko'rgan bir tushin.  
Ular qaydan bilsin, kometalar goh,  
Yuz yilda bir marta qaytib o'tishin.  
Nechog'lik g'aroyib manzaradir bu:  
Samoviy nur bilan yo'g'rilgan san'at.  
Somon yo'llarida yugurgan ohu,  
Zuhro jamolidan uzilgan tal'at!  
Yondi yana qachon kelar u qaytib,  
Gohi yuz yil o'tar, ming yillar gohi.  
Yolg'iz u o'tmishdan afsunlar aytib.  
Olis kelajakning bo'lgay guvohi.  
1987

\* \* \*

Taqdir yo'rig'idan roziman ming bor,  
Menga duch ayladi seni ey, nigor.  
Ko'zingda poyonsiz umrimni ko'rdim,  
Sensiz bir lahzaning o'tmog'i dushvor.  
1987

## **XATOLARING KERAK ULARGA**

Shundaylar bor, senga lutf aylab,  
Do'stman, deya qo'lin tutarlar.

Lekin har zum qadaming poylab,  
Xato qilishingni kutarlar.

Xato qilsang, ularga bayram,  
Yo'qsa, zahru zaqqum yutarlar.  
Mayli, jindek, zarra bo'lsa ham,  
Xato qilishingni kutarlar.

Xatolaring kerak ularga,  
Shox-novdangni darhol butarlar.  
Tag'in kunni ulab tunlarga,  
Xato qilishingni kutarlar.

Axtarurlar hamisha illat,  
Yetti pushting go'rin titarlar.  
Faqat unma, ulg'ayma faqat,  
Xato qilishingni kutarlar.

Ular senga bir umr yo'ldosh,  
Sodiq hamroh kabi o'tarlar.  
Qabring uzra egasalar ham bosh,  
Xato qilishingni kutarlar.  
1987

## **SOBITLIK**

O'chib borayotir qanchalar kalom,  
Ne-ne bitiklar ham yo'qdir, vassalom  
Dunyoda faqat bir sobit suxan bor:  
U o'z farzandingga o'zing qo'ygan nom.  
1987

## **KO'RDIM**

Soddadil odamni juda kam ko'rdim,  
Borin ham shikasta, ko'zin nam ko'rdim  
Dunyoda firibgar ko'p ekan, lekin,  
Ularning barchasin shod-xurram ko'rdi  
1987

## **EL QO'LLASA**

El qo'llasa, azizim, omon bo'lsak, aja  
Qo'llamasa - rang-ro'yi somon bo'lsak,  
Elni bizdan qizg'anib so'z aytguvchi zo  
Ular uchun bir umr yomon bo'lsak, ajabm  
1987

## **GURUHBOZ**

Bitta o'zi pashshani ham yiqolmaydi,  
U joyga ham bitta o'zi chiqolmaydi.  
Qayga borsa atrofiga sherik to'plar,  
Yo'qolsa ham bitta o'zi yo'qolmaydi...  
1987

\* \* \*

Yiroq bo'l hasratdan, mungdan, ko'zyoshdan,  
Sha'ningga otilgan ta'nadan, toshdan.

Mag'rur tursang agar, mag'rur degaylar,  
Mutelik izlarlar fe'li yovvoshdan.

Yupanch topoldingmi, dunyoga kelib,  
Ustoz yo shogirdan yoki tengdoshdan.

Qashqir to'dasida qolgan bir otsan,  
Tuyog'ing sinmasa basdir, bardoshdan.

Faqat muhabbatga topingil, ey qalb,  
Sen mehr ko'rgaysan o'shal quyoshdan.

Axir bobolar ham demishlar qadim:  
Muhabbat yaratgan dunyoni boshdan.  
1987

\* \* \*

Bahor kelayotir,  
Toza, musaffo.  
Moviy kengliklarda o'ynaydi shamol.  
Daralar qo'ynida zangor bir havo,  
Tumanli shahr ichra yotmoqlik malol.

Qoyalar ko'ksida shodmon, beqayg'u  
Oniy umri bilan sollanar chechak.  
Bahor - eng pokiza shabbodadir bu,  
Bahor - eng toza bir shamoldir demak.

Kengliklar bag'riga uraman o'zni,  
Ko'zimga ko'ringay dilbar diyorim.  
Go'dak nafasidek yupatar yuzni  
Qish bo'yi intizor kutgan bahorim.

Bahor-ku o'tadi shamoldek shitob,  
Mayli o'tajak u va o'tar bo'lsin.  
Azizim, umringda havo bo'lsin sof,  
Umring shamollari muattar bo'lsin...  
1987

## **HAR NECHUK...**

Dunyoda har kimning bor o'z matlabi,  
Tuya so'rab bo'lmas echkiboqardan.  
Pisimiqdan faylasuf chiqmagan kabi,  
Haqgo'y ham chiqmaydi betgachopardan.

Kim o'zar o'ynasang toshbaqa bilan,  
Bo'yningga olursan unga tenglikni.  
Dunyoning ishlari shunaqa ekan,  
Har nechuk odat qil fe'li kenglikni.  
1987

## **TURG'UNBOY**

Ish axtarib Turg'unboy  
Necha kunki sarsondir.  
Omadining teskari  
Yurishidan hayrondir.

Yo'qsa, bajo qilingan  
Barcha tartib-qoida!  
Hujjatlari bir talay,  
Propiska joyida.

Qayga borsa keling, deb  
Xushnud qarshi olishar.  
Lekin suhbat so'ngida  
O'ylanishib qolishar.

- Afsus, afsus, - deyishar,..  
Tag'in bir oz kutgaysiz,  
Va'da bergan bo'lsak gar  
Bizni ma'zur tutgaysiz.

Ish axtarib Turg'unboy  
Necha kunki sarsondir.  
Omadining teskari  
Yurishidan hayrondir.

Turg'unboyga shum taqdir  
Sira shafqat qilmaydi.  
Pora beray, der, ammo  
Usulini bilmaydi.

Tik turganacha boshliqqa  
Shikoyatin so'zladi.  
Ko'rgan-kechirgan barcha  
Hikoyatin so'zladi.

Dedi: - Aybim nimadir,  
Bilolmayin hayronman.  
Shu mushkulning chorasin  
Qilolmayin hayronman.

Boshliq uzoq o'yladi,  
Hujjatlarni varaqlab.  
So'ng xazina topganday  
So'z boshladi charaqlab:

- Hujjatlar-ku joyida,  
Tuppa-tuzuk jismingiz.  
Faqat bir gap: bizlarga  
To'g'ri kelmas ismingiz.

Afsus, qayta qurishning  
O'tmabsiz yo'llarini.  
Turg'un ismi eslatar  
Turg'unlik yillarini.

Turg'unboyning nogahon  
Yorishdi o'ksuk dili.  
- Bor-yo'q aybim shumi, - deb,  
Kalomga keldi tili.

Dedi: - Nainki ismim,  
Olamdan ham tonurman.  
Ismim Turg'unboy emas,  
Mayli, Urg'unboy bo'lsin.

Urg'unboyga munosib  
Vazifani topdilar.  
Turg'unlikning yana bir  
Sahifasin yopdilar.

Majlislarda endi u  
Fursat poylab turadi.  
Ur, desa bas, Urg'unboy  
Duch kelganni uradi.  
1987

\* \* \*

Bir vaqt boshoq edim, qirlarda o'sdim,  
So'ng yaxlit don bo'lib qo'lingga tushdim...  
Keyin-chi, tashlading tegirmonga sen,  
Taftingda un bo'lib turibman, do'stim.  
1987



## **BAXTLI ODAM**

Tashvishga chulg'anib qoldi bu yurak,  
Tashvishlar ko'paydi haddan ziyoda.  
Beshigida yotgan go'dakdan bo'lak,  
Tugal baxtli odam yo'qdir dunyoda.  
1987

## **MARD BO'LSANG**

Qadimdan bir gapni uqdirar hayot:  
Mard bo'lsang, o'z to'g'ri yo'lingdan qolma.  
O'ladigan bo'lsang o'z go'ringda yot,  
Birovning mozorin egallab olma.  
1987

## **TAASSUROT**

Tabiat kimga ko'p yo oz beribdi,  
Kimgadir xalacho'p yo soz beribdi,  
Vo ajab, mana bu mashshoq gadoyga  
Tengi yo'q shohona ovoz beribdi.  
1987

\* \* \*

Har gal ayyomlarni aylarman tavob  
Garchand biri moddiy, o'zgasi sarob  
Sho'rlik ona zamin birlikka zor-ku  
Unga talpinish ham, demak, zo'r savob.  
1987

\* \* \*

Oqshomdan boshlangay odatda tonglar  
Sukutdan uzilgay gulduros, bonglar  
Boshing egma sira, xoksor banda,  
Erta ruhing topgay oliy ohanglar.  
1987

\* \* \*

May asli pokdomon dilga arziriklik,  
Zahmatkash, mehnatkash elga arziriklik  
Bayram-ku, har kuni kelavermaydi.  
Lekin zavqi qolar yilga arziriklik!  
1987

## **UMR**

Inson tug'iladi asli belibos,  
Bir parcha et bo'lib kelar jahonga,  
Libosu hashamdan bo'lgay u xalos,  
Ketar chog'ida ham so'nggi makonga.

Lekin o'rtadagi umr-chi, umr...  
O'chmas tamg'a bo'lib qolgay to abad.  
Balki yog'ar unga rahmat degan nur,  
Balki ko'mar uni malomat, nafrat.  
1988

### **O'G'LIM ILHOMJONGA**

Umr o'tayotir,  
Hushyor bo'l, bolam,  
Endi qaqshayotir otang asabi.  
Malol kelayotir hatto baytlar ham  
Omocho tortayotgan qo'sh ho'kiz kabi.  
Tashqarida sekin qoraymoqda kuz,  
Barglarni zil havo kelmoqda bosib  
Tomay-tomay degan tomchiday yulduz  
Mening ruhiyamga g'oyat munosib.  
Nimani ko'rdim men yorug' dunyoda,  
Nahot shuncha og'ir tiriklik ishi.  
Dardim yetmaganday, undan ziyoda  
Jajji opalaring cheksiz tashvishi  
Yolg'izlik, nadomat, og'riq, xusumat  
Umr yo'llarimni burjga tiqdilar.  
Taqirda o'stirgan edim bir daraxt  
Mevamni terdilar, so'ngra yiqdilar  
Charchoq yengayotir, unutma bolam,  
Ehtiyot boq endi o'ngu hushimga.  
Orom olsam agar, niyat qil har dam  
Yorug' kunlar kirsin mening tushimga.  
1988

### **MALAK**

Nechun o'g'irlading o'yu fikrimni,  
Nechun xayolimni aylading sarson.  
Endi men bilmasman borar yerimni,  
Endi tuyg'ularim qoldi sargardon.

Seni ko'rgandayman tushimda faqat,  
Uchib o'tgandaysan misoli yulduz.  
Samoviy mo'jiza, ilohiy tal'at,  
Tengi yo'q bir malak, qoshlari qunduz.

Nasib etarmikan biror kun visol,  
Nasib etarmikan tutmoq qo'lingni.  
Va yo noshud qolgan munajjim misol,  
Poylab o'tarmanmi qaytar yo'lingni...  
1988

\* \* \*

Soch ham to'kilmoqda, omonatdir tish,  
Izg'irin yurakka urayotir nish,  
Bahorim beto'xtov qish tomon o'tdi,  
Yoz, kuzni qisqartdi mashaqqat, tashvi  
1988

## **BIZ**

Biz avval ham yomon edik, hanuz yomonmiz,  
Rahmon boqmas, iblis yoqmas sho'rlik inson  
So'z so'zlasak - mahmadona, jim tursak - soz  
Shu tariqa, na bug'doymiz va na somonmiz.  
1988

## **TARAQQIYOT**

Hozir gadolar ham g'oyat mukammal,  
Ishni diplomatik yo'ldan boshlaydi.  
Egasidan u-bu so'rashdan avval  
Itiga, albatta, suyak tashlaydi.  
1988

## **GAP BITTA**

Parvo qilma, bo'lmaganni bo'ldiramiz,  
Paymonasi to'lmaganni to'ldiramiz.  
Bir zamonlar otar edik, osar edik,  
Endi esa majlis qilib o'ldiramiz.  
1988

## **O'ZIMIZ**

Sen bizni kechirgin, ey Navro'zimiz,  
G'aflatda chalg'idi ul kun ko'zimiz.  
Yuzingga shapaloq tortib yubordik,  
Sho'rpaxta bosamiz endi o'zimiz.  
1988

## **DO'RMONDA KUZ**

Bog'imda mushuklar qoldirgan edim,  
Daydib ketibdilar bechoralarim.

Barglarin to'kmoqda daraxtlar qadim,  
U bilan to'kilar ezgu dardlarim.

Senga salom deyman so'ng bor, behijon  
Endi yerga yotding, soyabonim barg.  
Nechun o'ksik qolding, chinor, jonajon  
Bog'larga nahotki keldi bodi marg.

Arg'uvon gullardi bu yerda abad,  
Bu yerda kuylardi azal bulbullar.  
Qushlarim, siz bizni tark etmang minut  
Tag'in ochilingiz bizning ey, gullar.

Sira ko'z tegmasin qizg'in ulfatga,  
Qishda ham yashnaylik samoviy oydek.  
Sizni taklif etar she'riy suhbatga  
Mirtemir, Shayxzoda, albatta, Oybek.  
1988

## **QUSH TILI**

1

Bo'ron, sen sham uzra guvlayverma, bas,  
Arslondek o'kirib chekaverma sas.  
Shamni o'chirmoqlik juda ham oson,  
Unga yetar bitta "puf" degan nafas.

2

Fe'lini kuzatib sodda bolamning,  
Tashvishin o'ylayman chigal olamning.  
Soddalik yaxshi-ku, lekin ko'pincha  
Ishi yurisharkan qitmir odamning.

3

Qushlarning tilida faqat bir oyat,  
U inson uchun ham ibratdir g'oyat.  
Qushlar der: . Iloyim, qafasga tushma,  
Tushgan bo'lsang gar, chiqqil nihoyat.

4

Bir hazil to'qidim bugun senga deb,  
Chaqaloq yig'laydi nega .inga. deb.  
Inga-inga. sining ma'nosi shulki,  
Da'vo qilayotir .menga., .menga. deb.

5

Mayliga, raqibing bo'lsin har nima,  
Nazar sol hattoki yetti qat yerga,

Qiyos topilgaydir o'tgan umrga:  
Oltinga aylangan yaxshilar xoki,

7

Bir dono bazmining guvohi bo'ldim,  
Shodumon davrada o'ynadim, kuldim.  
Bazmining boisin so'rasam, dedi:  
- Bugun men nodondan qochib qutuldi

8

Azaliy haq gapni yashirmoq nechun  
Zavol yo'q eng asl iste'dod uchun.  
Agarda koinot tegirmon bo'lib,  
Olamni yanchsa ham, qolgay u butun.

9

Eski alifboni dilga qilsang jo,  
Mana bu hikmatni unutmang aslo:  
Egri niyatiyu yuvuqsiz qo'lni  
Sira yoqtirmaydi o'sha alifbo.

10

Xalqim deb yugurar hovuchlab jonin,  
Xalqiga bag'ishlar shuhratin-shonin.  
Lekin shu chopishda keta-ketguncha,  
Tozalab boradi xalqning hamyonin.  
1988

### **ENG QULAY JAVOB**

- Bilaman, dunyoning bor baland-pasti,  
Bularsiz yuksalish bo'lmagay asti.  
Lekin, ey faylasuf, menga javob ber,  
Nechun yaxshilikning qisqadir dasti.

Xayoling behuda gap bilan banddir.  
Eng oddiy jumboq ham senga kamanddir.  
Mayli, qulog'ingga aytay, ey shoir,  
Chunki yomonlikning qo'li balanddir.  
1988

### **IRIM**

*(Hazi)*

Kim nimani aylasa armon,  
Qo'msab kelgan o'shani azal.  
Ataganlar qizni O'g'ilxon,  
Bu - o'g'ilga ishora, masal.

Hozir mehr bulog'i tindi,  
Bu holni ham irimga yo'ying.  
Qizlaringiz tug'ilsa endi,  
Nomlarini Mehrixon qo'ying.  
1988

### **TOQAT**

Bozordan tutoqib qaytar uyga chol,  
Go'sht qayda? Yog' qani? Va'da so'zdami?  
Kampiri xo'rsinib yupatar darhol:  
- O'kinmang, taqchilik faqat bizdami?

Yonboshlab gazeta varaqlaydi chol,  
To'polon chiqibdi zavod, Vuzdami.  
Kampiri yupatar surgan cha xayol:  
- O'ylamang, janjal ham faqat bizdami?

Oqshom televizor ko'rayotib chol  
Birdan sapchib tushar. Esi o'zdami?  
- Davlatga tosh otdi kimdir bemalol  
Kampiri yupatar: faqat bizdami?!

Toqatim toq bo'ldi, deydi endi chol,  
Toqat yurakdami? Toqat ko'zdami?  
Kampiri yer chizib shivirlar behol:  
Chidang-da, toqat ham faqat bizdami?!  
1988

### **GO'ZALLIKNI YO'QLASH**

Yuzlaringda ajin, sochlaringda oq,  
Yelkangdan yuk bo'lib bosibdi yillar.  
Quralay ko'zlarda tubsiz bir charchoq,  
Bekor gap, kim desa: yoshdir ko'ngillar.  
Bir vaqtlar nomingni eshitgan zahot  
Yonardik o't ketgan kabi to'qayga.  
O, hissiz tabiat, shafqatsiz hayot,  
Shunday go'zallikni bekitding qayga?  
1988

### **TASKIN**

Atir hidi bilan borma mozorga,  
Bormagin u tomon kiyinib bashang.  
Alam qilar yotgan har bir xoksorga,  
Ularning xo'rliqi oshadi, bilsang.

Axir ko'ngillari ularning yarim,  
Axir, aslo o'lmas hayot degan o'y.  
Degil: . Havas qilmang, birodarlarim  
Bir kun yoningizga kelurman, deb qo'y.  
1988

## **BU YO'LLAR**

Bu yo'llar xayoldek bilmas intiho,  
Shoshilar o'zining manzilotiga.  
Bu yo'llar eltadi na Makka, na yo  
Birlashgan Millatlar Tashkilotiga.

Bu yo'llar dunyoni tinmay aylanib,  
Intilar sirli bir ko'ngil qulfiga.  
Axiyri tasmadek qolar boylanib  
Seningdek go'zalning qora zulfiga.  
1988

## **E'TIQOD**

### ***(Shu kunning rivoyati)***

Mahshar yaqin qoldi,  
Qiyomat yaqin,  
Ota bilan o'g'il bir-biriga yov.  
Samovot boshida chaqsa ham chaqin,  
Hech kimsa hayiqmas, qo'rqmaydi birov.

Og'izda bol kabi turgan bu til ham  
Zaharga aylangan, nishga aylangan.  
Dilbarlar chashmini kuylagan qalam  
Ko'zlarni o'yishga endi shaylangan.

O'g'lim libosimni burdalab ketgan,  
Tavba, deb ushlashga qolmagan yoqa.  
Malomat pichog'i suyakka yetgan,  
Qalqonlar teshilgan, otlar betaqa..

O't bosgan qabrning tepasida chol  
G'arq bo'lib turardi shundoq o'ylarga.  
Dam-badam o'tmishga eltardi xayol,  
Eltardi kurashlar, aza, to'ylarga.

Qabrdan bir ovoz chiqdi-ku, shu choq,  
Hazin va g'azabnok, dardli, shiddatkor:  
Mahshar yaqin emas, qiyomat uzoq,  
Hamma balolarga o'zingsan aybdor.

O'g'lingga topilgay qilichu qalqon,  
Taqlab bergaysan bir kun otini.  
Sizlar chi, bir kun to'q, bir kun yupun  
Tashvishingiz yo'qdir vujuddan bo'lak

Tindi iztirobli qabrning sasi,  
Nima bu? Ro'yomi? Vasvasmi? Gumon?  
Chol endi, ichiga tushib nafasi  
Ketdi, uyigamas, raykomga tomon.  
1988

## **MAYMUNIYAT**

Turib-turib maymun bir kun boshin qashladi  
Va maymuniy rejalarni tuza boshladi.  
Dedi: - Shukr, o'lib ketmish Gulxaniy bobo  
Demak bizning davrimiz ham kelmish mutlaqo.  
Krilov ham marhum emish allaqachonlar,  
O'zimizga qolgan demak endi zamonlar.  
Ne qilsak ham qo'limizda inon-ixtiyor,  
Bizning yo'lni to'solguvchi endi kim ham bor  
Shundoq deya maymun shirin o'ylarga bordi,  
So'ng tavakkal... shoirlikni boshlab yubordi  
Maymunona fikrlardan nazm tizdi u,  
O'rmon bo'ylab kecha-kunduz izg'ib kezdi u.  
Qarasaki ishlar tuzuk, ilhomlar ravon,  
Mushugini .pisht. demaydi, birorta hayvon  
Madaniyat sohasida kerak bo'lar der,  
Uni bir kun qabul qildi hatto janob sher.  
Siylandi u, ibrat uchun unvon berildi,  
Maymun esa kerilgandan endi kerildi.  
Hayvon zotin mensimayin qo'ydi u butkul,  
Biz maymunlar, deb boshlardi nutqini nuqul  
Lablarida kamtarona bir mamnuniyat,  
Derdi: - Olam gultojimiz biz maymuniyat,  
Oh, insonlar. Qilolmasman ularga toqat.  
Shu borada maymun chora izlardi faqat.  
Oxir o'ylab maymun topdi shundoq naqlni:  
Insonlarning orasida Darwin, aqlli,  
Toping uni. Ulug' olim bizni alqagan,  
Gulxaniy ham, Krilov ham bizdan tarqagan.  
1988

## **BOR GAP**

Qanchalik iroda, qancha kuch kerak,  
Maysani toptamay o'tmoqlik uchun.  
Qanchalik iroda, qancha kuch kerak,  
Farzanding gunohin yutmoqlik uchun.



Qanchalik iroda, qancha kuch kerak,  
Noravo Vatanni sevmqlik uchun.  
Qanchalik iroda, qancha kuch kerak,  
Noraso elga so'z demoqlik uchun.

Bularning baridan bo'lmoq-chun xalos,  
Ikki gaz arg'amchi yetgaydir, xolos.  
1988

## **TARAQQIYOT**

Ovchilar maqtangan qadim zamonda  
Bo'za va nosvoyning kayfini surib:  
- Falon yil, falon payt, falon dov  
Eng katta olqorni olganman urib.

Eng yuksak cho'qqini zabt etgan sayyoh  
G'urur bilan degan o'lganga qadar:  
- Aziz nabiralar, siz bilmaysiz, oh,  
Men o'sha cho'qqida quchganman zafar.

Me'morlar ham yashar asrma-asr,  
Ularning faxri ham shundan iborat:  
- Men bunyod etganman eng yuksak qasr  
Mening ijodimdir eng zo'r imorat.

Taraqqiyot ekan, zamonlar kelib,  
Orzu bosib ketdi butun olamni.  
Hozir maqtanishar: - Qo'yingiz biling  
Men badnom qilganman eng zo'r Odamni.  
1989

## **BEGONALIK**

Yoy o'qi kamondan qochadi yiroq.  
Tog'lardan qochadi daryo va buloq.

Bulutlar bag'ridan qochadi yomg'ir,  
Sukunatdan qochib shamollar sang'ir.

Nafis chechaklarning xushbo'y atri ham  
G'unchalar qo'ynidan qochar damodam.

Har to'lqin bo'shliqqa quchog'in ochar,  
Vahshiy qoyalarga bosh urib qochar.

Burgut panjasini yerdan uzgan on,  
Tovushqon qochadi butazor tomon.

Ogoh bo'lsang agar olam siridan  
Dunyolar ham qochar biri-biridan.

Shu taxlit yashaydi buyuk koinot,  
Manzilin topolmas idroksiz hayot.

Yiroq yiroq tushsa insondan inson,  
Bu holning sharhiga ne deysan, ey jon!

Ona farzandiga quchog'in ochsa,  
Farzand-chi, onadan ming farsah qochsa.

Oochsa bir-biridan o'g'il ham padar,  
Yodini unutmagan telbalar qadar.

Qovushmasa insof, ezgulik, sabot,  
Men buning sababin bilmasman, hayhot.

Tafakkur basharga garchi yalovdir,  
Nechuk odam qavmi odamga yovdir.

Javob berar bunga na yer, na osmon,  
Na Budda, Na Zardo'sht, na Injil, Qur'on.

Endi bandalarga o'zing qil shafqat,  
Ey oliy joziba - Sirli Muhabbat!  
1989

### **TOVLAMACHI KIMSALARGA**

Har bir tashabbusning bor o'z zamoni,  
Yaxshi tomoniyu yomon tomoni.  
Zamondan orqada qolib ketmay, deb  
Shirkat tuzib olmish gala mo'ltoni.

Ular ostonangda yotib olarlar,  
O'ligin yelkangga ortib olarlar.  
Tilagan narsasin bersang berding-ku,  
Bermasang, ko'plashib, tortib olarlar.  
1989

### **SHOIR (Hazi)**

E'lon ossang agar biror shaharda,  
Esi butun odam kerak deb shu on.  
Taloto'p bo'lgandek ro'zi mahsharda,  
Yopirilib kelardi odamlar g'ujg'on.

E'lon ossang agar shaharda shu kun,  
Jununvash, devona kimsaga doir.  
Tarqab ketar edi qolganlar, butun,  
Faqat qolar edi "U men", - deb, shoir!..  
1989

### **YOLG'IZ ASKAR**

Botir ko'krigidan o'q yedi bir kun,  
Vo, orqam! - dediyu tortdi cho'ng na'ra.  
Yov taraf so'radi: - Orqam, deb nechun  
Oh chekding, ko'ksingdan ochdik-ku yara.

Botir shivirladi: Men - yolg'iz askar,  
Yo'qsa, ustimga ot sololmasdingiz.  
Orqamda do'stlarim bo'lganda agar  
Ko'ksimni nishonga ololmasdingiz.  
1989

### **OXIRAT**

Nimadandir g'ashdir ko'ngillar,  
Tikanakka burkanmish gullar.  
Boqqa nogoh adashib kirsang,  
G'azab bilan sayrar bulbullar.

Oonga to'lmish Mirrixning ko'zi,  
Ummonlarning sachraydi tuzi.  
Allaqachon bol tommas tildan,  
Shoirlarning zaqqumdir so'zi.

Yo'lga boqsang ko'ringaydir jar,  
Go'daklarning tushida ajdar.  
Tuni bo'yi yigitlar bedor,  
Yostiqlarin tagida xanjar.

Bilib bo'lmas \_ kimda bor imkon,  
Olag'ovur mahshardir zamon.  
Ne qilarin bilmay hayratda  
Dengiz kabi qalqir olomon.

Xabar bordir na do'st, na yordan,  
Na do'stu yor, balki, diyordan.  
Yolg'iz Hazrat mehrob qoshida  
Madad tilar parvardigordan.  
1990

### **BAXTSIZ FARISHTA**

Ma'sum farishtalar - go'daklar bari  
Bulutlar ustida uchib yuribdi.  
Jannatning hayotbaxsh shabbodalari  
Parquv qanotlarin yelpib turibdi.  
Kunlari kechardi baxtli va shodon,  
Abadiy rohatga barchasi noil.  
Faqat bir farishta yashardi nolon,  
Faqat bir farishta qayg'uga moyil.  
Sira yozilmasdi ko'ngil chigili,  
Munglig' ko'zlarida dunyoviy alam.  
Taskin berolmasdi behishtning guli,  
Taftin bosolmasdi kavsar suvi ham.  
Bir kun so'radilar: - Ma'yussan nechun  
Axir sen - begunoh, sen yaxlit savob!  
Bolakay farishta uh tortdi uzun,  
So'ng sekin shivirlab, ayladi javob:  
- Meni ota-onam ketgandi tashlab,  
Do'zaxda yonmoqda ular beomon.  
Shul sabab g'amginman, ko'zimni yoshlab  
Ularga tilayman shafqat va imon.  
1990

## **YULDUZ QAZOSI**

Qazo qildi ko'kda bir yulduz,  
Koinotda aza ochildi.  
Uzoq-yaqin dunyolarning o'z -  
Ta'ziya toshlari sochildi.

Qora kiydi bir nafas quyosh,  
Mung'aygancha Oy qaltiradi.  
Zuhra yulduz berolmay bardosh  
Ko'zlarida yosh yaltiradi.

Ular kimga dillarini yorar,  
Cheksiz zulmat o'ngu so'lida.  
Tobutni jim ko'tarib borar  
G'uj bo'lgancha Somon yo'lida...  
1990

## **YURAGIMNING TUBIDA BIR NOM**

Yuragimning tubida bir nom,  
Takrorlayman ohista:  
Niyatingga yetib yur mudom,  
Ko'z tegmasin senga, Shohista.

Men shoirman, forig' qil aybdan,  
Bayon etsam ko'ngil maylini.

Ajab emas, Alisher g'aybdan  
Ko'rgan bo'lsa senda Laylini.

Ismin yozsa chaqnasin qalam,  
Bosgan izing gullarga to'lsin.  
Seningdayin pariroy sanam  
Bir Majnunga muborak bo'lsin.

Yuragimning tubida bir nom,  
Takrorlayman uni ohista.  
Niyatingga yetib yur mudom,  
Ko'z tegmasin senga, Shohista.  
1990

\* \* \*

Turfa tuyg'ularni xush ko'rdim g'oyat,  
Dunyoning o'zi ham rangin nihoyat!  
Boqma ajablanib satrlarimga,  
Baxtim rivoyatdir, g'amim hikoyat...  
1990

### **SABABLARI QIDIRILMOQDA**

Odamlar och,  
Kolbasa lekin  
Kuchuklarga yedirilmoqda.  
Sharh etamiz bu holni sekin:  
Sabablari qidirilmoqda.  
O'ldirmoqda aka-ukani,  
Oilalar yemirilmoqda.  
Sababini kim aytar, qani?  
Sabablari qidirilmoqda.  
Samolyotni opqochdi birov,  
Norozilik bildirilmoqda.  
Javobimiz tayyordir darrov:  
Sabablari qidirilmoqda.  
Yer yuzidan katta bir davlat  
Shitob bilan sidirilmoqda.  
Biz-chi majlis qilamiz faqat:  
Sabablari qidirilmoqda.  
1990

\* \* \*

Dunyoning g'alati yo'rig'iga boq,  
Kimga aysh tashnayu kimga dor mushtaq  
Lekin hammasidan ma'no bittadir:

Qurbon oldin ketar, jallod keyinro  
1991

\* \* \*

Shudgorda qarg'alar to'dasin ko'rsang,  
Sira ajablanma, bo'lma hangu mang.  
Sen yerni ag'darib, shudgor qilgan chog'  
Yuzaga chiqqandi qurtu chuvalchang.  
1991

\* \* \*

Bahor! Sendan xushnud jami kor ahli  
Xususan shod erur xoksor ahli.  
Chunki tashrifingdan dil erib, zora,  
Odamga o'xshasa amaldor ahli.  
1991

\* \* \*

Bolaga o'xshaydi, deydilar xalqni,  
Bu gapni aytganlar, ehtimol haqdir.  
Lekin takrorlayman men ham bir haq  
Axir, bolalarning o'zi ham xalqdir.  
1991

\* \* \*

Har gal ayyomlarni aylarman tavob,  
Garchand biri moddiy, o'zgasi sarob.  
Sho'rlik ona zamin birlikka zor-ku,  
Unga talpinish ham, demak, zo'r savob!  
1991

\* \* \*

Tabiat kimga ko'p yo oz beribdi,  
Kimgadir xala cho'p yo soz beribdi.  
Vo ajab, mana bu mashshoq gadoyga,  
Tengi yo'q shohona ovoz beribdi.  
1991

\* \* \*

Ranjima toleing kulmasa agar,  
Inson borin ko'rar, o'lmasa agar.  
Shoir ham ijoddan qolmagay aslo,  
Nogoh paymonasi to'lmasa agar.  
1991

\* \* \*

Qah-qah urar bo'lsam, vijdonimdan me  
Mehnatim evazin so'rab olurman.  
Benaf o'tgan damlar, men sizning uchun  
Hayhot, qabrimga ham yig'lab borurma  
1991

## **ERK HAQQI**

Qadimiy bobo yurtim,  
Outlug' bo'lsin yaloving,  
O'ylay-o'ylay tashlagan  
Qadam muborak bo'lsin.  
Tag'in gurillab yongay  
O'chmagan qalb oloving,  
Erk haqqiga ichilgan  
Qasam muborak bo'lsin.  
Kimsaga yomonlikni  
Ko'rmagansan hech ravo,  
Lekin shum qutqulardan  
Chiqmadi sho'rlik boshing,  
Endi seni qo'llasin  
Zafar o'zi doimo,  
Safaring bexataru  
Xizr bo'lsin yo'ldoshing.  
1991

## **FOJIA**

Baxtlidir, o'z davrin zavolin ko'rmay  
Yo'qlikka ravona bo'lolgan inson.  
Baxtlidir, yanglishib ekkani o'rmay,  
Shudgorin qaytadan boshlagan dehqon.

Mo'ysafid jangchiga qarayman g'amgin  
Ko'ksida nishonu ko'cha-ko'yda xor.  
Unga na o'tmishi berolgay taskin,  
Va na kelajakdan zarra umid bor.

Nahot o'tgan umr butkul havoyi,  
Nahot ko'rganlarin barchasi sarob.  
Nahot yetmish to'rt yil sig'ingan joyi  
Manfur manzil bo'lsa, jirkanch va xarob.

Avliyo degani - yovuz jodugar,  
Dohiy deganlari - kallakesar zot.  
Nabirang o'zingga tutsa og'u gar,  
Dardingni kimga ham degaysan, hayhot.

Shahid ketmasmidi o'sha jang chog'i  
Fidoyi bir askar nomini olib.  
Bugun na qalqon bor, na bor yarog'i,  
Mag'lubdan sadaqa so'raydi g'olib.

Olamda fojia ko'p erur, biroq,  
Bunisin alami haddan ziyoda,  
Oh, nechog' dahshatdir, tirik turgan cho  
Umring oyoqosti bo'lsa dunyoda...  
1991

## **HAYOT SABOQLARI**

Ikki og'a-ini yovlashdi bir kun,  
Ikkovlon sig'madi bitta makonga.  
Nainki bir makon, tor bo'ldi ochun,  
Ketdi ikkisi ham ikki tomonga.

Oylar, yillar o'tdi oradan qancha,  
Axir bir-birlarin topdilar omon.  
Titroq yelkalarga boshin qo'ygan  
Ho'ng-ho'ng yig'lashdilar go'daklarsimon.

Xo'sh, nima bo'libdi, dersiz, albatta,  
Kammi bu dunyoda ahil, noahil.  
Lekin, nahot deyman, faqat kulfatda  
Namoyon bo'ladi muhabbat asl.

Anglamoq istayman bu holning sirin  
Boqib atrofimga men gohi onlar.  
Bunda ko'rib tursa ular bir-birin  
Balki yeb qo'yardi allaqachonlar...  
1991

## **VAFO QILURMISAN, BAHORIM**

Ruhimda yo'qoldi qarorim,  
Tanimda qolmadi madorim.  
Bizlarni bir yo'qlab kelibsan,  
Vafo qilurmisan, bahorim?!

Yoz o'tdi, kuz o'tdi, qish o'tdi,  
Boshlardan sinovli ish o'tdi.  
Yurakka izg'irin - nish o'tdi,  
Vafo qilurmisan, bahorim?!

Yam-yashil qirlarni sog'indim,  
Chechakzor yerlarni sog'indim,



U inja sirlarni sog'indim,  
Vafo qilurmisan, bahorim?!

Lolaning lablari xandadir,  
Dog'i ham tubida - andadir.  
Qxshashi ruh ila tandadir,  
Vafo qilurmisan, bahorim?!

Intiqmiz do'st bilan, yor bilan,  
She'r bilan, soz bilan - tor bilan,  
Diydorlash bizningdek xor bilan,  
Vafo qilurmisan, bahorim?!  
1991

**(Turkum)**  
**KA'BATULLOH**

Hanuz biri ikki bo'lmagan eldan  
Keldim, madad bergil, yo Ka'batulloh.  
Bag'ri xun, tolei kulmagan eldan  
Keldim, madad bergil, yo Ka'batulloh.

Bir zamon uning ham bo'lgan qudrati,  
Dunyoni yoritgan zehni, fikrati.  
Hatto qirg'oqlarni buzgan shiddati,  
Keldim, madad bergil, yo Ka'batulloh.

Tegirmon toshidek aylandi taqdir,  
Karvonlar to'zg'idi, sarbonlar so'qir.  
Bandi bo'lgan edi ulug' yurt, axir,  
Keldim, madad bergil, yo Ka'batulloh.

Avj oldi ig'voyu firib, razolat,  
Yig'ladi bir chetda yetim adolat.  
Bormi saodatga, axir, kafolat,  
Keldim, madad bergil, yo Ka'batulloh.

Xor bo'ldi Vatanda kimki ilmi bor,  
Birovlar zar bilan topdi e'tibor.  
Hiylagar ko'paydi, ko'paydi makkor,  
Keldim, madad bergil, yo Ka'batulloh.

Duch kelgan sanamga sig'indik gohi,  
Bizga keng ochildi Shayton dargohi.  
Axir, nima edi elning gunohi,  
Keldim, madad bergil, yo Ka'batulloh.

Magar bo'ri ekan odamga odam,  
Bir-birin boshini yegay damodam

Haqiqat yo'q joyda yashnagay yolg'on,  
Keldim, madad bergil, yo Ka'batulloh.

Qay zamon odamlar bad fe'lin sezdim  
Vafoli do'st izlab dunyoni kezdim.  
Topmadim, topmadim, baridan bezdim  
Keldim, madad bergil, yo Ka'batulloh.

Qoshingda tiz cho'kib turibman shu dam  
Dilimda iltijo, qo'limda qalam.  
Shafqating ayama mendan ham, Egam,  
Keldim, madad bergil, yo Ka'batulloh

Shukrona ayturman o'zingga, yo Rabb,  
Yuz burdik hidoyat yo'liga qarab.  
Haq degan yurtimning baxtini so'rab  
Keldim, madad bergil, yo Ka'batulloh

## **YO MUHAMMAD**

Siz bashar farzandi, Abdulloh o'g'li,  
Arab sahrosidek otashin, cho'g'li,  
Payg'ambar bo'ldingiz, muzaffar tug'li,  
Assalomu alayka, yo Muhammad,  
Assalomu alayka, yo Ahmad.

Alloh Rasuli, tengi yo'q Inson,  
Sizning yo'lingizni yoritgay Qur'on,  
Siz - Olam sarvari, Siz - nuri jahon,  
Assalomu alayka, yo Muhammad,  
Assalomu alayka, yo Ahmad.

Qiyomat ayyomi, Mahshar ayyomi,  
Sizga nasib etsin Mahmud maqomi.  
Mudom tilingizda ummatlar nomi,  
Assalomu alayka, yo Muhammad,  
Assalomu alayka, yo Ahmad.

Siz bilan olishdi mushriklar avval,  
Bir nafas tinmadi jang ila jadal,  
Rabbano qo'lladi Sizni har mahal,  
Assalomu alayka, yo Muhammad,  
Assalomu alayka, yo Ahmad.

Sizning murodingiz hidoyat erur,  
Sho'rlik bandalarga inoyat erur,  
Sizga ummat bo'lmoq saodat erur,  
Assalomu alayka, yo Muhammad,  
Assalomu alayka, yo Ahmad.

Sizning ziyoratga kelmishdir jahon,  
Siz bois Madina tun-kun charog'on,  
Quyosh ketmas bundan, oy boqar shodon,  
Assalomu alayka, yo Muhammad,  
Assalomu alayka, yo Ahmad.

Qabringiz qoshida turfa ummatlar,  
Suvratlar boshqayu o'zga Siyratlar,  
Bari ham Allohdan kushoyish so'rar,  
Assalomu alayka, yo Muhammad,  
Assalomu alayka, yo Ahmad.

Rahmdil Insonsiz, bag'ri keng Rasul,  
Barchaga yaxshilik tilaysiz nuqul,  
Lekin kufr bilan kimlardir mashg'ul  
Assalomu alayka, yo Muhammad,  
Assalomu alayka, yo Ahmad.

Kimdir pok bo'lgali ichadi qasam,  
Lekin ichi qora, Shaytonga hamdam,  
Ular Sizga faqat orttiradi g'am,  
Assalomu alayka, yo Muhammad,  
Assalomu alayka, yo Ahmad.

Hazrat, so'rang bizning gunohimizni,  
Boshlang to'g'ri yo'lga gumrohimizni.  
Egamga yetkazing oh-vohimizni,  
Assalomu alayka, yo Muhammad,  
Assalomu alayka, yo Ahmad.

Dunyoda yaxshilar ko'p hali, shukr,  
Ular bor, yog'ilar zamin uzra nur.  
Ummatsiz yo'q sizga halovat, huzur,  
Assalomu alayka, yo Muhammad,  
Assalomu alayka, yo Ahmad.

Keldim ziyoratga, ozurda jonman,  
Ranju balolardan to'ygan Insonman.  
Sizning poyingizda gardman, to'zonman.  
Assalomu alayka, yo Muhammad,  
Assalomu alayka, yo Ahmad.

## **TILANCHI BOLA**

Ka'baning muqaddas namozgohida  
Ming-minglab mo'minlar yukinmoqqa shay.  
Saflar orasida gohi-gohida  
Ko'rinib qoladi bitta bolakay.

Kimdir uzatardi sadaqa - riyol,  
Biroq ehsonga u qilmasdi ruju.  
Qop-qora ko'zida cheksiz mung, xayol,  
Lablarida esa hazin, nim kulgu.

Jim boqar, ishlari go'yo sarishta,  
Faqat nigohida o'tinch porlardi.  
Mening nazarimda u bir farishta,  
Mehru saxovatga unsiz chorlardi.

## **ALLOH DARGOHI**

Necha ming musulmon tunu kun bedor,  
Ka'ba atrofini tinmay aylanar,  
Barchasin murodi ilohiy diydor,  
Sajdaga har biri har zum shaylanar.

Olam ummon bo'lsa - girdobi shu joy  
Olam osmon bo'lsa - mehvari bunda.  
Milyard martabali jahon, hoynahoy,  
Kemadek qalqadi bitta to'lqinda.

Yer uzra tariqday sochilgan inson,  
Bir qushning oldiga kelib tizilmish  
Abasdir bu joyda millat, irq, lison.  
Zamin yo'riqlari bunda buzilmish.

Bu joyning bor erur na Qorabog'i,  
Na O'zgan, na O'shu Farg'onasi bor.  
Allohning o'zidir yolg'iz charog'i,  
Charog'ning hisobsiz parvonasi bor.

Hatto nafrat mushti bunda tugilgay,  
Axir yagonadir bu yerda maqsad.  
Sig'insang - gunohing duv-duv to'kilga  
Iymonsiz bandaga yo'q lekin shafqat.

Shunchalar mukammal Alloh dargohi,  
Mag'firat qil, deya dilni tig'ladim.  
Har yondan taralar mo'minlar ohi,  
To tongga qadarli yum-yum yig'ladim.

## **HASRAT**

Oochgan ham, quvgan ham Allohim deydi  
Oochgan ham, quvgan ham emasman, do'stim.  
Mening iztirobim shul Inson edi,  
Insondan o'zgani demasman, do'stim.

Inson-chi, to hanuz yovuz va g'addor,  
Bir-birin tinimsiz tortadi chohga.  
Bundayin qismatga ko'nikmoq dushvor  
Netay, hasratimni deymen Allohga.

## **ONA**

Ka'ba qopqasida turgan, ey posbon,  
Avval onalarning ochgin yo'llarin.  
Onalar poyiga tiz cho'k o'shal on,  
Tavof qil, ko'zga surt, o'pgin qo'llarin.

Hojar onamizning nidosi sabab  
Ka'bada ko'z ochgan Obi Zam-zam ham.  
Bir umr talpinmish onaga qarab,  
Ne-ne payg'ambarlar ko'zlarida nam.

Qavmimni ranjitib qo'ymayin, ammo  
Tobut yasab kelgan er zoti doim.  
Onalar bag'riga faqat beshik jo,  
Hayotbaxsh allalar aytgan, muloyim.

Sho'rlik odamzodning tolei uchun  
Eng avval onalar qilsin ibodat.  
Zora, gunohlardan pok bo'lgay ochun,  
Onalar o'tinchi topib ijobat.

Ka'ba qopqasida turgan, ey posbon,  
Avval onalarning ochgin yo'llarin.  
Onalar poyiga tiz cho'k o'shal on,  
Tavof qil, ko'zga surt, o'pgin qo'llarin

## **AROFAT**

Arofat tog'ining etaklarida  
Ko'rdim qiyomatning alomatlarin.  
Hamma bir xil libos - ehrom sarida,  
Qaytadan varaqlar umr daftarin.

Yo'qdir birov bilan birovning ishi,  
Aygash-uyqash bo'lmish yer bilan osmon.  
Har kimning ichida dardi, tashvishi,  
Shukrona aytmasang osiysan shu on.

Majruh boladan to munkillagan chol,  
Labbayka, Alloh, deb qilar iltijo.  
Kimdir tashnalikdan ingraydi behol,  
Kimningdir hayoti shul yerda ado.

Namoz vaqti kelar, tumonat muslim  
Sajdaga egilar, ko'zda jiqqa yosh.  
Men ham safim bilan tiz cho'kaman jim,  
Balki men ham qayta ko'tarmasman bosh...

Qiyomat nima deb so'rama endi,  
Uning bir sahnasin ko'rsatdi Alloh.  
Sho'r dengiz tonggacha qaynadi, tindi,  
Sinovdan o'tganim rost bo'lsin, valloh!

## **HAYOT HAQIQATI**

Umrning yarmini o'tdik amallab,  
Qolgan yarmiga ham podshodir xudo.  
Faqat ayriliqdan asragin, yo Rabb  
Do'stu yoronlardan qilmagin judo.

G'animlar makrini o'ylasang agar  
Dunyodan yashamay ketgan yaxshiroq.  
Ba'zan dil uyingni aylar munavvar  
Yetti yot begona yoqqan bir chiroq.

Muhtoj bo'lganingda silaydi boshing  
O'zi muhtoj bo'lgan tanti mardumlar.  
O'lim tilaganda tirik safdoshing,  
Hayotga qaytarar seni marhumlar.

## **HOJILAR**

Halollik Islomda eng oliy matlab,  
To'g'rilik Muslimning asl gulto'ji.  
Bir kuni o'rtada Shayton oralab,  
Hojining hamyonin urdi-ku hoji.

Qaysi bir o'lkadan kelgan keksa chol,  
Bor-yo'q bisotidan bo'ldi mosuvo.  
Ne qilsin? Chorasiz tura berdi lol,  
Dilida shukrona, tilida duo.

O'g'ri hoji esa mamnun ishidan,  
Tinmayin sajdaga egilar boshi.  
Nobakor bandaning bu qilmishidan  
Badtarroq qoraydi Ka'baning toshi!

\* \* \*

Ehrom kiyib olgan ikki musulmon  
Bir-birin so'kishib choy talashardi.

Asli bilmasdilar, shu zum ikkovlon  
Do'zaxning tubidan joy talashardi.

\* \* \*

Kezib bu shaharni balki horgaysan  
Va lekin Allohga diling yorgaysan.  
Adasha-adasha Makkani topding,  
Endi adashsang gar qayga borgaysan.

### **HOJI UKALARIM ANVAR VA XURSHIDGA**

Do'st bo'lurmi bunchalar hamdam, inoq,  
Bir pilikdan kuch olar ikki chiroq.  
Oh, ahillik bor ekan o'zbekda ham,  
Ulg'aying, turli yomon ko'zdin yiroq.

### **ASLIYAT**

Bu yerga o'g'ri ham, to'g'ri ham kelar,  
Poklanish har kimning muddaosidir.  
Gunohu savobni har banda bilar,  
Elning u shohidir yo gadosidir.

Hayotning oqimin to'xtatish qiyin,  
Hech kim ayri tushmas qorgan loyidan  
Bir karra poklanib olgandan keyin  
Ishlarin boshlaydi kelgan joyidan..

### **SHAYTON**

La'natlab bo'lsa ham, qarg'ab bo'lsa ham,  
Har kun tilovatda aytilar nomi.  
Uning bosh suqmagan joyi kamdan-kam,  
Ochilgan har qadah uning ham jomi...

Deydilar, norasta go'dakni hatto  
Uyquda qitiqlab kuldirar emish.  
Salgina g'aflatda qolsang mabodo,  
Qilmagan ishingni qildirar emish.

Shaytonning hunari chindan rang-barang,  
Sallani paytava qilib o'ratgay.  
Agar sidqidildan ko'rsatsa nayrang,  
Nodonni shoh qilib, yurtni so'ratgay.

Minoda Shaytonni qildik toshbo'ron,  
La'natga ko'mildi badbaxt u lain.  
Dedik, shuncha yukning ostidan Shayton  
Ming yillar chiqolmay yotmog'i tayin.

Shodumon yo'l oldik Vatanga qarab,  
Shayton qoldi, deya chuqurda-chohda.  
Manzilga qaytgandik, Shayton, vo ajab,  
Bizni kutib oldi tayyoragohda.

Makka - Madina - Toshkent  
1992 yil 25 may.16 iyun

## HIKMAT SADOLARI

### **IBODAT**

Dunyodan roziman dema hech qachon,  
Desang ham, so'ylagil sahroga, toqqa.  
Chunki seni tinglab, kimdir o'sha on.  
Nega rozisan, deb tutgay so'roqqa.

Dunyodan norizo bo'lsang ham agar,  
So'z dema, bardosh qil azob, firoqqa.  
Chunki seni tinglab, kimlardir batta  
Nega, deb albatta, tutgay so'roqqa.

Dunyo ishlariga boqma hech hayron,  
Jimgina nazar sol ko'hna bu korga.  
Olis kechalari yolg'iz qolgan on,  
Dilingni och faqat Parvardigorga.

### **JABROIL**

Ul kuni Muhammad - xoksor banda,  
Alloh nazariga bo'lgandi noil.  
Sokin hujrasida o'ychan turganda  
Tushdi huzuriga Hazrat Jabroil.

Avval Muhammadning ko'ksini yorib,  
Shaytoniy hislarni yulib tashladi.  
So'ng Iymon nuriga hikmatni qorib,  
Muhammad ko'ksiga joylay boshladi.

Dedi: - Qalq o'rningdan endi, Muhammad  
Rasulsan, yo'l ko'rsat jami insonga.  
Noqis aqllarni hikmatga qarat,  
Boshla osiylarni dinga iymonga.

### **"QUM FA ANZIR!"**

Qum fa anzir! - Tur va ogoh et,  
Yota berma misoli tanbal.



Qum fa anzir! - Tur va ogoh et,  
Zimmangga ol kurashni dangal.

Qum fa anzir! - Tur va ogoh et,  
Oldindadir hali mashaqqat.

Qum fa anzir! - Tur va ogoh et,  
O'tda yongay mushriklar albat.

Qum fa anzir! - Tur va ogoh et,  
Ayt, mo'minlar bo'lsinlar qoim.

Qum fa anzir! - Tur va ogoh et,  
Ulug'lagin Rabbingni doim.

## **HORDIQ**

Arab sahrosida yo'l yurib karvon,  
Topdi bir manzilda qo'nim va qaror.  
Horg'in Rasululloh - ozurda ul jon,  
Hordiq chiqarmoqni qildi ixtiyor.

To'shaksiz, taqirda yotdi yonboshlab,  
Bamisli ochundan ko'ngli qolgan qul.  
Keldi sahobalar ko'zlarin yoshlab:  
- Hech qursa bo'yrada yotingiz, Rasul.

Rasululloh dedi: - O'ylamang, aslo  
Fanodan men rohat kutayotirman.  
Bu dunyo daraxtning soyasi go'yo,  
Men undan ot minib o'tayotirman.

## **RO'ZA**

Ramazon oyida, hayit chog'ida,  
Sumalak pishirdi ahli musulmon.  
Unni qovurdilar zaytun yog'ida,  
Halim tayyorladi - kimda bor imkon.

Bahor keldi mana, qishdan chiqoldik,  
Tergan rizq-ro'ziga, ne'matga sharaf.  
Tog'dayin zahmatni axir yiqoldik,  
Tabiatga sharaf, himmatga sharaf.

Ro'zadan chiqqanlar, sizga ham rahmat  
Qarzingiz sinovli saodat erur.  
Rasululloh demish: - Sabr qil, ummat,  
Mo'minlik belgisi qanoat erur.

## **HAJ**

Necha cho'llar oshib, daryolar oshib,  
Bir kun kirib keldi Makkaga karvon  
Dengizga yetishgan jilg'adek shoshib,  
Ummatlar yo'l oldi Ka'baga tomon.

Ularning barchasi mo'ysafid edi,  
Asoga tayangan nuroniy boshlar.  
Kimdir hayrat bilan ularga dedi:  
- Hajga kelmaydimi sizlarning yoshlar.

Ummatlar deyishdi: - Haq yo'li mushk  
Aziyat chekkan-ku Payg'ambarimiz.  
Outlug' bu safarga olgan chog'i yo'l,  
Yosh-yosh yigit edik bizning barimiz.

## **HAZRATI ODAM**

Joylari osmonda bo'lsa ham magar  
Hazrati Odamga qiyindir g'oyat.  
O'ng yonga boqqanda ruhlari yayrar,  
Chap yonga boqqanda o'rtanar faqat.

Bir tomon jannatning fusunkor bog'i,  
U - rohat go'shasi, yam-yashil makon.  
Bir tomon do'zaxdir, yo'qdir adog'i.  
U yerda abadiy azob va fig'on.

Quv nar, o'ngga boqib Hazrati Odam,  
Chap yonga boqqanda oshar nolasi.  
Bir nasli jannatga noil bo'lsa ham,  
Do'zaxda yonmoqda bitta bolasi.

## **INSON**

Oldiga kelganni qaytarmay yemoq  
Aslida, aqli yo'q hayvonning ishi.  
Og'izga kelganni qaytarmay demoq  
Noqisu befahm, nodonning ishi.

Tavajjuh ayladi Tangri taolo,  
Muqaddas sanaldi Inson degan nom.  
Insonni e'tirof etmagan asno  
Iblis ham quvildi Arshdan batamom.

Ko'zingning o'ngida o'sgandek ekan,  
Rabbim ham ogohdir har zum, har ishda  
Ro'zayu parhezda muddat bor, lekin  
Hamisha hazar qil harom-harishdan.

## **ONA**

Kimdir savol berdi: - Aytgil, Muhammad,  
Yolg'iz sen Rasulsan butkul olamga.  
Kimga ko'p yaxshilik aytay, o'zing ayt,  
Ota-onamgami yoxud bolamga?

Rasul javob qildi: - Tingla, birodar,  
Gapimni bir bora quloqqa ilgil.  
Imkon topa olsang dunyoda agar,  
O'ng avval onangga yaxshilik qilgil.

Bu hikmat sharhini o'yladim uzoq .  
Rostdan ona erur qiblai olam.  
Garchi barchamiz ham padarmiz, biroq  
Onadan tug'ilgan payg'ambarlar ham.

## **FARZAND**

Bir kuni ranjitdi otani farzand,  
Ota o'z uyidan bosh olib ketdi.  
Lekin Alloh mehri bo'lib sarbaland,  
Ota Makkatulloh vasliga yetdi.

Ota fig'on chekdi Ka'ba qoshida,  
Go'yo unut bo'lgay alamlar bari.  
Najot charx ura ham garchand boshida,  
Sira ketolmadi bir gapdan nari.

Ka'bani sig'inar ekan keksa chol  
Armonin oshkora aytdi olamga.  
Dedi: - Ibodatim bo'lsa ham uvol,  
Faqat saodat ber o'sha bolamga.

## **DO'ZAXIYLAR**

Yovlashdi bir kuni ikki musulmon,  
Oradan adolat tamoman ko'chdi,  
Ular olishdilar uzoq, beomon,  
Oqibat birining kallasi uchdi.

Kimdir payg'ambardan so'radi kelib:  
- Ayo, Rasululloh, aylagil javob.  
Hoynahoy, raqibin qonga g'arq qilib,  
U kas jahannamda tortgaydir azob?

Rasululloh dedi: - U ham va bu ham  
Mahkum bo'lg'uvsidir do'zax to'riga.

Ikkov ham maydonga tushganlari dam  
O'lim tilaganlar biri biriga.

### **SAVOB**

Dasti qisqalarni kamsitma zinhor,  
Savobning kattayu kichigi bo'lmas.  
Kimningdir davlati behadu bisyor,  
Va lekin baxildir, tolei kulmas.

Och qolgan go'dakka saxovatli zot,  
Yarimta xurmoni dildan ilindi.  
Bilgilki, bu himmat shu zum, shu zahot,  
Bus-butun savob deb qabul qilindi.

Demishlar, savob ish ofatni to'sib,  
Ezgulik yo'luga shaylangusidir.  
Eng kichik himmat ham toychoqdek o'sib,  
Tulpordek savobga aylangusidir.

### **BANDAGA SIG'INMA**

Hech qachon bandaga sig'inma, banda,  
Zulm qilsa agar, zolimga la'nat.  
Bitta ruh yashaydi har bitta tanda,  
Insonning avliyo bo'lmog'i g'alat.

Garchi bu dunyoda bordir nodonlik,  
Tafakkur, Aqlning koshonasi bor,  
Qismatdan hech kimsa topmas omonlik  
Oldinda ajalning ostonasi bor.

Sehrga nechog'lik kaloming burma,  
Lazizroq so'z yo'qdir So'zidan ortiq.  
Dunyoda do'st izlab qancha yugurma,  
Azizroq do'st yo'qdir O'zidan ortiq.

### **MARHUMLAR SHA'NI**

Marhumlar sha'niga yomon so'z demoq  
Makruhlik sanalmish azaldan-azal.  
Ey, Inson, tanangga bir zum o'ylab boq,  
Kimlarni zabtiga olmabdi ajal.

Toshqin sel vahmini soy ko'targaydir,  
Hayotning zarbasin ko'targay hayot.  
Misli toy tepkisin toy ko'targaydir,  
Otning tepkisini ko'targaydir ot.

Rasululloh demish: - Kim Haqqa yo'ldosh,  
Tiriklik qadrini u aziz etdi.  
Marhumning ortidan ota ko'rmang tosh,  
Marhum ketadigan joyiga ketdi.

## **HIDOYAT YO'LI**

U senga ko'rsatdi hidoyat yo'lin,  
Yurgil yo yurmassan, o'zing bil, Inson  
Balki sen tutgaysan Iblisning qo'lin  
Yaratgan Xoliqqa barchasi ayon.

Pishqirgan daryoning sohilida gar  
Tashnayu zor qolsang, aybdorsan o'zing  
Boshingga nogahon balolar yog'ar  
Labingdan uchgan chog' jaholat so'zing.

G'oyibdan baxt kutib o'ltirmoq nechun,  
Dastingga kor berdi qalbingdagi yor.  
Zaminda ko'rgazgan qilmishing uchun  
Osmonni malomat qilmog'ing bekor.

## **JON ACHCHIG'I**

Buloqdan suv ichdi hazrati Iso,  
G'oyat totli edi bu obi hayot.  
Suvni bir ko'zaga quyganda ammo  
Zaqqumga aylandi u o'sha zahot.

Hayratga tushgaydir payg'ambarlar ham,  
Bu qanday sir erur? Ayon qil, yo Rabb!  
Masiho nafasi yetishgani dam  
Ko'zadan bir ovoz chiqdi-ku titrab:

Ayo, shirin suving bo'ldimi taxir,  
Dema, bu tuz ta'mi, qon achchig'idir.  
Men ham Inson edim. Ko'zaman hozir,  
Suvni achchiq qilgan - jon achchig'idir!

## **JINLAR**

Jinlar bazm qilardi ovloqda, tunda,  
Gulxan atrofida xurram, shodumon.  
Bir botir suvoriy o'tarkan, shunda  
Bazmga nazari tushdi nogahon.

Botirni qopladi lahzalik titroq,  
So'ng gulxan ustiga ot soldi birdan,

Jinlar to'zg'ib ketdi, bittasi biroq,  
So'z qotdi, hayiqmay sira botirdan:

- Bundoq zug'um qilma bizga, ey botir  
Kimsaga bilmasdan bermagil ozor.  
Jinlar ichida ham kofiri bordir,  
Jinlar ichida ham musulmoni bor.

## **SHOH VA GADO**

Nogoh paydo bo'ldi davrada gado,  
Davra ahli esa shohlar edilar.  
Ular taajjubda qolib shu asno,  
Gadoga boqishib: - Kimsan? - dedilar.

Bir kun paydo bo'ldi davrada podshoh,  
Davra ahli esa gadolar edi.  
Ular ham taajjub ichra banogoh: .  
Podshoga boqishib: - Sen kimsan? - dedi.

G'aybdan sado keldi: - Tingla ey, banda,  
Harchangga yaratgum yagona makon.  
Bir-biring kamsitib qilma sharmanda,  
Siylangan joyida azizdir inson.

## **PAHLAVON**

Bir suhbat chog'ida Hazrat payg'ambar  
O'rtaqa tashladi savol nogahon.  
Aytдилar: - Zarurat tug'ilsa magar  
Kimni atardingiz asl pahlavon?

Sahobalar dedi: - Har kim doimo  
Chekiga tushganni kelgandir olib.  
Kurash maydoniga chiqqanda ammo,  
Pahlavon sanalgay kim bo'lsa g'olib.

Rasululloh dedi: - Ko'hnadir jahon,  
Turfa xil kuch-qudrat bordir odamda.  
Lekin o'z jahlini yengolgan inson  
Haqiqiy pahlavon erur olamda.

## **EZGULIK**

Bandani xillamoq nokasning ishi,  
Atoyi Haq erur tus bilan zabon.  
Insonni tanitgay faqat qilmishi,  
Nasoron bo'lsin u va yo musulmon.

Bir burda non so'rab yig'lasa go'dak,  
Diydangga kelmasa agar qatra yosh.  
Masjidu cherkoving endi ne kerak,  
Yaxshisi, yo'qlikka olib ketgil bosh.

Axir Rasululloh demish-ku ul dam:  
Hamisha saxovat yo'lidan yurgil.  
Mayizday qop-qora boshli habash ham  
Yaxshi ish qilganda yonida turgil!

## **HASAD**

Dunyoga kelganda Inson mukarram,  
Qavmlar shodlikdan chuvvos soldilar.  
Baxtiyor go'dakka aylashib karam,  
Albatta momiqqa o'rab oldilar.

Oylar, yillar o'tdi, o'tdi ko'p sana,  
Go'dak ham mo'ysafid yoshiga yetdi.  
Kuni bitganida ul banda yana  
Bir parcha momiqqa o'ralib ketdi.

Hasadgo'y kimsalar - Iblisga hamkor  
Momiqqa cho'zdilar faqat qo'llarin,  
Egasin kafanga ayladilar zor,  
Do'zaxga burmoqchi bo'ldi yo'llarin.

## **SHAMOL**

Shamollar, shamollar, daydi shamollar,  
Qaydan esganingiz bilolmay dog'man.  
Siz bilan chulg'anur ne-ne xayollar,  
Sizning qarshingizda sham yo charog'man.

Arab sahrosidan esgan, ey samum,  
Hovurding kimlarning tuyg'ularini.  
Shahidlar uchun goh bo'lding tayammum,  
Qumlarga dafn etding orzularini.

Shamol esganida hazrat Payg'ambar  
Mudom to'lg'anardi dilgir, betoqat.  
Der edi: - Har qanday shamol muqarrar,  
Yo hayot keltirgay yoki falokat.

## **MAVHUM ZOT**

Yurtga podshoh bo'ldi bir kun musulmon  
Bir osiy o'sha kun musulmon bo'ldi.

Yurtga podshoh bo'ldi bir kun nasoron  
Ul banda o'sha kun nasoron bo'ldi.

Toju taxt dunyoda aylanar payvast,  
Shohlar goh darvishu xudparast bo'ldi  
Podshoh bo'lganida yurtida butparast  
Ul banda o'sha chog' butparast bo'ldi.

Shundoq yashadi u foniyl hayotni,  
U nayrang ko'rgazdi hatto Xoliqqa.  
Oxirat kunida, mavhum bul zotni  
O'tqazib qo'ydilar uchta qoziqqa.

### **SEN KABI**

Onangni otangga xatlab berganda,  
Guvoh bo'lmaganman ishongil, axir.  
Boqursan, yuzingda quv zaharxanda,  
Dunyoni go'yoki men etdim taxir.

Bosgan qadamimdan chaqnamas olov,  
Da'vo qilmasman hech abadiyatga.  
Va qo'rg'on qurdimu na tutdim yalov,  
Doim yo'ldosh bo'ldim oddiy niyatga.

Boshni ko'p qotirma sen kimsan debon,  
Kimning xesh, kimningdir andasidirman.  
O'tkinchi dunyoda men ham bir mehmon,  
Xudoning sen kabi bandasidirman.

### **LAYLI VA MAJNUN**

Har kimga hamrohdir hamisha qismat,  
Kimdir boshin egar, kim ko'ksin kerg  
Rasululloh demish: - Allohdan faqat  
Kim nima so'rasa, o'shani bergay.

Oyoq-qo'lin bog'lab Laylini bir kun  
Olib kelishdilar Ka'baga tomon.  
Layli xitob qildi: - Tavba ne uchun,  
Majnunim bo'lmasa tiyradir jahon.

Ibodati Majnunning navbati edi,  
U ham oshkor etdi ko'ngil maylini.  
Ka'baga bosh urib turarkan, dedi:  
Men sendan so'rayman faqat Laylini

### **MUHABBAT**



Har mo'min dilida bir orzu faqat,  
Har damda o'yida Mahsharning kuni.  
Alloh gunohlarin qilib mag'firat,  
Zora noil etsa jannatga uni.

Tunlari meni ham chulg'aydi xayol,  
O'zing yorlaqagin meni ham, yo Rabb.  
Sening vasling garchi eng oliy visol,  
Rahm etgil va lekin holimga qarab.

Mening ham tilagim ol inobatga,  
Qovushtir orzular olami bilan.  
Rasululloh demish: Kishi jannatga  
Kirgaydir sevikli odami bilan.

## **AZROIL**

Badaviy shaklida kelib Azroil  
Muhammadga dedi: . Joningni olgum.  
Va lekin hurmatga ekansan noil,  
Tila tilagingni, do'st bo'lib qolgum.

Muhammad to'lg'ondi o'ngga-yu so'lga,  
Dedi: . Ishing ekan - ola qol jonni.  
Roziman, iltifot aylab Rasulga,  
Baxsh etib turibsan so'nggi imkonni.

Yolg'iz o'tinchimni qaytarma minba'd,  
Mayli, so'ng tepamda ko'ksingni kergil.  
Ummatim jonini oson ol faqat,  
Uning azobin ham o'zimga bergil.

## **HADIS**

Bu ulug' dargohda mehmonman men ham,  
Mening ham dilimda oshiqqlar ohi.  
Hadischi bobolar degandek u dam,  
Tavbamni qabul et, o'zing, Ilohi.

Ulg'aydik va lekin oldda ko'p gap bor,  
Davra shamollari esib o'tgaydir.  
Inongum, e'tiqod o'zi bo'lib yor,  
Bizning ham qo'limiz bir kun tutgaydir.

Ibodot bor edi, u etgay davom,  
Qirq bilan yopmasmiz bu uyning tomin.  
Bizni tinglaganga hamisha salom,  
Yana ko'rishguncha sog' bo'ling! Omin!

## **QUL VA QUYOSH**

Demasman, zulmatda mudom faryod qil,  
Himmat nuri bilan dilni obod qil.  
Rasululloh demish: . Oshma haddingdan,  
Quyosh tutilganda qulni ozod qil!

## **DILOZOR**

Bunchalar dilozor bo'lmasang, kimsa,  
Maqoming bandai mo'min-ku axir?!  
Kimdir jigarini tuproqqa ko'msa  
Holin so'ramasang, toshmi bu bag'ir?

Tepangda porlaydi oftob charog'on,  
Sen esa atrofni butkul tun deysan.  
Kimningdir diliga cho'ksa zimiston,  
Sen uning holini yorug' kun deysan.

Bir mahal duch kelib sendek baloga,  
Payg'ambar oh chekmish, qalbi to'la zor.  
Rasululloh demish: hatto Musoga  
Ummati bunchalik bermagan ozor.  
1991-1992 yillar

## **O'ZBEKISTON DAVLATI**

O'zbekiston bayrog'i ko'tarildi chinakam,  
Ushbu kunni, ayting-chi, qay birimiz kutmadik.  
Zarur bo'lgan chog'da goh dor tagida turib ham,  
Qay birimiz tarixning sinovidan o'tmadik.

Dong'il safarga chiqdi endi hur O'zbekiston,  
Kimgadir oyoqosti, kimga u osmon bo'ldi.  
Shukrkim, o'z-o'zini tanidi keksa jahon,  
Ya'ni o'zbek Davlatin jumlai jahon bildi.

Ne-ne kamsituvlarni ko'rgan shu boshim bilan,  
Ona xalqim, qoshingda tizza bukib turibman.  
O'zbekcha gapirganda, bir chuqum oshim bilan  
Sadaqai baxting deb borim to'kib turibman.

Garchi doim ungandir gulchechaklar bog'imda,  
Temur va Navoiyni eslaymiz takror-takror.  
Men-ku uzoq yasharman, lekin ketar chog'imda  
Tepamda egilajak o'z tug'im - bayrog'im bor!

Nasib etmish bu kunlar, taralsin yangroq unlar,  
Do'stlar bilar yonma-yon qutlaylik bu ayyomni.

Iloyo, boshimizga kelmasin qaro kunlar,  
O'zbekim, deb ko'taring, do'stlarim, oltin jomni.  
1992 yil, 4 mart

## MUSOFIR

Burunni sassiq deb kesib bo'lmaydi,  
Siz meni tushuning, Abdullo aka.  
O'zbekman, va lekin darbadar daydi,  
Tasalli berolsa qaniydi Makka.

O'zbek deb ajratar Afg'onga borsam,  
Menga kelgindi deb qaraydi Arab.  
Tinglovchi kimsa yo'q dardimni yorsam,  
Faqat ezilaman onamga qarab.

Garchi kamim yo'qdir molu dunyodan,  
Oshyoni omonat qushman aslida.  
Yiroqman yurt degan mehriqiyodan,  
G'aribman umrimning qaynoq faslida.

Qo'lda qurol bilan jang qildim men ham,  
Afg'on tuprog'ini bosganida yov.  
Hech qursa bir nafas, hech qursa bir dam,  
Bosqinchi yo'liga bo'la oldim g'ov.

Jangda inilarim bo'ldilar shahid,  
Yolg'iz onam bilan qoldik ikkovlon.  
Meni atadilar manfur mujohid  
Shimol galalari makkor, beomon.

Jayhunning ortidan kelgan o'zbekim,  
Qurol ko'tarmishdir o'rtanib joni.  
Bugun men olamga oshkora degum,  
U ham sho'rolarning bo'ldi qurboni.

Menga qo'li qon deb boqmang, akajon,  
Ozodlik qadrini men ham bilganman.  
Janglarda qay o'zbek bergan bo'lsa jon,  
Uning qatorida men ham o'lganman.  
1992

## TURKISTON BOLALARIGA

*(Mustaqilligimizning bir yilligi munosabati bilan)*

Turkistonning bolalari, maqtovimga quloq tutmang,  
Gina qilsam chidang, ammo gaplarimni hech unutmang.

Eng avvalo, shajarangiz qaydan chiqqan, bilib oling,  
Siz ham bashar farzandisiz, Haqni bayroq qilib oling.

Men Temurdan so'zlayinmi, so'zlayinmi Navoiydan,  
Barchasini o'qigansiz, eshitgansiz yo roviydan.

Tarixingiz shundoq uzoq, jangu jadal desa ham bor,  
Bosqin ham bor, toshqin ham bor, kasbu amal desa ham bor.

Bobur bo'lib so'radingiz qo'ni-qo'shni dunyolarni,  
Mashrab bo'lib kezdingiz goh qashqir yurmas sahrolarni.

O't ketsin u qora kunga - birovlariga qul bo'ldingiz,  
Sharqu G'arbning o'rtasida oyoqosti yo'l bo'ldingiz.

Biroq iymon nuri doim oqib turgan qoningizda,  
O'zingiz ham sezmagansiz, bir gavhar bor joningizda.

Ming-ming shukr, zamon kelib istiqbolga erishdingiz,  
Xarob bo'lgan xonadonni butlamoqqa kirishdingiz.

Hurlikniyu saodatni muborakbod etgum, lekin  
Aytib qo'yay, qulog'ingiz bitgan ekan sekin-sekin.

Nazaringiz tushar avval zebi-ziynat dasturxonga,  
Hanuz ta'zim qilmoqdasiz mol-dunyosi bor insonga.

Bo'y-bastini ko'rsatguvchi urfoni zo'r millat qani,  
Sizning uchun obro' - oltin, arzonarov shuhrat - ma'ni.

Yuragida javhari bor kimsalarni ko'rmagaysiz,  
Karnayi yo'q bechoraning to'yiga yo'l burmagaysiz.

Har qadamga xushomadni o'z o'rniga qo'yolsaydim,  
Peshvolarning poylariga haftada qo'y so'yolsaydim,

Bo'lmas edi mendan ulug', mendan aziz biror inson,  
Oh, xalqimni ne ko'ylarga solding zamon, solding zamon.

Turkistonning bog'larida bulbullari bor, holbuki,  
Xor bo'lsa ham tog'day baland ko'ngillari bor, holbuki.

Birov u yon tortar bo'lsa, birov bu yon tortayotir,  
Qonsiragan jallodlarning shodliklari ortayotir.

Bilib bo'lmas rost gap qayda, bilib bo'lmas qayda yolg'on,  
Malomatga yo'liqadi, elga: "Birlash" degan inson.

Turkistonning bolalari, Turkistonning bolalari,  
"Puf" deganda to'zg'igudek mo'jzagina lolalari.

Chinor bo'lib ildiz oting, qoya bo'lib tiklangiz qad,  
Ulug'-ulug' ajdodlarning xavotiri Sizdan behad.

Soyangizda panoh topsin horib tolgan qondoshingiz,  
Unutmangki, bul chamanda har bir yaproq jondoshingiz.

To'qayzori bo'lmasa gar sheru arslon qaydan unar,  
Bir manzili bor ekanki, burgutlar ham kelib qo'nar.

Oldindadir hali zahmat, oldindadir imkoningiz,  
Osilmagan ne-ne Mashrab, otilmagan Cho'lponingiz.

O'tinch ila hasratimni nasihat deb yuzga solmang,  
Xudo insof bergan kuni barmog'ingiz tishlab qolmang.

Muruvvatu ma'rifatdir buyuklikning nishonasi,  
Qadam qo'ying, mana sizga dong'il yo'lning ostonasi.

Turkistonning bolalari, Turkistonning bolalari,  
"Puf" deganda to'zg'igudek mo''jazgina lolalari...  
1992

\* \* \*

Haq sevgay o'ziga yor bandalarni,  
Dilida iymoni bor bandalarni,  
Takabbur boshlarni pastroqqa egsa,  
Yuksakka ko'targay xor bandalarni.  
1992

\* \* \*

Kimdir farzandiga derdi: - Ey, qo'zim,  
Jonu diling bilan eshit bul so'zim.  
Qachondir salomga alik olmasdim,  
Endi bir alikka zordirman o'zim.  
1992

\* \* \*

She'r, Farzand, Yaxshilik - misli polapon,  
Tarqalib ketdilar hammasi har yon.  
Olamda qanchaki yomonlik bo'lsa,  
Yopirilib keldilar bari men tomon.  
1992

## **SHOIR CHORIJon MARSIIYASI**

Har kim ham dunyodan o'tadi.  
U yo shoh, yo gado bo'lmasin.

Qazoying qalbimni o'rtadi,  
Hech kimning shogirdi o'lmasin!..  
Axir u eng avval insondir.  
Qavmiga qadrli bir jondir.  
Ustozi orzumand osmondir,  
Hech kimning shogirdi o'lmasin.  
Sen o'ychan yurarding, Chorijon,  
O'ylardim - ilhomga yori jon,  
Aytmovding, yengibdi dard pinhon,  
Hech kimning shogirdi o'lmasin.  
G'uzorning dashtida olamdek,  
Armoning sochdi oq tolamdek,  
Beg'ubor eding bir bolamdek,  
Hech kimning shogirdi o'lmasin...  
She'riyat, hamrohsan biz ila,  
Uyingda yuz berdi zilzila,  
Bu ne hol, bahorda zilzila,  
Hech kimning shogirdi o'lmasin.  
Shoir xoh yoshdir, xoh qaridir,  
Ijodi ajaldan naridir.  
Alamdir, bari bir alamdir,  
Hech kimning shogirdi o'lmasin!  
1992

### **SHAROF RASHIDOV XOTIRASIGA**

Marhumlar hayotdan erurlar yiroq,  
Demakki, yiroqlar xushomaddan ham.  
Makru nayranglarin qo'ymaydi biroq,  
Toki hayot ekan Nobakor Odam.

Ularning turfa xil odatlari bor,  
Avval ganjlarini ko'mgay tuproqqa.  
So'ng birdan o'zlarin his etib nochor,  
Gavharim qayda deb tushgay titroqqa.

Dunyoda har kimga qismat yor emish,  
Kimdir toj kiygaydir, kimlardir kuloh.  
Go'yoki Alisher sizga ham dermish:  
"Siyrating darveshu suvratingdir shoh".

Ezgulik niqobin yuziga tortgan  
Manfur bir maydonda surgandingiz ot.  
Kimdir o'z padarin bir pulga sotgan,  
Qo'l-oyoq kishanda, talangan bisot.

O'ychan ko'zingizda ne g'am bor edi,  
Kelajakmida yo moziyning shoni?

O'zbek-ku, bir erkka intizor edi,  
Sizni ado qildi ming bir armoni.

Erksevar ellarning orzusun yoqlab,  
Xayol dengizida tunlar suzgansiz.  
Istiqlol so'zini yurakda saqlab,  
Siz qafas ichida gullar tuzgansiz.

Shoirman, bo'ynimda she'rning gunohi,  
Sohibin asraydi Saltanat makkor.  
Ochko'z, amalparast kimsalar gohi  
Adolat menman deb topgay e'tibor.

Ularning dastidan notinch el, zamon,  
Tanimay qolursan oq-qorani ham.  
Chalg'itib kelganlar topganda imkon,  
Hattoki Temuru Boyqaroni ham.

Odildir - kim elni boshlagan baxtga,  
O'zi o'tda yonib, yo'lni ochganlar.  
Lekin intilarkan toj ila taxtga,  
Vo ajab, ko'pincha dordan qochganlar.

Qulluq, Sharof ota, ming bora qulluq,  
Boqiy O'zbekiston sizga ham yodgor.  
Bugun u istiqlol shavqiga to'liq,  
Xizmatingiz eslar takror va takror.

Ilohi, har kimga bersinu to'zim,  
But bo'lsin Vatanning metin qo'rg'oni.  
Sizni qo'llab turar O'zbekim - o'zim,  
Va, yurtning posboni - jasur o'g'lioni!

Sulton bo'lmasangiz, Sharof ota, gar,  
Yashardingiz qalam qo'ldoshi bo'lib.  
Poklikka, vafoga timsol muqarrar,  
Xursanoy ayaning yo'ldoshi bo'lib.  
1992 yil 2 noyabr

## **XALQ NAQLI**

Xalq naqlni to'qimaydi atayin,  
Naqlarning umri fuzun bo'ladi.  
Mana, sizga bittasini aytayin:  
Yaxshilik qil - tiling uzun bo'ladi.

O'yga solar biroq boshqa bir jihat,  
Yaxshilikni hunar qilgan elimiz.  
Boshimizga yog'ar tinmay malomat,

Ayting, qachon uzun bo'lar tilimiz.  
1992

### IKKI G'ANIM

Qizlarning dushmani husni bo'lsa gar,  
Shoirning dushmani - iste'dodidir.  
Ularning hayotin etguvchi zahar  
Suq bilan hasadning istibdodidir.

Qizlarga suq bilan boqqan har kimsa,  
Porloq yulduzlarga mengzab maqtaydi.  
Shoir iste'dodin dushmani esa,  
Uni oyoqosti qilib toptaydi.  
1992

### MEN KIMGA SUYANGUM

Bir kun savol berdi yoshgina o'g'lon:  
- Nechun Allohim deb yig'laysiz nolon.  
Dedim, javobimdan bo'lmagin hayron,  
Men kimga suyangum Allohdan boshqa.

Tinimsiz aldasa muhit, makoning,  
Tortsa oyog'ingdan do'stu yoroning.  
Shunday o'tar bo'lsa har zum, har oning,  
Men kimga suyangum Allohdan boshqa.

Noshukur emasman dunyoda garchand,  
Qaydadir menga ham bor balki dilband  
Va lekin tiriklay kuydirsa farzand,  
Men kimga suyangum Allohdan boshqa.

Insofu ishonch ham shirin so'z bari,  
Tiriklik toshqindir yoki ko'pkari.  
To hayot ekansan qochgaydir nari,  
Men kimga suyangum Allohdan boshqa.

Shunchalar kaj erur dunyoi gardun,  
Undan diyonatni axtarmoq nechun,  
Padar shod o'z o'g'lin bag'rin etsa xun,  
Men kimga suyangum Allohdan boshqa.

Mingta ko'z poylaydi bitta joningni,  
Joningmas, martabang, balki shoningni,  
O't qo'ymay yoqarlar xonumoningni,  
Men kimga suyangum Allohdan boshqa.



Bu ko'hna dunyoda yashadim nega,  
Yaydoq ot misoli bo'ldim beega.  
Malomat qilurman, olomon, senga:  
Men kimga suyangum Allohdan boshqa.

Mendan ranjimasin bo'lsa do'st agar,  
Balki ularning ham dilida kadar,  
Hoynahoy mendaylar degay muqarrar:  
Men kimga suyangum Allohdan boshqa.

Umr ham oxirlab bormoqda sekin,  
Endi sarg'aymoqda men ekkan ekin.  
Mayli, sen o'zingga suyangil, lekin,  
Men kimga suyangum Allohdan boshqa.  
1992

## MULOQOT

- Baxtsizman, toleim kulmaydi,  
Onajon, qoshingga ketayin.  
- Ketganlar hech qaytib kelmaydi,  
Bardosh qil deyman, oh, netayin.

- Ne uchun dunyoda tug'ildim,  
Bu qadar omadsiz, bechora.  
- O'zim ham bir umr bo'g'ildim,  
Bolajon, noiloj, nachora.

- Ne uchun yovuzdir odamlar,  
Birovi toptaydi birini?  
- Meni ham yedi-ku shu g'amlar,  
Bilmadim bu holning sirini.

- Insonga ishondim - xor bo'ldim,  
Sen deding - bir ishonch sabrdir.  
- O'zim ham ishonchga zor bo'ldim,  
Oqibat topganim qabrdir.

- Bosh urib borarga yo'qdir joy,  
Onajon, qoshingga ketayin.  
- Bolajon, horibsan hoynahoy,  
Bardosh qil deyman, oh, netayin.

- Chorlasang, madadkor bo'lolsang,  
Visoling ruhimi shod etar.  
- Sen ham gar yo'qlikka yo'l olsang,  
Borliqda kim meni yod etar?!  
1992

## **O'ZBEK QOMUSI**

Men bechora bir odamman,  
Ertangi kunim,  
Ne bo'lishin bilmaydigan ojiz bandaman.  
Yeru osmon o'rtasida topmagan qo'nim,  
Botinimda botmon toshu zohir xandaman.

Yolg'izlikning rutubatli ko'chalarida,  
Ne-ne oltin fasllarim o'tdi junjikib.  
She'riyatning tund qorong'u ko'chalarida  
Yiroq-yiroq yulduzlarga boqdim entikib.

Ig'vo, hasad, fitna bilan to'lgan bu hayot,  
Har onimda mingta etdi bir hasratimni.  
Xira tuman orasida butkul koinot,  
G'ira-shira ilg'ar edim mamlakatimni.

Eslar edim Buxoriyni, Yassaviyni ham,  
Ha, ha, ayri tushmagandi xotirotimdan,  
Faqat ular chalinardi ko'zimga mubham,  
Lekin sira ketmas edi xayolotimdan.

Ham Temurbek, ham Ulug'bek, Alisher, Bobur,  
Sizlar tuzgan ul saltanat - Saltanat bo'ldi.  
Ulug' tarix Turkistonga cho'ng guvoh erur,  
Davlat edik, davlat edik, u davlat bo'ldi!

Emukdoshim, ay, qardoshim, quloq tut menga,  
Ushbu ko'hna kahkashonda mag'rur tutgin bosh.  
Sen zaminga loyiqdirsan, zamin ham senga,  
Senikidir endi bu yer, seniki quyosh.

Qo'lingda erk, boshda yalov, tilingda surud,  
Vataning bor, bola-bog'chang, or-nomusing bor.  
O'zbekiston deb atalgan muqaddas hudud,  
O'z Davlating, Mamlakating, o'z Qomusing bor.  
1992

## **XALQNI ASRASANG**

Hech kimsa devor bilan ajralganmas olamdan,  
Vujudingga tutashdir tegrangdagi shu xilqat.  
Yaxshilik qil hammaga, qaytajak o'zingga ham,  
Sen o'zingni asraysan xalqni asrasang faqat.  
1992

## **ODAMIYLIK**

Bir kun to'kin bo'lar yupqa dasturxon,  
Zarbof bo'lmasa ham kiygansan chopon,  
Lekin odamlikni unutar bo'lsang,  
Ularning barchasi hayf senga, inson!  
1992

## **ECHKI**

Hammaga ma'lumdir echkining fe'li,  
Oozonga tushguncha tinch tura olmas.  
Doim egri bo'lgay tanlagan yo'li,  
Hunar ko'rsatmasa jim yura olmas.

Goho nihollarni g'ajiydi obdon,  
Cho'pon tayog'iga teginar goho.  
Suruvni jarlikka boshlar nogahon,  
O'zi chetlab o'tar xatarni ammo.

Bir kuni echkining g'ayrati qo'zib,  
Baland bir qoyaning uchiga chiqdi.  
Boqdi bulutlarga ko'zini suzib,  
Yuksaklik zavqini surdi, miriqdi.

Tog'larga to'shaldi qorayib oqshom,  
Endi qaytib tushmoq kerak-ku axir.  
Izg'irin boshlandi, yo'qoldi orom,  
Na giyoh, na suv bor, qoya tap-taqir.

Qandoq chiqdi u yon, o'zi ham bilmas,  
Qaytib tushmoqlikka topmadi chora.  
Eng yuksak qoyaning ustida xullas,  
Mung'ayib bir o'zi qoldi bechora.

Endi madad so'rab ma'ray boshladi,  
Osmonu falakni ko'tarib boshga.  
Bizning tilda aytsak, ko'zin yoshladi,  
Omad boshqa dedi, falokat boshqa.

Tongda nazar soldi qoyaga cho'pon,  
Echki haykal yanglig' qotganча turar.  
Yurakni ezgudek ma'raydi nolon,  
O'ziga beto'xtov himoya so'rar.

Cho'pon ham chiqolmas bundoq qoyaga,  
U ham noilojdan boshin qashladi.  
Fursatni ketkazmay deya zoega,  
Outqazish yo'lini izlay boshladi.

Bir bora qaynaydi har holda qozon,  
Suruv ro'yxatidan uni o'chirdi,  
Darhol o'qladi-yu miltig'in cho'pon,  
Echkini qoyadan urib tushirdi.  
1993

### **QORAQALPOG'IM**

Men o'zbek, sen esa qoraqalpoqsan,  
Turklar dunyosida sen ham urvoqsan,  
Gar men tuproq bo'lsam, sen ham tuproqsan,  
O'zbekka azaliy qarindosh, inim.

Orol bo'ylarida topganding orom,  
Sholi, baliq edi senga rizqu kom,  
Nahot endi yo'qdir to'lg'izilgan jom,  
Nahot qolding yolg'iz, ko'zda yosh, inim.

Mana - bu Ibroyim, Tulebbergan bu,  
Qoraqalpoq baxtin tilab yurgan bu,  
Yaratgandan haqqin so'rab turgan bu,  
Iloyo boshginang bo'lsin tosh, inim.

Seni qo'llab turar ulug' mamlakat,  
Yurtboshi yaxshilik tilaydi faqat,  
Niyating hamisha bo'lsin ijobat,  
Ham yo'ldosh, ham qo'ldosh, ham sirdosh inim.

Umidvor yashaymiz doril zamonda,  
Birimiz Nukusda yoki Qo'qonda,  
Umuman aytganda O'zbekistonda,  
Senga bo'lajakmiz ko'zu qosh, inim.  
1993

### **O'ZBEKISTONIM, SENGA**

Aylayin qalximni tortiq nurli bo'stonim, senga,  
Sen vatandirsan, fidodir tanda bu jonim senga.

Bebahosan, asragayman gavharim, deb men seni,  
Sen qarog' bo'lsang agarda, sadqa mujgonim senga.

Sendan ayru dam uzundir, lahzalar ham yilga teng,  
Bir umrga lek barobardir kerak onim senga.

Har bir ahling bitta yulduz, kavkabistonim o'zing,  
To hayotdirman, charog'im, shu'layi shonim senga.

Yoru do'stlar jam bo'libdir, to'y qilur o'zbek elim,  
Men degayman xush kelibsan, do'stu mehmonim, senga.

Xizmatingga shay erurman, mehnatingda ham o'zim,  
Baxtiyorman, sarf etolsam borki imkonim senga.

Dilda borim sen uchundir, qo'lda torim sen uchun,  
Qayda bo'lsam talpinurman, O'zbekistonim, senga.  
1993

## **LO'TTIBOZ**

Ne-ne balolarga goho tutildim,  
Ko'pidan, inshoolloh, endi qutuldim.

Boshimga tushdi goh muhtojlik, kulfat,  
Bariga ko'nikib ketdim oqibat.

Tutqin eta oldi na shuhrat, na g'am,  
Qutuldim behuda orzulardan ham.

Bir zamon qolganda chorasiz, yakka,  
Dard xuruj qilgandi o'ksik yurakka.

Necha oy yo'l qarab, to'shakband bo'ldim,  
Shukrkim, darddan ham oxir qutuldim.

Toki, g'olib ekan bosqinchi zoti,  
Qafasda o'tgaydir xalqning hayoti.

Vatan ozod bo'ldi, nash'aga to'ldim,  
Demak, kishanlardan men ham qutuldim.

Ammo bir kasofat qiynaydi hamon,  
Unga bas kelolur na vaqt, na zamon.

Uni daf'atan-da tutib ham bo'lmas,  
Va lekin aylanib, o'tib ham bo'lmas.

Qutuldim necha qish, necha yozlardan,  
Faqat qutulmadim lo'ttibozlardan.

Dargohing buncha keng, oh, Parvardigor,  
Sening marhamating bisyordan-bisyor.

Yaxshisi, o'g'lingga tezlikda sim qoq,  
Degil: Kelmasang gar, oq qilaman, oq!

Magar shoir bo'lsang g'azal yoz, yoz fard,  
Lekin topilmaydi o'qiydigan mard.

Ijro et she'ringni o'zing baralla,  
Degil: qotiribman, uh, barakalla!

Nabirang ko'ngliga izlasang kalit,  
Bir juft chaqich beru o'zingni tanit.

Ulfat izlamagin ko'cha yuzidan,  
Hozir hamma ketgan pulning izidan.

Nihoyat qartayib, horib tolgaysan,  
Barcha tashabbusni qo'lga olgaysan.

Bir kun tramvayga chiqsang hoynahoy,  
Senga biror kimsa bo'shatmagay joy.

Xoli o'rindiqqa tushsa gar ko'zing,  
O'tiring, domla! - de o'zingga o'zing.

Kimlardir tortmasin, tashvish, jabringni,  
Albatta, qazdirib qo'ygin qabringni.

Bir juft so'z o'ydirgin marmar toshga ham:  
- Bu yerda yotibdi Eng Yaxshi Odam!.

Axir tirigingda yo'qlashmadi, bas,  
O'lganingdan so'ng ham hech kim eslamas.

Xullas, yo'qolmagay mehru oqibat,  
Buning chorasini izla, top faqat.  
1994

## **MEHRU OQIBAT HAQIDA BALLADA**

Dema ko'tarildi mehru oqibat,  
Birgina chora bor bunday chog' faqat.

Toki tanangda jon, og'zingda so'zing,  
Endi xabar olgin o'zingdan o'zing.

Xotin nonushtaga olib kirsa choy,  
O'zingni taklif qil: - Ich, falonchiboy!

Tongda ishxonangga qo'ysang gar qadam,  
Jumladan, salom ber o'z-o'zingga ham.

Ilgakka paltongni hurmat bilan os,  
Ko'rsat o'zingga ham sadoqat, ixlos.

Odatda bir kimsa ishga bo'lar g'ov,  
Hayfsan e'lon qilgin o'zingga darrov.

Balki yo'l olarsan uzoq safarga,  
Yiroq qishloqqami, olis shaharga,

Hol so'rab dadangdan, tuqqan onangdan,  
O'zingga maktub yoz borgan joyingdan.

Dema, ko'tarildi mehru oqibat,  
Buning chorasi bor, izla, top faqat.

Tug'ilgan kuningni balki bilarsan,  
O'zingga nimadir sovg'a qilarsan.

Nogoh tushib qolsang kasalxonaga,  
Ko'z tikkil na do'stu na begonaga.

Mushrik bandalaring nahot oz senga,  
Nechun zarur bo'ldi lo'ttibozi senga.

Uning ham odamdek bor yuzi, ko'zi,  
Lekin aldab ketar kuppa-kunduzi.

Manfaat bo'lsa bas, qaytmas balodan,  
Quruq chiqa berar cho'ksa, daryodan.

Uning do'ppisini bunga kiygizar,  
Qisir sigirni ham hatto iygizar.

Uning jinsi yo'qdir, yo'qdir millati,  
Umumbashariydir, ya'ni illati.

Qaraysan, bir go'zal turar, aylab noz,  
Botiniga boqsang, afsus, lo'ttibozi.

Mana bu janob-chi, jilmayar mamnun,  
Aslida libosga o'ralgan maymun.

Rizqing but bo'lsin deb chekkandim nola,  
Qay kun aldab ketdi bir cho'loq bola.

Lo'ttibozi oshnodir ishi bitguncha,  
Eshagi kechuvdan toki o'tguncha.

Iloho, olamda o'zingsan eng sof,  
Bergil ularga ham diyonat, insof.

Qancha sinoving bor, solgin boshimga,  
Ularni yuborma hargiz qoshimga.

Mayli, do'zaxingda qiyna, o'tda yoq,  
Meni lo'ttibozi dach qilma biroq.

1993

## TELEFON DAFTARI

Sira ajab emas,  
Shomdan to sahar  
O'nlab daftarlarga ko'milib qolsam.  
Telefon daftari -  
Lekin, bu daftar...  
Yuragim bezillar, qo'limga olsam.

Unda qancha-qancha do'stu qadrdon,  
Tanish-notanishning nomlari bordir.  
Biri Inson edi, to hanuz Inson,  
Boshqasi, afsuski iblisga yordir.

Biri boyib ketgan, quv, izzattalab,  
Balki o'zgartirgan eski raqamin.  
Birovi, ko'zimning yog'ini yalab,  
Mendan allaqachon uzgan qadamin.

Biroviga esa yoqmabdi mansab,  
Atrofin yaltoqi zotlar o'rabdi.  
Qay kuni qirq yillik do'stiga qarab,  
Isming nima edi, - deya so'rabdi.

Manovi kamtarin, yo'qsil tanishim,  
Ko'ngli o'smasmidi bitta so'zimdan.  
Men ham o'zgardimmi? Mo'lmi yo ishim?  
Bir bor yo'qlamabman. Gina o'zimdan...

Fojia emasdir bu gaplar zinhor,  
Balki qay birini tuzatsa bo'lar.  
Lekin daftar ichra qator va qator,  
Marhum do'stlarimning nomlari turar.

O, mening qalbi pok birodarlarim,  
Qoningiz ne uchun bemahal tindi.  
Siz yo'qsiz - men uchun davralar yarim,  
Kunim kimlargadir qolmishdir endi.

Ha, nomard bo'lsa ham shirin shu hayot,  
Ha, zaqqum bo'lsa ham g'animat zumlar.  
Bilaman, ortiga qaytmas koinot,  
Bilaman, tirilib kelmas marhumlar.

Balki o'chirsammi nomlarin? Aslo!  
Cho'chiyman, o'zimdan dakki yeganday.  
Ular, raqamlarin tersam mabodo,  
Yulduzlar ortidan "Labbay" deganday.  
1994

## **SHARQ HIKMATI**



Taxtga talpinasan g'azabga to'lib,  
Chiqarmoq bo'lasan olamshumul chang.  
Har oyna ko'targan Iskandar bo'lib,  
Temur sanalmagay har qandayin lang.

O'zbekning davlati qaror topgan chog',  
Maymunjon terardi qaysi bir nasling.  
O'z yurtning sha'niga tushirmagin dog',  
Axir odam erur sening ham asling.

Har kim shoh bo'lay der ilojin topsa,  
Uringay, tarixga kelsa ham malol.  
Falak chappa ketib, omading chopsa,  
Sharqning bir hikmatin yaxshi anglab ol:

Podshoh deganlari kunu tun bedor,  
Xalqining mehribon doyasi bo'lur.  
Bejiz aytmaganlar, asl hukmdor,  
Xudoning yerdagi soyasi bo'lur.  
1994

## **MAYNA**

Bog'ning qiy-chuviga quloq tutaman,  
Bu yerda turfa xil qushlar aylanar.  
Sa'va-yu qaldirg'och - o'zi bir jahon,  
Va lekin ko'payib ketmish maynalar.

Bunday olg'ir qushni ko'rmaganman hech,  
Bir cho'qib o'n qarar - tegar joningga.  
Unga farqi yo'qdir: kunduzmi yo kech,  
Dangal sherik bo'lar dasturxoningga.

Yurishini ko'rsang, olifta, satang,  
Balki sepib olgan farang atrini.  
Musicha o'zini eplaydi arang,  
U-chi, yerga urmas sira qadrini.

Ayni pishgan chog'i bog'ingda kishmish,  
Egalik qiladi ekkanday o'zi.  
Yaxshiyam yo'q unda o'ttiz ikki tish,  
Yaxshiyam hamyonni poylamos ko'zi.

Ulgursa yer yuzin aylardi taqir,  
So'ngra bir-birin yeb, topardi barham.  
Dunyoda insofli qushlar ko'p axir,  
Ular soyasida yashar mayna ham.  
1994

## YAXSHILIK VA YOMONLIK

El aro yuradi bir naql,  
Xalq uni takrorlab aytadi.  
Kimsaga yomonlik qilmagil,  
Bir kuni o'zingga qaytadi.

Darvoqe, pand bersang bir jonga,  
U ham tinch turarmi hech zamon.  
Deydilar, tuflasang osmonga  
Yuzingga tushgaydir begumon.

Yaxshilik qilsang-chi, sen, biroq,  
Qaytarmi u senga? Bu mubham...  
Boshini silasang gohi choq  
Oo'lingni tishlaydi iting ham.  
1994

## DUNYO

Bir kimsa umrining so'ngiga qadar,  
Yig'di molu dunyo, yig'di siymu zar.

Uni qiziqtirdi na do'stning holi,  
Va na qo'shnisining o'ksik ahvoli.

U chindan mol-mulkning jilovin tutdi,  
Faqat nafs ortidan ot surib o'tdi.

Bir kuni ba hukmi taqdiri azal,  
Shamshirin ko'tarib keldi-ku ajal.

Endi na siymu zar qutqara olur,  
Na billur, na gavhar qutqara olur.

Rozi yo norizo - farqi yo'q mutloq,  
Bunday choq chorasiz hatto do'st-o'rtoq.

Beshafqat ajalga berar ekan tan,  
U dedi: "Shu ekan, dunyo shu ekan".

Marhumga marhumlik ko'rilgay loyiq,  
Uni qabristonga eltdi xaloyiq.

Uyum tuproq bo'ldi quvonchi-g'ami,  
Kimdir boqib dedi: "Shunga shunchami"...  
1994

\* \* \*

Paydo bo'lganida zamin bir zamon,  
Avval yaralgandir daraxt va hayvon.  
Bul ikki soddani aldamoq uchun  
Aqlini pesh qilib chiqqan so'ng Inson.  
1994

\* \* \*

Odatda ulfatlar bo'lishganda jam,  
Qizishib deydilar: dunyo - biri kam.  
Ajib bir ziddiyat: oxirgi qadah,  
Ortiq bo'lganini o'ylamas hech ham.  
1994

\* \* \*

Bir yo'l chekkasida yotibman nolon,  
Chorasiz bo'lsam-da, men ham tirik jon.  
Ustimga otingning soyasi tushdi,  
Jilovini nari tortsang-chi, nodon.  
1994

\* \* \*

Balki chaman bo'lar dashti Karbalo,  
Balki, behisht mavjud yulduzlar aro.  
Mening O'zbekiston - Vatanim bordir,  
Ularning baridan a'loroq, a'lo!  
1994

## **VATAN**

Agar do'stlar erur sodiq bir-birin qiyratib bo'lmas,  
Agar qilg'il necha fitna alarni ayratib bo'lmas.  
Demishlar: moru qushni bir qafasda asratib bo'lmas,  
Vatandan ayri ko'ngilni bilingki, yayratib bo'lmas.  
Baayni bandi bulbulni chamansiz sayratib bo'lmas.

Vatan deb men bayon qildim, ayo do'stlar, muxammasni,  
Vatanni kim ulug' bildi, aziz bildim men ul kasni.  
Vatan deb jo'sh urar ersa ko'targum boshima xasni,  
Vatandan ayri ko'ngilni bilingki, yayratib bo'lmas.  
Baayni bandi bulbulni chamansiz sayratib bo'lmas.

Nadomat birla boqq'ayman vatansizlarga har doim,  
Egib boshini zor yig'lar, agarchi davlati qoyim,  
Faqir bo'lsam-da bor yurtim - toju taxtim, borar joyim.  
Vatandan ayri ko'ngilni bilingki, yayratib bo'lmas.  
Baayni bandi bulbulni chamansiz sayratib bo'lmas.

Bobolar kechmishin hargiz faromush aylamang, do'stlar,  
Haqiqat tongi otganda ani tush aylamang, do'stlar,  
Agar kim e'tiqodsizdur, ani xush aylamang, do'stlar,  
Vatandan ayri ko'ngilni bilingki, yayratib bo'lmas.  
Baayni bandi bulbulni chamansiz sayratib bo'lmas.

Diyorim O'zbekistondur, ki andin iftixorim bor,  
Demakkim, hur adolatlig', davlati barqarorim bor,  
Onamdek mehribon, munis Vatan bor, g'amguzorim bor,  
Vatandan ayri ko'ngilni bilingki, yayratib bo'lmas.  
Baayni bandi bulbulni chamansiz sayratib bo'lmas.

Vatan, sen hur, yo'ling shonli, qadamni tashlagin shaxdam,  
Faxr-la boqq'ay Abdullo, ko'zida shodligidan nam  
Panohingni tilab Haqdin dilida iltijo har dam,  
Vatandan ayri ko'ngilni bilingki, yayratib bo'lmas.  
Baayni bandi bulbulni chamansiz sayratib bo'lmas.  
1994

## **BUYUKLIK**

Osmonu falakda mo'jaz yulduz - tosh  
Mindi o'z tabiiy tayyorasiga.  
Rosa bo'shliqlarda daydigach bebosh,  
Urildi Mushtariy sayyorasiga.

Mushtariy degani oftob misoli  
Fazo karvonida muhtasham nordir.  
Ne kechdi u sho'rlik yulduzning holi,  
Vazni tog' qoshida zig'ircha bordir.

Buyuklik qudratin sezmay yo sezib,  
O'zi izlab topmish so'nggi marrani.  
Mushtariy samoda milyard yil kezib,  
Axir axtarmagan o'sha zarrani.

Taajjub qilaman, buyuklik asli,  
Tanlagan yo'lidan burilmas ekan.  
Zarra buyuklikka urilgay, ammo,  
Buyuklik zarraga urilmas ekan.  
1994

## **DIL OG'RIG'I**

Qo'l og'rig'i bosilsa  
Dil og'rig'i boshlanar.  
Olis xotiralardan  
Ko'ngil tag'in g'ashlanar.

Sokin o'tgan bir damni,  
Eslolmayman, yo Rabbim.  
Taqdir qo'lida yoydek  
Egilib borar qaddim.

Yaxshi bilan yomonni  
Yetolmayin farqiga,  
Faqat yo'l izlab o'tdim,  
Muhabbatning arkiga.

Bir qarasam, paykondek  
Umr uchib ketmishdir.  
Bilmadim, u chaqin - o'q  
Qay manzilga yetmishdir.

Qaydadir intilganim .  
Muhabbatim qayonda,  
Balki men bu yonda-yu,  
Qalbim esa u yonda.

Inson umri shul ekan .  
Yo'li to'la nadomat.  
Gar vaslingga yetkazsa  
Kela qolgil, qiyomat.

Hayotimning ma'nosin  
Bir nafasga qaytib ber.  
Mayli, so'ngra barchasin  
Doston qilib aytib ber.

Mushkul ekan bu qadar  
Ezgulikka yetishmoq.  
Hayot-ku, bir chistondir,  
Muhabbat ham topishmoq.

Qo'l og'rig'i bosilsa  
Dil og'rig'i boshlanar.  
Olis xotiralardan  
Ko'ngil tag'in g'ashlanar.  
1994

## **VIJDON**

Jahon shoirlari vijdon haqida  
Azaldan ming-minglab baytlar yozmishlar.  
Vijdon-ku, aslida sobit aqida,  
Kimlardir bu yo'ldan goho ozmishlar.

Balki vijdon deya tinmay chekib oh,  
Hayqirib yurmaydi har qanday odam.  
Topilgay bobolar hikmatlarin goh,  
Shunchaki nasihat deguvchilar ham.

Qay bitta narsaga muhtoj bo'lsa gar,  
Eng avval o'shanga topingay inson.  
Mayli, ummon qadar yo zarra qadar,  
Har nechuk qalblarda bor bo'lsin vijdon.

Magar ketar bo'lsa vijdon bosh olib,  
Iymon ham u bilan birga ko'chgaydir.  
Butkul mardu nomard tayanchsiz qolib,  
Choh uzra chirpirak bo'lib uchgaydir.

Devlar qutulgandek Sulaymon o'lib,  
Betizgin tuyg'ular har yon yugurgay.  
Qalb degan istehkom posbonsiz bo'lib,  
Eng avval nafs unga o'zini urgay.

Haqiqat atalmish ravshan quyoshni,  
Ochiq diydalarki, ilg'amas ko'rib.  
Avliyo degaylar so'qir avboshni,  
Adolat o'rnini egallar firib.

Ilojin topsalar har qanday onda  
El-yurtni chalg'itib qo'yarlar oson.  
Gar hakam bo'lsalar biror maydonda,  
Mag'lubni g'olib deb etarlar e'lon.

Kuppa-kunduz kuni kiprik qoqmasdan  
Yolg'on so'zlay boshlar daholar hatto.  
Kimlardir umrida bir sham yoqmasdan,  
Mash'al bo'lmoqlikni qilgaylar da'vo.

Vijdon ketgan joyda albatta bir kun,  
Ilondek qo'zg'olur bo'hton va tuhmat.  
Bu yorug' olamda odamzod uchun  
Bormikan ulardan ortiqroq kulfat.

Vijdonsiz kimsaga duch kelgan nafas  
Kofir ham dod solgay: Asragil, yo Rabb!  
Oddiy bismilloni bilmaydigan kas  
Iltijo qilgaydir qiblaga qarab.

Vijdondan ayrilib qolgan fursatda  
Boshlanar toj-taxtga ruju daf'atan.  
Ne-ne zukko xalqlar qolib g'aflatda,  
To'zg'ib ketajakdir butun bir Vatan.

Ha, o'zing yorlaqa, yaratgan egam,  
Iblis yuraklarga qutqu solmasin.  
Vijdondan mosuvo etmagin hech ham,  
Toki u xotirot bo'lib qolmasin.  
1994

## **ERKINLIK**

Egasi yo'q tulporman,  
Dala-dashtda kezguvchi.  
Uchib yurgan shunqorman,  
Har sharpani sezguvchi.

Qo'lga tushsam tulpor deb  
Ko'pkariga solurlar,  
Yo, bos, qani, shunqor deb  
O'ljasini olurlar.  
1994

## **SHUKUR BURHON**

Azamat bir chinor,  
Aygirgan daryo.  
Undan nariroqda salobatli tog'.  
Tepada poyonsiz haybatli samo,  
Atrofdan ufqqa tutash dala, bog'.

Chinor soyasida ulug' mo'ysafid  
Sokin kuzatadi yeru osmonni.  
U Shukur Burhondir, goho shu taxlit  
Tasavvur qilaman O'zbekistonni.  
1994

## **BOSHPANA**

To hayot ekansan bu olam aro  
Boshingga savdolar tushgay rang-barang.  
Gohida shukr aylab sevinsang, goho  
Juda ko'p narsadan sovir hafsalang.

Yuragingni siqar ming bitta savol,  
Do'st deb bilganingning adovatlari.  
Qiyinar unutilish, mavhum istiqbol,  
O'tgan yo'llaringning nadomatlari.

Deysan nahot g'olib dunyoda iblis,  
Nahot yaxshilikning boshi doim xam.  
Chulg'ab olganida shundayin bir his,  
Qayga qochar eding, bechora odam.

Faqat tabiat bor - ilohiy maskan,  
Faqat o'shanga sen bepisand boqma.  
Loaqal uni sen tanigin, Inson,  
Yolg'iz boshpanangni o't qo'yib yoqma.  
1994

**QAYSAR BOLA**  
*(Qiziqchilar bisotidan)*

Bor ekanu yo'q ekan,  
Bir bola bo'lgan ekan.  
Hammani sensirashni  
U odat qilgan ekan.  
Otani ham sen dermish,  
Onani ham sen dermish.  
Bir kun muallim unga  
Shunday deb tanbeh bermish:  
Sensiraysan hammani,  
Shu jumladan meni ham.  
Bunday xunuk odatni  
Tashlagin endi, ukam.  
Mening bir maslahatim  
Natija berar balkim.  
Siz deyman deb barchani  
Yuz marta yozib kelgin.  
Ertasiga bolakay  
Vazifani bajarmish.  
Aytganini yuz emas,  
Ikki yuz bor qaytarmish.  
Muallim shod: .Men senga,  
Ha, ishongan edim-da..  
Bola dermish: .Seni bir  
Xursand qilay dedim-da..  
1994

\* \* \*

Olamda hech narsa emas yagona,  
Besh panjang misoli turfa zamona.  
Agar bir oqilni uchratsang, bilki,  
Unga to'g'ri kelgay yuzta devona.  
1994

\* \* \*

Paymonalar o'z-o'zidan to'lgan emas,  
Mangulik ham bir lahzada bo'lgan emas.  
Hoy raqibim, alay-balay dema menga,



Men o'lmayman, chunki bobom o'lgan emas.  
1994

\* \* \*

Ishlari ig'vo-yu tuhmat va riyo,  
Aldamchi, haromxo'r, iymonsiz balo.  
Agar ularni ham yaratgan bo'lsang  
Kimdan gina qilay endi, ey xudo.  
1994

\* \* \*

She'rim, aytgan so'zim, ba hukmi zamon,  
Tarqalib ketdilar hammasi har yon.  
Qalblarda tinch-totuv yasharmi ular,  
Bozor iqtisodi bilan yonma-yon.  
1994

## **BAYRAM**

Toki tirik ekan dunyoda odam,  
Unga hamroh erur goh shodlik, goh g'am.  
Ertang ne bo'lishin bilmasman ammo,  
Tinch o'tgan har kuning, albatta, bayram.

Yordan ayri kechsa - har lahza abas,  
Vafosiz do'stni ham do'stim dema, bas.  
Keng jahon sen uchun bo'lmasdan qafas,  
Tinch o'tgan har kuning, albatta, bayram.

Demagil, chopqirdir omadim manim,  
Hech qachon belanmas loylarga sha'nim.  
Ustingdan yozmasdan bir nomard g'anim,  
Tinch o'tgan har kuning, albatta, bayram.

Oddiy narsalarni ko'zga ilmay goh,  
Olis yulduzlar deb chekamiz oh-voh.  
Boshingni qotirmay yoningdagi moh,  
Tinch o'tgan har kuning, albatta, bayram.

Olamda bazmu aysh uchrar alomat,  
Bemorga bormikan undan halovat.  
Mayliga yovg'on ich, lekin salomat,  
Tinch o'tgan har kuning, albatta, bayram.

Eng avval tinch bo'lsin ko'ksingda vijdon,  
Tinch bo'lsin elu yurt, Vatan jonajon.

G'uborga chulg'anmay shu yeru osmon,  
Tinch o'tgan har kuning, albatta, bayram.

Yashashning shavqin sur sira tolmasdan,  
She'ring yoz, paysalga endi solmasdan.  
Faqat qartayganda sevib qolmasdan,  
Tinch o'tgan har kuning, albatta, bayram.  
1994

## **XOTIRA**

Mag'ribda yovuzlik ko'targanda bosh,  
Siz sodiq qoldingiz ezgu niyatga.  
Yomg'ir yopinchi'g'u yostig'ingiz tosh,  
Qalqon bo'loldingiz insoniyatga.

Ona yurt bag'ridan juda ham yiroq,  
O'zga manzillarda topshirdingiz jon.  
Hanuz ko'ksimizni tirnaydi firoq,  
Garchi siz muzaffar, g'olib, qahramon.

Garchi Vatan sizni hamisha yodlar,  
Lekin armoningiz sig'mas qabrga.  
Hali tug'ilmagan ne-ne zuryodlar,  
Barchasi ketdilar siz bilan birga.

Zaminda charx urar ruhingiz bedor,  
Qolgan tiriklarning tinchini o'ylab.  
Charx urar, Chotqolga termulganча zor,  
Qarshining bepoyon dashtlari bo'ylab.

Ozod O'zbekiston bosh egib bu kun,  
Shahid farzandlarin nomini yo'qlar.  
Qay biri bedarak, qay biri beun,  
Uzoq sarhadlarda jimgina uxlar.

Manguga tinmishdir qalb tug'yonlari,  
Endi xotirangiz yo'ldoshdir bizga.  
Xalqimning fidoyi mard o'g'lonlari,  
Allohning rahmati yog'ilsin sizga.  
1994

## **ADOLAT**

Yo'qsilga dedilar: Da'voyingdan kech,  
Mana ol, siymu zar senga kafolat.  
Yo'qsil ular gapin tinglamadi hech,  
Adolat, dedi u faqat, adolat!

Badavlat kimsaga berdilar savol,  
Dedilar: Nima bor kuchliroq puldan?  
U javob qaytardi: - Qo'rqaman alhol,  
Adolat axtargan o'sha yo'qsildan.  
1994

## **XALQ**

Hamma narsa o'tadi, mansab, shonu shavkat ham,  
Shirindan shirin qolur, talxdan esa qolur talx.  
Bir kuni tuproq bo'lur, tengsiz shamsi tal'at ham,  
Faqatgina xalq yashar, faqatgina qolur xalq.

Gohida ko'zda yoshu gohida xandon bo'ldik,  
Gohida bolg'a bo'lsak, gohida sandon bo'ldik,  
Axiyri kulib tole, sohibi davron bo'ldik,  
Faqatgina xalq yashar, faqatgina qolur xalq.

Nomingni qaro degan - paxtaginam, senmisan,  
Lo'ppi deya yutganim - laxtaginam, senmisan,  
Avaxtada bosh urgan taxtaginam, senmisan?!  
Faqatgina xalq yashar, faqatgina qolur xalq.

O'zbekning peshonasin po'latdan yaratmishdir,  
Yumushini malomat, zahmatdan yaratmishdir,  
Bir so'z bilan aytganda - mehnatdan yaratmishdir,  
Faqatgina xalq yashar, faqatgina qolur xalq.

Tinglasang tuganmaslik afsonasi bor bu el,  
Sarkardasi, shoiri, taronasi bor bu el,  
Ming oqilga arzirlik devonasi bor bu el,  
Faqatgina xalq yashar, faqatgina qolur xalq.

Farishta emasdirmiz, ushbu gapim sir emas,  
Har uchragan eshonu, har sallalik pir emas,  
Lekin dasturxon haqqi, ko'nglimiz hech kir emas,  
Faqatgina xalq yashar, faqatgina qolur xalq.

Janggohlarda jon bergan bobolarni unutmang,  
Moshog terib non bergan momolarni unutmang.  
E'tiqod, iymon bergan duolarni unutmang,  
Faqatgina xalq yashar, faqatgina qolur xalq.

Amalparast, lo'ttiboz bo'lmagan qachon axir,  
Sak bir nima yemasa og'zi bo'larmish taxir,  
Bizning barchamiz shohmiz, bizning barchamiz faqir!  
Faqatgina xalq yashar, faqatgina qolur xalq.

O'tganlarni yod etmoq qolgandir shariatdan,  
Inson sharafi yuksak millatu tariqatdan,  
O'zbekka bul fazilat yuqmishdir tabiatdan.  
Faqatgina xalq yashar, faqatgina qolur xalq.

Olimmi yo paxtakor, kim bo'lmasin - odamdir,  
Ya'ni Alloh bandasi - har biri bir olamdir,  
O'zbekim o'z validam, o'zbekim o'z otamdir,  
Faqatgina xalq yashar, faqatgina qolur xalq.

Ayon gapki, adolat elning ko'z, qoshi bo'lur.  
Urgani un oshi-yu, so'ksa so'k oshi bo'lur,  
Yurt og'irin tortolgan asli yurt boshi bo'lur,  
Faqatgina xalq yashar, faqatgina qolur xalq.

Kattakon yo'lga chiqding, yo'ldoshing bo'lay, xalqim,  
Farzandingman, qo'llaysan, qo'ldoshing bo'lay, xalqim,  
Hasrating ko'p dilingda, dildoshing bo'lay, xalqim,  
Faqatgina xalq yashar, faqatgina qolur xalq.  
1994

## **BURGUT QISMATI**

Quloqqa chalinar gohi-gohida  
Shunday bir rivoyat, shunday bir o'git:  
Nochoru noiloj qolgan chog'ida  
O'zini toshlarga urarmish burgut.

Men senga iltijo qilurman, egam,  
Agar-chi tilimda shukronang bisyor.  
Mehringdan mosuvo etma meni ham,  
Do'stlarga zor etma, dushmanlarga xor.

Oqil bo'lsa hamki, bo'lsa-da nodon,  
Roziman, beribsan farzand yaratib.  
Qartaygan chog'imda, tilanchisimon  
Sen ular qo'lga qo'yma qaratib.

Kulbai vayronam yetar menga, bas,  
Yashayman sabrning koshonasida.  
Iloyo, bosh egib yurmayin besas  
Takabbur zotlarning ostonasida.

Qarayman sarg'aygan tund quyoshimga,  
Sekin og'ib borar umrning tuni.  
Magar rahm etmasang, tushsin boshimga,  
Mayli, o'sha nochor burgutning kuni.  
1994

## **ABDULLA QODIRIYNING SO'NGGI SABOG'I**

Biringiz Otabek, biringiz Kumush,  
Doim yashnab tursin sevgingiz bog'i.  
Haqiqiy muhabbat bilmasin so'lish,  
Ustoz Qodiriyning bu ilk sabog'i.

Adib yuragida alamlar qat-qat,  
Lekin bittasi bor, o'chmasdir dog'i:  
Jonni tik ozodlik yo'lida faqat,  
Bu esa ustozning so'nggi sabog'i.  
1994

\* \* \*

Dunyoda ajib bir hikmat mavjuddir:  
Agar bo'lmay desang baxtingdan judo,  
Agar yashay desang rozi bir umr,  
Vataning tinch bo'lsin, Vatan avvalo.

Dunyoda ajib bir hikmat mavjuddir:  
Agar bo'lmay desang Vatandan judo,  
Munosib bo'la bil unga bir umr,  
Vatanga joningni qilolgin fido.  
1994

\* \* \*

Achinma, shoirga xorligi uchun,  
Yoki parcha nonga zorligi uchun.  
Bilib qo'y, aslida yashaydi shoir,  
Dunyoda muhabbat borligi uchun.  
1994

\* \* \*

Chinor soyasidan bahramand bo'lib,  
Turfa xil ertaklar to'qimoq oson.  
O'zing ham ertaning tashvishin qilib,  
Qaydadir bir nihol ekdingmi, Inson.  
1994

## **ARMON EMASMI**

Lolazor qirlarda chopla bilmasman,  
Axir u men uchun armon emasmi?  
Bolalik yillarim topa bilmasman,  
Axir u men uchun armon emasmi?

Xayol gulshanida tersam chechaklar,  
Jajji nabiramga bo'ldim ermaklar,  
Endi onam aytmas menga ertaklar,  
Axir u men uchun armon emasmi?

Qorong'u tunlarda olovlar yoqib,  
Ilk she'rim yozgandim yulduzga boqib,  
Endi axtaraman ko'zoynak taqib,  
Axir u men uchun armon emasmi?

Qancha zot dunyoga keldiyu ketdi,  
Birin dushman etsa, birin do'st etdi,  
Birining boshiga shon-shuhrat yetdi,  
Axir u men uchun armon emasmi?

Meni aldab ketdi lo'ttibozi olchoq,  
Ishongan kishim ham ko'rsatdi yaroq,  
Ularni xudoga topshirdim biroq,  
Axir u men uchun armon emasmi?

Shukrona aytaman, do'stlarim bordir,  
Biri balki qo'rqoq, birisi botir,  
Yaxshilik qildimmi ularga axir,  
Axir u men uchun armon emasmi?

Goho esh bo'lsam-da siyosatlariga,  
Qalbimni baxsh etdim malohatlarga,  
Ular deb qoldim men malomatlarga,  
Axir u men uchun armon emasmi?

Ogohman ishq degan ko'hna shevadan,  
Muhabbat atalmish tansiq mevadan,  
Ortga qaray-qaray qaytdim Xivadan,  
Axir u men uchun armon emasmi?  
1995

## **AMUDARYOGA**

Kimligimni bilar edim ozroq,  
Bilar edim suyukligimni.  
Amudaryoni ko'rganda biroq  
Bilib qoldim buyukligimni.  
1995

## **SHOIRA ZULFIYA OPAMIZGA**

O'tgan yillar uchun chekmang xijolat,  
Uzr so'raybermang yuragingizdan.

Xijolatin tortsin o'zi tabiat,  
Tabiat uzrini so'rasin sizdan.

Zahmatkash, mehnatkash shu qalam bilan,  
Buyuk asrimizning siz ham naqlisiz.  
Davrga goh quvonch, goh alam bilan,  
Baho bermoqlikka siz ham haqlisiz.

Tabarruk bir yoshga yetibsiz omon,  
Allohim kun bersa adog'i bo'lmas.  
Agar yuraklarni zabt etsa inson,  
Undayin umrning sanog'i bo'lmas.

Qorong'u tunlarda olovli so'zni,  
Kimki mash'al qilsa tole unga yor.  
Baxtli ayolman deb atabsiz o'zni,  
Sizday shoiri bor xalq ham baxtiyor.  
1995

### **SHOIRNING O'G'LI**

Deysan, molu mulk yo'q sizda ziyoda,  
Holbuki, shoirsiz, Vatanda nomdor.  
Oh, o'g'lim, bu ko'hna, bir kam dunyoda,  
Kimdir kamtarroq ham yashashi darkor.

Nomimiz eshitsa kimdir uchungay,  
Arziydi badavlat, tug'liman desang.  
Balki, do'stlaring ham to'g'ri tushungay,  
Abdulla Orifning o'g'liman desang.  
1995

### **BARAKAGA TO'LSIN UYINGIZ**

Onalar, opalar, singillar,  
Muborak bo'lsin bu to'yingiz.  
O'zbekcha aytganda, har doim  
Barakaga to'lsin uyingiz.

Onalar, opalar, singillar,  
Shodlikka jo'r bo'lsin kuyingiz.  
Faqat bolalarning baxtini o'ylab,  
Kechar bo'lsin ezgu o'yingiz.

Onalar, opalar, singillar,  
Hayotning shavqini tuyingiz.  
Vatanni jondan ham ortiqroq,  
Allohim qadarli suyingiz.

Onalar, opalar, singillar,  
She'rimni faxrga yo'yingiz.  
Bir do'stim degandi so'nggi dam,  
Onamning yoniga qo'yingiz...  
1996

## **KO'ZMUNCHOQ**

Men ellik beshdaman,  
Otam besh yoshda.  
Bu ajib holatni chiston etgulik.  
Mening umrim kechar tuproqda, toshda.  
Otamning dovrug'i ko'kka yetgulik.

Istiqlol beshigi, o, Ota makon,  
Har bir qadamingga sadaqa jonlar.  
Lahzada kuch yig'ding Alpomishsimon,  
Yaloving bo'loldi moviy osmonlar.

Yerparchin yotganda tilim - zabonim,  
Yuksal, deding menga, sayragin, deding.  
Oyoqqa qalqqanda Sohibqironim,  
Yov bossa, tig'ingni qayragin, deding.

Ko'zingga surt deding, faromush bo'lgan  
Tabarruk, muqaddas mozorlarimni.  
Bir zotga aylandim - tolei kulgan,  
Ketkazing dildagi ozorlarimni.

Hasad bilan to'lgan bu ko'hna ochun  
Senga ham suq bilan tikilar, bilsang.  
Seni balolardan asramoq uchun  
Beray ko'zlarimni, ko'zmunchoq qilsang.

Endi erk abadiy yo'ldoshing bo'lgay,  
Noming bor jahonda - do'stparvar, hotam.  
Iymonli har bir kas yo'ldoshing bo'lgay,  
Ey, mening besh yoshli Pahlavon otam!  
1996

## **TAFSIR**

Tuzumlar o'zgarsa ham,  
Inson o'zgarmas ekan.  
Tizimlar o'zgarsa ham  
Inson o'zgarmas ekan.  
Jaholat davrida ham  
Avliyo - avliyodir.  
Kaforat davrida ham



Anbiyo - anbiyodir.  
Balki davron yo'rug'i  
Aslan to'g'ri bo'lgaydir.  
Lekin ming bor dod dema,  
O'g'ri - o'g'ri bo'lgaydir.  
Har qadamda bir masjid  
Qurganing bilan, inson,  
Insof bermasa, hech kim  
Muslim bo'lmas hech qachon.  
Ko'pkariga kiringanning  
Halollik erur dardi.  
Lekin ular safida  
Ot surar bir nomardi.  
Gohida sadoqatli  
Do'stlaring qolib bir yon,  
Yo'lin topib, qo'yningga  
Kirib olgaydir ilon.  
Mo'min deb atar o'zin  
Goh yaxshi ham, yomon ham.  
Qaysi biri haq erur?  
O'zi bilgaydir Egam.  
Tuzumlar o'zgarsa ham  
Inson o'zgarmas ekan.  
Tizimlar o'zgarsa ham  
Inson o'zgarmas ekan.  
Shul boisdan Payg'ambar  
Ummat g'amin yeganlar.  
Allohdan boshqasiga  
Sig'inmagin, deganlar.  
1996

## **XAYOL**

Xayolga berilma, birodar,  
Qush kabi nazar sol olamga.  
O'ylamay mehr qo'y odamga,  
Xayolga berilma, birodar.

Xayolga berilsang mabodo,  
Ko'p noxush narsalar ko'ringay.  
Ilohlar iblisdek suringay,  
Xayolga berilsang mabodo.

Xayolga berilsang nogahon  
Ko'ringay Furqatdek to'g'ri ham.  
Ko'ringay shu nomlik o'g'ri ham  
Xayolga berilsang nogahon.

Xayolga berilsang, ochilgay  
Qarshingda bir go'zal surati.  
Ayni choq alvasti siyrati  
Xayolga berilsang, ochilgay.

Xayoling aldaydi ehtimol,  
Dunyoda diyonat bor deya,  
Daydi bir kuchukni nor deya  
Xayoling aldaydi, ehtimol.

Xayoling puch bo'lmas, inshoolloh,  
Sen faqat fanoni o'ylasang.  
Sen faqat baqoni o'ylasang,  
Xayoling puch bo'lmas, inshoolloh.  
1996

### **MAQTANCHOQLAR**

Bir kuni yig'ildi uchta maqtanchoq,  
Har kim o'z yutug'in so'ylay boshladi.  
Eng yuksak marrani zabt etgan qay choq?  
Boshlarin qashlashib o'ylay boshladi.

Birinchisi dedi: - Men aytsam agar,  
Omad degan narsa dunyoda bor-da!  
Hali aholisi bundan bexabar,  
Ulkan bir shaharni yutdim qimorda.

Ikkinchisi dedi: - Murodga yetdim,  
Ne-ne zukkolarning oldim aqlini.  
Kuppa-kunduz kuni o'marib ketdim  
Mashhur bir shoirning qalam haqini.

Uchinchisi dedi: - Asli men g'olib,  
Jasorat barq urar qilgan ishimda.  
Qaysi kun ko'rpaga burkanib olib,  
Boshlig'imni so'kdim boplab... ichimda!  
1996

### **ESKI CHORIQ**

Oldingda turibdi to'kin dasturxon,  
Endi unut bo'lgan go'jang-tarig'ing.  
Balki eslamassan, qayda bu zamon,  
O'sha, sudrab yurgan eski chorig'ing.

Tasmadan bog'langan oddiy poyafzal  
Garchi yo'qsillikning misoli erur.

Bilsang, u men uchun ming darsdan afzal,  
Dunyo hikmatlarin timsoli erur.

Bir kuni qutulib zulmat-soyadan  
Omad narvonida ko'targaysan qad.  
Lekin bu omonat pillapoyadan  
Balki yiqitgaydir seni ham hasad.

Shunda tashlab qochar ne-ne do'st, yoron,  
Axir ular uchun so'ngan yorug'ing.  
Og'zi qulog'iga yetgancha shodon,  
Seni kutib olar o'shal chorig'ing.  
1996

## **IKKI KALAMUSH**

Kalamushlar, kalamushlik ishi qolib,  
Talashardi uyasidan chiqib olib.

Men adirning bu yog'idan, derdi biri,  
Men adirning u yog'idan, derdi biri.

Ikkisi ham qo'ymadi hech kerilarin,  
Bir kun ovchi shilib ketdi terilarin.

Aytganlarim hikmat emas, masal emas,  
Har kimga ham yoqadigan asal emas.

Ochiq gap shul: ajratmangiz yeringizni,  
Toki shilib ketmasinlar teringizni.  
1996

## **(Turkum)**

### **XALQARO ANJUMAN**

Mana, o'tsa hamki necha zamonlar,  
Bu yerda yig'ilar siyosatdonlar.

Afriqolik habash, bolqonlik bulg'or,  
O'risu Rumo Chin - bunda bari bor.

Biri muslim bo'lsa, biri butparast,  
Biri nasoron-u, biri o'tparast.

Biri tund, birovin nazari issiq,  
Biri menga o'xshar - ko'zlari qisq.

Sariyga o'ralgan birin sumbati,  
Birovin boshida tustovuq pati.

Turfa tillar bunda boshlasa bozor,  
Xudodan boshqaning farqlashi dushvo

Bu yerda o'tgaydir na pul, na savlat,  
Bu yerda o'z so'zin aytar har davlat.

Notiqlar va'zlarin toki boshlaydi,  
Muhtasham gaplarni qalab tashlaydi.

Goho qay birovi qizishgani dam,  
Sipqoraman deydi ummonlarni ham.

Tunu kun bahs qilib bo'ylashar ular,  
Dunyoning taqdirin o'ylashar ular.

Qo'shni fin so'raydi sekin, aylab noz:  
Janob, Siz kim uchun bergaysiz ovoz?

Men ham esnayman-u, ko'krak keraman:  
O'zbekiston uchun ovoz beraman!  
1996

## **JENEVA**

Jeneva,  
Jeneva,  
Necha kunlarim  
Sening iliqqina bag'ringda o'tdi.  
Tashvishli damlarni yurak unutdi,  
Moviy bo'shliqlarga singdi unlarim.  
Zangori ko'l uzra chayqalar oqqush,  
Mayin patlariga to'lqin yuqmaydi.  
Yiroqda Monblan tog'i uxlaydi,  
Oppoq qor choyshabin tagida behush.  
Yashil maysazorning ipak qatiga  
Ninachi shabnamdan qadaydi durlar.  
Quyuyq daralarda potrar qarqurlar,  
Jar solib tevarak, mamlakatiga.  
Cho'qqilar ortidan o'rmalar bulut,  
Birdan tinib qolar o'tloqdagi toy.  
Shivalab o'tadi yomg'ir, hoynahoy,  
Borliqqa cho'kadi novvotrang sukut.  
Jeneva tin olar ma'sum va yovvosh,  
Billur tomchilarda nozik yaltirar.  
Zum o'tmay yana sho'x barglar qaltirar,  
Yana ko'rinadi jilmaygan quyosh.  
Jeneva,  
Jeneva  
Ilhom yulduzi,

Seni tushlarimda balki ko'rgayman.  
Balki uzoq yillar eslab yurgayman,  
Seni - Yevropaning dilovar qizi...  
1996

## **MUXBIRLAR**

Odam ko'kka uchdi,  
Quchdi ummonni.  
Yetdi poyoniga kurash, ur-surlar.  
Gij-gijlatib qo'yib telba jahonni,  
Bu kun minbarlarga chiqdi muxbirlar.

Aziz kasbdoshlarim,  
G'alat qavm bu,  
Jonining qadrini bilmaydigan kas.  
Qaydadir ko'rinsa yilt etgan mavzu,  
Och-nahor, piyoda keta berar, bas.

To'plar gumburlaydi,  
O'rlaydi olov.  
Yuksak qasrlar ham qulaydi bir-bir.  
Butkul mamlakatlar yonadi lov-lov,  
U esa tirikdir, o'q o'tmas, dovdur.

Garchi ko'rinishdan yuvvosh va g'arib,  
Lekin tahlikaga solar har so'zi.  
Shahardan hammani quvlab chiqarib,  
Bo'm-bo'sh ko'chalarda kezar bir o'zi.

Yagona quroli qog'oz va qalam,  
O'ylar u na bugun, na ertasini.  
Haqiqat yo'lida so'nggi damda ham  
O'lar, esga olib gazetasini.  
1996

## **SOG'INISH**

U uzoq joylarga qilmasdi safar,  
To'kmang derdi ko'zdan jolalarimni.  
Derdi: Bir kungina ko'rmasam agar  
Sog'inib qolaman bolalarimni.

Bedavo bir dardga chalindi sho'rlik,  
Dedi: Endi qaytib turmasam kerak.  
Bo'g'ziga tiqilib kelsa ham xo'rlik,  
Bariga chidadi, bosiq va tiyrik.

Ketar chog'ida ham yo'qlikka tomon,  
U taqdir hukmiga mardona ko'ndi.  
Faqatgina dedi: - Qiynar bir armon  
Meni bolalarim sog'inar endi...  
1996

## **OQ YO'L**

*Do'stim Maralga*

Sayroqi qushlarning tindi navosi,  
Anvoyi gullar ham so'ldi bog'imda.  
Bu g'urbat kunlarning bormi adosi,  
Allohim, oq yo'l ber, ketar chog'imda.

Olis adirlarda tumanmi, tutun,  
Tegramni zulumot qoplamish butun.  
Meni halok etar bu savdo bir kun,  
Allohim, oq yo'l ber, ketar chog'imda.

Hech kim hasratimga quloq solmadi,  
Ruhimni biror zot anglay olmadi.  
Bunda qiladigan ishim qolmadi,  
Allohim, oq yo'l ber, ketar chog'imda.

Qog'ozim qoraydi dildagi zordan,  
Bugun ayri tushdim do'st ila yordan.  
Faqat bir ilinjim sen - Biru Bordan,  
Allohim, oq yo'l ber, ketar chog'imda.

Mayli, samolarga meni elta qol,  
Yumushing bajaray qaddim egib dol.  
Sening huzuringda yo'q axir zavol,  
Allohim, oq yo'l ber, ketar chog'imda.

Mana, oqshom cho'kdi. Bo'zarmoqda oy,  
Boshlanur yulduzlar bazmi hoynahoy.  
Menga ham baxsh etgil tumorchalik joy,  
Allohim, oq yo'l ber, ketar chog'imda.  
1996

## **SUHBAT**

Odam odam bilan uchrashgan asno  
Dunyoda eng yaxshi vosita - suhbat.  
Ba'zi birov bilan so'zlashsang, ammo  
Aralashib qolar oraga g'iybat.

Sizdan o'tinaman, ey, do'sti yoron,  
Diydorning g'animat gashtin suraylik  
Mayli, har qanchalik bo'lsa ham yolg'on  
Faqat ezgulikdan suhbat quraylik.  
1996

### **KULMANG...**

Och odamning ustidan kulmang,  
Yetishmasa ishga qurbati.  
Xunukkina qizlarni siylang,  
Go'zal bo'lar ular siyrati.

Birovlarning haqqin yeganni  
Dasturxonga yo'lata ko'rmang.  
Rostni ko'rib, yolg'on deganning  
Kosasini to'lata ko'rmang.  
1996

### **OQLAR VA QORALAR**

Hozir rang ajratish zamoni emas,  
Har qanday ishora qalbni yaralar.  
Va lekin bir-birin har zum, har nafas  
Qo'llab-qo'ltiqlarkan zangi - qoralar.

Odamzod xolimas kindan, aldovdan,  
Qilmaysan, kim-kimni goho saralar.  
Oqlar g'ijillashib turganda, g'ovdan  
Sakrab o'tib ketar birdan qoralar.

Birodar, gapni sen ko'rgandan so'ra,  
Demagil, she'ringda sharpa oralar.  
Bir-birin yeb yotgan oqlardan ko'ra,  
Afzal-ku hamjihat o'sha qoralar.  
1996

### **"JAMAYKA"**

Bir vaqt Robertina ismlik bola  
"Jamayka, Jamayka" deya kuylardi.  
Yurakning tubiga yetib bu nola,  
Olis Jamaykani har kim o'ylardi.

O'sha gul diyorni ko'rganmisan sen,  
Ilojin topolsang qanot bog'lab uch.  
Axir o'ylabmidim, Jenevada men  
Ayni Jamaykaga kelurman, deb duch.

Yoyib kokillarin, turibdi sanam,  
Qop-qora tun bilan o'ralgandek oy.  
"Ming bir kecha"dagi ertaklarda ham  
Tavsif etilmabdir bundayin chiroy.

Kimning peshonasin bezaydi bu la'l,  
Kimlarga hadya bu oppoq tabassum.  
Jamayka go'zali, o, tengsiz go'zal,  
Bir nafas shoshmay tur, qilg'il tarah

Boqib jamolingga, yuragimda mung,  
Olis yoshligimni esga olayin.  
Ortingdan "Jamayka, Jamayka", deb  
U sirli qo'shiqni kuylab qolayin.  
1996

### **HABASH QIZ**

Nari ketolmayman bir habash qizdan,  
Juda o'xshar ekan Senga ko'z-qoshi.  
Bilmadim, o'sha payt, qay biringizdan  
Nusxa olgan ekan falak naqqoshi.

Loyingiz barobar qorgandir Xalloq,  
Ayni ilhom chog'i ijod etgandir.  
Anavi habashning nusxasi biroq  
Xumdonga uzoqroq qolib ketgandir.  
1996

### **HIMOYAT**

Dilimni ezadi gohida xayol,  
Gumonlar, shubhalar zabtiga olgay.  
Vaqt yetib, tiriklik topganda zavol,  
Nahotki baytlarim egasiz qolgay.

Axir vayron bo'lur qarovsiz uy ham,  
Bog'bonsiz gulshan ham so'lgay bir kuni.  
Asriy imoratlar yemrilgay kam-kam,  
Kimdir himoyatga olmasa uni.

Lahzada ming bora turlanadi rang,  
Sobit bir suratni topmog'ing qiyin.  
Bugun salom bersa agar nabirang,  
Yaxshisi, alik ol yuz yildan keyin.  
1996

### **SO'NGGI CHORA**



Odamlar yo'lida xarsangtoshday zil,  
Erta-kech ko'ndalang yotishdan saqlan.  
Fursating o'tdimi - maqomingni bil  
Bekatta o'tirgich bo'lgil, masalan.

Agar o'qimasa she'ringni birov,  
Malomat qilmog'ing, albatta, g'alat.  
Yaxshisi, do'konni yopgin-da darrov,  
Zehningni o'zga bir yumushga qarat.

Boshqa fojiadan asrasin ammo,  
Hech kim duch kelmasin unga daf'atan.  
Sendan elu yurtning tonmasin aslo,  
Sendan o'girmasin yuzini Vatan.

Unday choq, buzsang ham dodlab jahonni  
Hech kim hayron bo'lmas, hech kim qolmas lol  
Agar topa olsang bir gaz arqonni,  
O'zingni osa ber endi bemalol.  
1996

## **O'GIT**

Bolangni o'g'rilar tunabdi yo'lda,  
Lekin uh tortasan, ichingda nolang.  
Deysan, o'g'lim, sen ham dadilroq bo'l-da,  
Biroq, tanbehingni eshitmas bolang.

U deydi: - Bormi hech dunyoda insof,  
Yo'limni to'sdilar, kuppa-kunduzi.  
Bolam, sen hozircha shabnam kabi sof,  
Ayni farishtaning o'zisan, o'zi.

Nega? - deb atrofga boqasan hayron,  
Ilk bor duch kelibsan bunday baloga.  
Mening gaplarimni tinglagin obdon,  
O'g'lim, ishonma hech noqis dunyoga.

Duch kelgan kimsani pokdomon bilib,  
Hargiz diling ochma, bo'lmagil yo'ldosh.  
Insonlar uchraydi, bir ko'zi kulib,  
Ikkinchi ko'zida tayyor turgay yosh.

Insonlar uchraydi, taomingni yeb,  
Toptab keta berar dasturxoningni.  
Chumoli qadarli manfaatni deb,  
Chumolicha ko'rmas sening joningni.

Insonlar uchraydi, ko'kda oyni ham  
O'zining mulki deb bilgaydir faqat.  
Sening quvonchlaring ularga alam,  
Sening zarra baxting ularga kulfat.

U payt qulog'ingga aytguncha azon  
Ogoh etmasmidim buning baridan.  
Ishonch degan bir so'z o'chdi nogahon.  
O'spirin umringning sardaftaridan.

O'g'lim, odamiylik azizdir garchand,  
Yostig'ing ostida tursin yarog'ing.  
Dunyo har qadamda bergay senga pand,  
Aslo mudramagay ikki qarog'ing.

Ezgulik yo'lida ko'pdir muammo,  
Undan qutulmoqning yo'li bul ekan:  
Insonga yo'liqsang inson bo'l, ammo  
Hayvon yo'liqqanda Hayvon bo'l ekan.  
1996

### **BOSHMANBULOQQA**

Boshmanbuloq, Boshmanbuloq,  
Senga ko'zu qoshman, buloq.  
Suvindan bir qonib ichdim,  
Endi mangu yoshman, buloq.  
1996

### **UMMON ORTIDAGI MAKONIM**

*(Vashingtonda O'zbekiston elchixonasining yangi binosi ochilishi munosabati bilan yozilgan she'r)*

Keng jahon bir qadam bo'ldi men uchun,  
Menga ham ochildi olam darchasi.  
Yiroq Amriqoda taft sochar bu kun.  
O'zbek quyoshining olov parchasi.

Ochildi men uchun tor osmon bekam,  
Kezdim yuksaklikning cho'ng darg'asini.  
O'zbekning lochini ozod va ko'rkam,  
Qurdi bu yerda ham qo'nalg'asini.

Nechun xushnud bo'lmay, dilimni yormay,  
Ummon ortida ham bordir makonim.  
Dunyoning qaysi bir burchiga bormay,  
O'zing boshpana bo'l, O'zbekistonim!  
Vashington shahri, 1996 yil 25 iyun

## AYRILMAS

Yo haq!. - deb yo'l olsa manzilga karvon,  
Yo'l boshlagan cho'ng noridan ayrilmas.  
Oshiqlar ko'nglidan kechar ming armon,  
Bir armoni - dildoridan ayrilmas.

Nelarni ko'rmagay insonning boshi,  
Bejiz aytmaganlar: "U soyning toshi".  
Donolar, bir joyga yetsa ham yoshi,  
Piri bergan tumoridan ayrilmas.

Qachon dong chiqarmish, axir, yolg'iz ot,  
Farzand oqil bo'lsa - padarga qanot.  
Yigitga duch kelsa Hayot yo Mamot,  
Do'stlarining diydoridan ayrilmas.

Demishlar: .So'qir ham ko'rgay yorqin tush..  
Ozod davron surmoq har narsadan xush.  
Qafasga gar tushsa uchib yurgan qush,  
Erkinlikning xumoridan ayrilmas.

Xor bo'lmas, ajdodin kimki yod etgan,  
O'tgan azizlarning ruhin shod etgan.  
Avlodlar taqdirin o'ylab dod etgan,  
Ota-bobo mozoridan ayrilmas.

Har kim bilganicha chertgay sozini,  
Moli toza odam qilgay nozini.  
Mard kishi ko'p degay hatto ozini,  
Rizqin topgan bozoridan ayrilmas.

Peshvosi bor yurtning butundir baxti  
Aslo xazon bo'lmas ekan daraxti.  
Har kimga buyursin o'z toju taxti,  
Nomusli el shunqoridan ayrilmas.

Bir yonda turkmanim, qirg'iz, qozog'im  
Orolga termulgan qoraqalpog'im,  
O'zbekim, tojigim - ko'zim-qarog'im  
Jam bo'lganda qatoridan ayrilmas.

Ayrilsa ayrilgay tog'lar qoridan,  
Ayrilgay behimmat boy ham boridan,  
Vafosiz ayrilgay do'stu yoridan,  
Shoir xalqi ash'oridan ayrilmas.

Qo'lga qalam oldim qutlug' bir kuni,  
Mahtumquli she'rin bo'lib maftuni.

Agar kuylar bo'lsa Abdullo uni,  
Bir umrga sho'x toridan ayrilmas.  
1996

### **QO'LLANMA** *(Hazi)*

Bir kun hasrat qildi amaldor ukam,  
Dedi: Ne qilarim bilolmay qoldim.  
Agar tanbeh bersang - kimgadir alam,  
Taltayib ketadi maqtalغان xodim.

Men dedim: O'ylab ayt har bir so'zingni,  
Turfa andishani bir chetga tashla.  
Koyisang - eng avval koyi o'zingni,  
Maqtovni ham avval o'zingdan boshla.  
1996

\* \* \*

Do'stim, Haq deganni qo'llagin faqat,  
Parvoz qilar bo'lsa - osmoni bo'lgil.  
Yovuzlikka qarshi qudrating ko'rsat,  
Mudom ezgulikning posboni bo'lgil.  
1996

### **MASLAHAT**

Eshmat nomli ko'chada  
Toshmat nomli do'kon bor.  
Xizmat qilar u joyda  
Nurmat degan do'kondor.

Xarid qilgin sen undan  
Furqat nomli saqichni.  
Unutma, Pirmat degan  
Ko'chaga ham boqishni.

U yerdagi hammomning  
Qulmat nomin o'yib ol.  
Boy bermasdan fursatni  
O'z ismingni qo'yib ol.  
1997

### **NADOMAT**

Menga afsonalar so'ylama, uka,  
Rosa charchaganman yolg'onni yozib.

Qirq yil ko'taribman Insonni ko'kka  
Ishonib, hazrat deb, yo'limdan ozib.

O'zingiz kim deya so'rarsan axir,  
O'sha nokomilning men ham biriman.  
Tangrining yaratgan bandasi - faqir  
Boshqalar osmonu, men-chi, yeriman.

Balki koinotning biror burjida,  
Bizdek nochorlarga bordir mos makon  
Lekin unga yetish qiyindir juda,  
Buni tark etmoq ham emasdir oson.

Nachora, Insonni ko'tarib ko'kka,  
U kabi yashashni bila bilmadim.  
Yovuzlik qo'limdan kelmadi, uka,  
Birovga yomonlik qila bilmadim.  
1997

## **FAZOGIR SOLIJON**

*Nyu-York. Amerikaning "Indevor" kosmik kemasi Floridadagi "Mise kanaveral"  
kosmodromidan osmonga uvaffaqiyatli ko'tarildi... Ushbu kema ekipaji a'zolari orasida  
Qirg'izistonda tug'ilgan o'zbek millatiga mansub Solijon Sharipov ham bor. (O'zA  
xabaridan)*

Osmonda bir o'zbek uchib yuribdi,  
Fazogir Solijon, gapning sirasi.  
Yulduzlar vasliga boqib turibdi  
Mirzo Ulug'bekning chin nabirasi.

Turkiy dunyomizga yana bitta zeb,  
Solijon samoni ko'rgali ketdi.  
Bobom yulduzlari joyidami, deb  
Ularning holini so'rgali ketdi.  
1998 yil, yanvar

## **TOYCHOQ**

Jeneva ko'lining sohilida shan,  
Toyning haykalchasi tovlanar har choq  
Do'rmon bog'larining etaklaridan,  
Qanday kelib qolding bu yerga, toychoq

Hordiqqami desam, hali yoshsan-ku,  
Hali charchamagan asablaring ham.  
Toshkent o'tloqlari emasmi inju,  
Senga Jenevada nima bor, oshnam?!

Toychoq kishnab deydi: - Mana shu ko'  
Sig'may qoldingizmi siz ham u yoqqa.  
Akangning holidan xabardor bo'l, deb,  
Jo'natib yubordi yangam bu yoqqa...  
1998

## **JAHONGASHTA**

Bir kun so'radilar jahongashtadan:  
- Aytgil, bir yurakka olam siqqaymi  
Yoki yo'qmi senda turar joy, vatan,  
Sang'ib yurmoqlikdan shoxing chiqqaymi?

U dedi: toqatim yo'qdir firoqqa,  
Men asli muhabbat uchun yarayman.  
Faqat gohi-gohi ketib yiroqqa  
Yurtni dast ko'tarib, to'yib qarayman  
1998

## **FIDOYI**

Sochilib yotadi oltin va gavhar  
Tog'larning qa'rida yo qumloq soyda.  
Kimdir zahmat chekib yig'masa agar,  
U pinhon boylikdan, ayting, ne foyda.

Bedov ot kezadi cho'llarda yaydoq,  
Falakka yetgudek shaxdi, shiddati.  
Yovqur bir chavandoz bo'lmasa biroq  
Ayting, chiqarmidi dong'i, shuhrati.

Asriy jumboqni ham bir fozil yechgay,  
Darg'asiz kemanding suzmog'i gumon.  
Kimdir halovatu uyqudan kechgay.  
Shundan Vatani tinch, xalqi ham omon.

Fidoyi Insonlar: balki rahnamo,  
Balki oddiy zotdir - har qayda bordir.  
Ular unutgaylar o'zin doimo,  
Chunki qo'llovchisi Parvardigordir.

Bor bo'l, ezgulikka baxshida hayot,  
Zahmating tufayli yetding niyatga.  
Shohmisan, fuqaro - endi umrbod  
Daxldor bo'lding sen abadiyatga.  
1998 yil, yanvar

## **FAXR**

*Xalq deputatlari Qashqadaryo viloyati kengashi sessiyasida o'qilgan she'r*

Kimdir maqtanadi san'ati bilan,  
Birov ilmu fanga rag'batini bilan.  
Kimdir she'ri bilan maqtansa, kimdir  
Maqtanar mol-dunyo, davlati bilan.

Kimdir o'rmonlarin ko'kka ko'tarsa,  
Kimdir gerdayadi shaxmati bilan.  
Ularning bari-ku insonga xosdir,  
Birma-bir kelgaydir navbati bilan.

Toshkentda haykal bor bir oilaga,  
Shon topmish yetimga shafqati bilan.  
Ahli Kesh maqtansa arziydi - Temur  
Jahonni zabt etdi sarvati bilan.

O'zbekning boshidan zar sochsin dunyo,  
Topdi u rizqini zahmati bilan.  
Uning asosidir - buyuk bobolar  
Bizga ibrat bo'ldi mehnati bilan.

Bizdek nochorlar-ku yerga qaraymiz,  
Kimdir osmon bo'ldi savlati bilan.  
Qashqadaryo xalqi faxr etar doim  
Islomi yaratgan shavkati bilan.  
1998 yil, iyun

## **HISOBOT**

Hayotda uchraydi turli hodisot,  
Balki biri yaxshi, boshqasi yomon.  
Lekin har biriga bordir hisobot,  
Qayda u yuz berdi? Kim bilan? Qachon?

Necha buyuk zotlar o'tdi hasratda,  
Bog'larda quzg'unlar oshiyon qurdi.  
Mana shu asrda, shu mamlakatda,  
Kelgindi kimsalar davrini surdi.

Men-ku, o'ylamasman o'zimni bukun,  
Har qalay, el bilan o'lmagan jonman.  
Battol asr hali topmasdan yakun  
Ozod bo'la olgan O'zbekistonman!

Sharaflab taqdirning iltifotini  
Mujdalar kelmoqda ovuldan, kentdan.  
Qarangki, Istiqlol mukofotini

Olibmiz Birinchi Prezidentdan!  
1998

## **TUSHMASIN**

U yiroq tog'larga qor tushsa tushsin,  
Sening bog'laringga zinhor tushmasin  
O'rtaga ayriliq, zor tushsa tushsin,  
Va lekin hech qachon ag'yor tushmasin.

Men sekin kuzatdim shitob dunyoni,  
Nechog' omonatdir odamzot joni.  
Qo'ling endi oshga yetgani oni,  
Boshingga nogahon cho'qmor tushmasin.

Birov tinglamasa suxan ne kerak,  
Har kimga buyursin sirdosh bir yurak  
Agarda bor bo'lsa sodiq do'st-tirgak,  
Oraga to'g'anoq - devor tushmasin.

Uchragay dunyoda turfa xil armon,  
Gohi g'olibdiansan, goh mag'lub, nolon.  
Ko'nikkay bariga hayotda inson,  
Lekin g'am ustma-ust, takror tushmasi

Tepangda bor ekan Parvardigoring,  
Magarki elu yurt nomus va oring.  
Vatanni kuylamak bo'lsa shioring.  
Dilingga boshqa hech qaror tushmasin.  
1998

## **O'ZBEK BOYINING BAYONOTI**

Gaping to'g'ri, kulba emas, saroydirman,  
Boylar ko'pdir, ular ichra eng boydirman.

Son-sanoqsiz molu dunyo, qo'ylarim bor,  
Shahar to'la, qishloq to'la uylarim bor.

Donlarim bor, adog'ini bilolmassan.  
Don-dunimning hisobini qilolmassan.

Tog'larimning bordir yashil archalari,  
Kaminaning mulki erur barchalari.

O'z hovlimda tayyora ham yasaydirman,  
Olovim ko'p, xo'p shohona yashaydirman.

Guzarlar ham, bozorlar ham menikidir,  
Sen yotajak mozorlar ham menikidir.



Sohibqiron Temur mening bobom erur,  
Bobur tog'am, Mohlaroyim momom erur.

Boysunimda tulporlarim kishnashadi,  
Zominimda zarg'aldoqlar qishlashadi.

O'lponchi-yu soliqchilar, bilib qo'ying,  
Gaplarimni Siz quloqqa ilib qo'ying.

Boyligimga chegara yo'q, ha, chindan ham,  
Buni yaxshi bilgaydirsiz Siz mendan ham.

Axir buning barchasini netar edim,  
U dunyoga olibmi men ketar edim.

Vorisim bor, ko'zimning u oq-qorasi,  
U shu tuproq farzandidir, yurt bolasi

Inshoolloh, undan ko'nglim to'lajakdir  
Vorisimning ismi esa - Kelajakdir  
1998

### **BIR QARASAM...**

Bir qarasam, do'stu yordan ko'nglim to'qday,  
Bir qarasam, atrofimda hech kim yo'qday.

Bir qarasam, suyanchiqday bolalarim,  
Bir qarasam, ular siniq lolalarim.

Bir qarasam, bu dunyoda baxtim borday,  
Bir qarasam, butkul olam menga torday.

Bir qarasam, murodimga yetgandayman,  
Bir qarasam, ko'zim ochiq ketgandayman.

Bir qarasam, shon-shuhratga yo'g'rilganman,  
Bir qarasam, endigina tug'ilganman.  
1998 yil, avgust

### **ZARDO'SHT SO'ZI**

Qadim Xorazmning zar tuprog'ida,  
Ko'hna Buxoroning hur quchog'ida,

Yashagan Zardo'shtman, donishmand zotm  
O'lmas g'oyam bilan mangu hayotman.

Yaxshi va yomonni ayladim hisob,  
Va bitdim "Avesto" nomli bir kitob

Unda yozuvlikni yerga urganman,  
Ezgulik maqomin yuksak ko'rganman.

Ishonchim shul bo'ldi: toju taxt, davlat  
But bo'lsa mamlakat yashnagay albat.

Uch ming yil muqaddam qadim tuproqda  
Ko'hna Buxoroyu Xorazm yoqda.

Qo'rg'onlar yaraldi, qal'alar o'sdi,  
Ular yovuzlikning yo'lini to'sdi.

Hurmuzd g'olib bo'lgay, Axraman mag'lub  
Yovuzlik chekingay, ezgulik marg'ub.

Ko'hna saltanatdan yodgor bo'lsin to,  
Sizga qoldirganim ushbu "Avesto".  
1998

### **LUVR MUZEYIDA** *(Farangiston xotiralaridan)*

Luvrda - muzeyning bag'rida sokin  
Ming yillik ashyolar turibdi qator.  
Bunda shohlar taxti hashamdor, yorqin,  
Bunda gadolarning sopoli ham bor.

Boqib, o'yga cho'mdim Luvr uyida,  
Tarixni bus-butun ko'rarmikanman?  
Payt kelib, O'zbekning bir muzeyida,  
Singan sopolchalik turarmikanman?!  
1998

### **SAFARDOSHLAR** *(Hazi)*

Aslo boylar bilan chiqma safarga,  
Agar ziqna bo'lsa, sharmanda qilar.  
O'rta hol zot bilan kezsang agarda,  
U o'lik-tirigin bo'yningga ilar.

Kambag'al hamroh-chi, bilmaydi firib,  
Sezdirmas bormi yo yo'qligini u.  
Yiqilsa yiqilar sillasi qurib,  
Aytmaydi ochmi yo to'qligini u.  
1998

### **SHOIR QALBI**

Yurtda ne muborak ishlar bo'lg'uvsi,  
Undan shoir qalbi shavqqa to'lg'uvsi.

Chinor o'tqazildi, tug'ildi farzand,  
Avval shoir qalbi bo'lgay bahramand.

Sababi ma'lumdir buning, albatta,  
Tug'ildik shu Vatan, shu mamlakatda.

Uning har go'shasi jahondir menga,  
Toshloq yo'llari ham ravondir menga.

Taralsa elimdan xushnud bir xabar,  
Tabrik aylamog'im, demak, muqarrar.

Mavjiga nogahon kimdir tosh otgay,  
Zarbi yuragimning tubiga botgay.

Elim, qadamingni har dam kuzatdim,  
Goh o'ychan, gohida xurram kuzatdim.

Gar sen daryo bo'lsang - irmog'ingdirman  
Lat yesang, og'riqli barmog'ingdirman.

Menda fazilatdan bo'lsa bir nishon,  
Sening olovingdan uchqun bu, ishon!

Savobing qosh ila ko'zimnikidir,  
Faqat gunohlarim o'zimnikidir.  
1998

## **AYTGIN SHUKRLAR**

Dumaloq shu boshdan bo'lmasang judo,  
Ikki oyoq bilan yiroq ketgaysan.  
O'lmagan qulim, deb siylasa xudo,  
Jambulning yoshiga balkim yetgaysan.

Tap-taqir kallangda qozondek dastor,  
Avliyo misoli ayri soqoling.  
Nabira, abira tegrangda qator,  
Sandiqda bisoting, qo'rangda moling.

O'tgan hayotingdan mutloq bexabar,  
Piyri badavlat deb yozar muxbirlar.  
Shundayin dovonga yetolsang magar,  
Aytaber Allohga cheksiz shukrlar.  
1998

## **OTA DUOSI**

O'g'lim so'ramasman sendan mol-dunyo,  
Uy ham qurib berma, mayli, alomat.  
Mayli, ko'zlarimga bo'lmagil ziyo,  
Yonimda yursang bas sog'u salomat.

Mayli, ko'tarmagil meni yelkangda,  
Qalqon ham bo'lmagil yog'sa malomat.  
Bir kuni yostiqqa boshim tekkanda,  
Tepamda tursang bas sog'u salomat.  
1998

## UCHAR QUSHLAR

Uchar qushlar uchdi-ketdi,  
Qo'llarimda pati qoldi.  
Yoshlik ketdi, umrning ham  
Sharti ketib, parti qoldi.

Dema, bukun sevgining ham  
O'zi ketib, oti qoldi.  
Lablarimda u bo'saning  
Hech aynimas toti qoldi...  
1998

\* \* \*

Urinma bolakay, urinma harchand  
Bag'ringni men kabi tig'lay olmassan.  
Men kabi quvonib, kularsan garchand,  
Lekin men singari yig'lay olmassan.  
1998

\* \* \*

Bugun xoli qo'ydim yana daftarimni,  
Buni balki kimdir yalqovlikka yo'ydi  
Asli senga aytar hamma gaplarimni,  
Bulbul aytib qo'ydi.  
1998

\* \* \*

Deydilar: - Chaqnagan qaysi yurt erur,  
Buyuk sohibqiron sochgan ziyodan.  
Javob berdilarki, - Hech so'nmas bu nur,  
Taralgan eng avval Qashqadaryodan.  
Dedilar: . Qaysi el bedor doimo,  
Zavq olar mehnatdan, suluv dunyodan.  
Javob berdilarki, . Shoir, ulamo,

San'atkorlar chiqqan Qashqadaryodan.  
Dedilar: . Jahonga buyuk yurtboshi,  
Parvoz aylagandi qaysi ma'vodan.  
Javob berdilarki, . Hurlik quyoshi,  
Qalqqandi dastavval Qashqadaryodan.  
Dastavval, dastavval Qashqadaryodan!  
1999

## **BEDORLIK**

Der edim: Istiqlol shukuhi bilan  
Ro'zg'orni butlamoq fursati yetdi.  
Shunday payt, qo'ynimga kirdi bir il  
Kimdir ostonamga o't qo'yib ketdi.

Der edim: Hur zamon kelib nihoyat,  
Asriy g'alvalardan xoli bo'ldi bosh.  
Shunday payt, qo'zg'alib qaydin qaboha  
Yurtboshim ko'ksiga otmoq bo'ldi tosh.

Der edim: bosqinlar, vahshat, ur-surl  
Qoldilar moziyning kechalarida.  
Shunday payt, daf'atan jonlandi ula  
Qon oqdi Toshkentning ko'chalarida.

Nogoh ayon bo'ldi, g'animlar bisyor,  
Bisyor oramizda olamizgacha.  
Endi ogoh bo'lsin, bo'lsinlar hushyor,  
Hatto beshikdagi bolamizgacha.

Istiqlol, sadag'ang ketay, Istiqlol!  
Buncha og'ir ekan qutlug' yo'llaring.  
Ishonay, duch kelsa, agar yov qattol,  
Burda-burda qilsin uni qo'llaring.

Men esa, Istiqlol, yaloving tutib,  
Metin saflaringda sobit keturman.  
O'tgan shahidlarning nomin yod etib,  
Yurtboshim yonida bedor o'turman.

## **O'ZBEK ONASI**

Mushtipar ham o'zing, buyuk ham o'zing,  
Kuyinchak ham o'zing, kuyuk ham o'zing,  
Olamga tatirlik suyuk ham o'zing,  
Payt keldi aytmoqqa, gapning xonasi,  
Ey, o'zbek onasi, o'zbek onasi.

Seni To'maris deb, maqtaganim bor,  
Sen Temur beshigin tebratgan bedor,  
Sensan Bibixonim, Nodirai zor,  
Payt keldi aytmoqqa, gapning xonasi,  
Ey, o'zbek onasi, o'zbek onasi.

Vatanni Ona deb bekor aytilmas,  
Ona buyurganda yo'ldan qaytilmas,  
Sen o'zing Ka'bamsan, Baytul muqaddas,  
Payt keldi aytmoqqa, gapning xonasi,  
Ey, o'zbek onasi, o'zbek onasi.

Boshingdan nimalar o'tmadi axir,  
Vatandek taqdiring bo'ldi goh taxir,  
Bobur shoh bo'lsa-da, qoshingda faqir,  
Payt keldi aytmoqqa, gapning xonasi,  
Ey, o'zbek onasi, o'zbek onasi.

Kelajak toychog'u toyingizdadir,  
Jannat ham, albatta poyingizdadir,  
Vatan-ku, Siz turgan joyingizdadir,  
Payt keldi aytmoqqa, gapning xonasi  
Ey, o'zbek onasi, o'zbek onasi.

Sizga ta'zim qilib turibman bu payt  
Sizga baxshidadir eng shohona bayt,  
Aziz Yurtboshingga duolaring ayt,  
Payt keldi aytmoqqa, gapning xonasi  
Ey, o'zbek onasi, o'zbek onasi.  
1999 yil, 6 mart

## **TUSH**

Agarda tush bilan o'zgarsa dunyo,  
Tush bilan aylansa vaqtu zamonlar,  
Yomon tush ko'rganlar ko'karmay aslo,  
Qirilib ketardi allaqachonlar.

Yaxshi tushlar ko'rsin har kim ham, biroq  
Bu bilan ham bitmas dunyo ishlari.  
Yaxshi tush ko'rganlar g'am bilmay mutloq,  
Baxtli yashar edi ehtimol bari.  
1999

## **OLIY NE'MAT**

Pir Xoja yo'liqdi nogahon dardga,  
Holi tang, rangi ham aylangan zardga.

Qilmagan doriyu darmon qolmadi,  
Yelib-yugurishdan armon qolmadi.

Dunyodan umidin uzar bo'ldi u,  
Oxirat kengashin tuzar bo'ldi u.

Xullas, paymonasi to'lganda butkul,  
Kirdi eshigida ishlab yurgan qul.

Qulning tabiblikka daxli bor edi,  
Unga shu asnoda omad yor edi.

Quldan bo'ldimikan, Xalloqdanmi yo,  
Hoja shifo topdi, ba haqqi xudo:

Ayo, qul, sen bo'lding dardim davosi,  
Qilgan xizmatining yo'qdir bahosi.

Sochayin boshingdan oltin va kumush,  
Olgin xazinamdan eng katta ulush.

Istasang, mulkimning teng yarmin beray,  
Yoki men qulimni shod, xurram ko'ray.

Qul dedi: - Hozirman xizmatigingizga,  
Rahmat ham ayturman himmatingizga.

Hattoki xunning ham narxi bor, Xoja  
Bebahoning bundan farqi bor, Xojam

Xoja o'ylab dedi: - Nima ekan u?  
Qandayin ne'mat u? Qandayin inju?

Aytgin armoningni, bajargum shu zum  
Axir, sen tufayli ochiqdir ko'zim.

Qul dedi: - Bir ne'mat bordir - bebaho  
Unga sadqa bo'lsin molu mulk, dunyo.

Falaklar bekordir uning qoshida,  
Malaklar bekordir uning qoshida.

Unga nisbat bersa - qafasdir jannat  
U shundoq tansiq his, tengi yo'q ne'mat.

- Uning nomi ne deb, qistardi Xoja  
Sirni bilmoqlikni istardi Xoja.

Qul dedi: - Bu ne'mat jondan-da totlik  
Nomi Ozodlikdir, nomi Ozodlik!  
1999 yil, avgust

## **AKTYOR**

Bir kun tomoshaga tushib lahzada  
Turfa aktyorlarni ko'rib qaytibsan.  
Lekin sen ularni faqat sahnada  
Mavjud deb o'ylasang, bekor aytibsan.

Chin aktyor san'at deb, bag'rini tig'lab  
Amallab kunini ko'rib yuradi.  
Shunday insonlar bor, bir ko'zi yig'lab  
Bitta ko'zi esa kulib turadi.

Shunday insonlar bor, voy otam, deya,  
Bir zumda o'zgarar turqi, siyog'i.  
Lekin o'sha mahal, o'sha soniya  
Onasin ko'ksida turar oyog'i.

Shunday insonlar bor, go'yo yurtparvar  
Yurtini ulug'lar go'yo har so'zi.  
Lekin razm solib qarasang agar,  
Amal poyasida ikkala ko'zi.

Shunday insonlar bor, xalqim der hamon  
So'zlaydi hamisha olib xalq yonin.  
Bir qo'li ko'ksida, bir qo'li biroq,  
Tozalab turadi xalqning hamyonin.

San'atga umrini kim etmish fido,  
Sharafi yuksalsin, olamni tutsin.  
Hayotni o'yin deb bilganning ammo  
Tolei kulmasin, biri kam o'tsin.  
2000

## **YO'QLOV**

*O'lmas Umarbekov xotirasiga*

Chehrangda tabassum balqirdi doim,  
Ko'ngil bog'ing edi chechakli, gulli.  
Arshi-a'loga ham sendek muloyim,  
Xushsurat bandalar darkor shekilli.

Har zumda o'limni kutib yashamoq  
Uning o'zidan ham dahshatliroq his.



Senga shunday yurak bermishdi Xalloq,  
Boqding ajalning ham ko'ziga munis.

Dunyoning tagiga o't ketsin, agar  
Bag'ridan yaxshini sitib chiqarsa.  
Tole bo'lolmagay qazoyi qadar,  
Baxt asli tiriklik degan bir narsa.

O'lmas deb qo'ymishlar ismingni, biroq  
O'lim to'lg'izdi-ku umr jomingni.  
Falakning bu ajib o'yiniga boq:  
O'lmas deb turibman endi nomingni!

Inson bolasiga sharafdir g'oyat  
Xalqi rozi bo'lib, xotirga olsa.  
Mening ushbu she'rim sen uchun shoyad  
Do'stlaring nomidan yo'qlov bo'lolsa.  
2000

### **AJRIM**

Dunyoning yarmini sayr etdi o'g'lon,  
Kelib otasidan so'radi ajrim:  
- Chin do'st topolmadim nega, otajon?  
Ota esa jim.

Yana dunyo kezdi charchamay o'g'lon,  
Yana otasidan so'radi ajrim:  
- Vafo topolmadim nega, otajon?!  
Ota hamon jim.

- Nega savolimga bermaysiz javob?!  
O'g'lon turar edi nolakor, haqir.  
Ota javob qildi uh tortib shu tob:  
- Sen ham bor narsani axtar-da axir  
2000

### **JAZO TOPQUSIDIR...**

Birovga yomon so'z aytsam men agar,  
Tushunardim uning javobi qaytsa.  
Chidardim o'zimga sochishsa zahar,  
Ginasi bo'lsa gar yuzimga aytsa.

Kimdir Vataningga tosh otsa biroq,  
Begunoh bandalar bag'rin qilsa qon,  
Sharhlab berolmayman bu holni mutloq  
Buni tushunmayman aslo, hech qachon.

Senga she'rim yoqmas, kimimdir yoqma  
Ayt, ne gunohi bor butun bir xalqning  
Bilib qo'y, bu daryo teskari oqmas,  
Senga jazosi bor yaratgan Haqning!  
2000 yil, avgust

### **MEN FAQAT...**

Men faqat Sen uchun yashadim desam,  
Bir oz lof bo'lardi va bir oz yolg'on.  
Gohi bosganida to'fon kabi g'am,  
Ko'zimga ko'ringay o'zimdagi jon.

Sensiz ham yashadim desam men agar,  
Desamki, sensiz ham tanamda bor jon  
Ishongil, bu gapim baridan battar,  
Yolg'on bo'lar edi, tamoman yolg'on.  
2000 yil, avgust

\* \* \*

Me'mor umr bo'yi hafsala ila  
Go'zal bir imorat ayladi bunyod.  
Biroq nogahonda mash'um zilzila  
Vayron qildi uni, qildi-ku barbod.

Xuddi shu singari, qurgaymiz biz ham  
Umr deb atalmish go'zal binoni.  
Biroq yetib kelar mash'um so'nggi dam,  
Vayron etar uni ajal to'foni.  
2000 yil, avgust

\* \* \*

Stadion guvlaydi,  
Odam liq to'la.  
Bu yerda xam bo'lmish turfa til, ovoz.  
Ularning barchasin quchib bir yo'la,  
Do'stim deb atamoq g'alati bir oz.

Stadion guvlaydi,  
Odam liq to'la.  
Faqat Haqqa ayon ular siyrati.  
Ularning barchasin so'kib bir yo'la,  
G'anim demoqlik ham ancha g'alati.  
2000 yil, avgust

### **QADAH**

Turibman qo'limda qadah shu palla,  
Demak, jom so'zimni aytmasam bo'lmas  
Sizga baxt tilashim mumkin baralla,  
Lekin baxtli qilish qo'limdan kelmas.

Tilayman albatta sog'liq va umr,  
Tuhfa qilolmasman lekin ularni.  
Tilayman hech so'nmas ilhom va surur,  
Garchand berolmasman bu tuyg'ularni.

Men faqat siz uchun orttirib alam,  
Yo'lingiz to'smasman devorga o'xshab.  
G'alvali dunyoda shuning o'zi ham,  
Mening nazarimda juda katta gap.  
2000 yil, oktyabr

\* \* \*

Mana bu hikmatga, do'stim, sol quloq,  
Balki senu menga bo'lgay bir saboq.  
Posbonning qovog'i uyilgan bo'lsa,  
Hatto jannatga ham tortmaydi oyoq.  
2000 yil 4 dekabr

## **XAROBAZOR**

Dunyoda ming yillik xarobalar ko'p,  
Urushlardan yodgor, sellardan yodgor.  
Mozorlar qalashib yotibdi to'p-to'p,  
Aslida ular ham cho'ng xarobazor.

Vujudimni teshar yillar shamoli,  
Yurak tilka-tilka turfa ozordan.  
Bolam, xabar olgin, tutmay zavoli,  
Shoir deb atalgan xarobazordan.  
2000 yil 4 dekabr

## **O'ZBEKMAN**

Yangi bir asrning ostonasi bu,  
Yetishdim umrimning qutlug' yoshiga.  
Tilimda shukrona, dilimda g'ulu,  
Tarix sarkotibin keldim qoshiga:

- Mana, men - O'zbekman, qo'limda tu  
Va barcha a'molim bitilgan kitob.  
Shuning ichidadir borim va yo'g'im,  
Shuning ichidadir men uchun oftob.

O'zbekman, inshoolloh, iymonim butun  
Tilim qisiq emas bashariyatdan.  
Kimgadir tengdirman, kimdandir ustun  
Zuvalam qorilgan samimiyatdan.

O'zbekman, gohida iqbolim kulib,  
Gohida o'zimdandir chiqqan ofatim.  
Dunyoni olsam-da jahongir bo'lib,  
Go'dak yig'isiga yo'qdir toqatim.

O'zbekman, qanchalik jafoda chekmayin,  
O'zimga haq bo'ldim, o'zimga haqman.  
Yashadim yovlarga bo'yin egmayin,  
Bu kun o'z erkiga erishgan xalqman.

Istiqlol, ketma yurt peshonasidan,  
Tole, tark etmagin bizni ilohim.  
Mana, yangi asr ostonasidan  
O'tdim. Bismillohir rahmonir rohiy  
2000

## **NAVRO'Z**

Avval yuragingga mo'ralaydi u,  
So'ngra kurtaklarga o'rgatadi so'z.  
Zaminning ko'zidan qochadi uyqu,  
Demak, Bahor keldi,  
Kelmoqda Navro'z.

Qishning ahvoliga boqib hoynahoy,  
Yum-yum yosh to'kmoqda eriyotgan muz.  
Jilva qilayotir tengsiz bir chiroy,  
Demak, Bahor keldi,  
Kelmoqda Navro'z.

Ona bag'ri kabi iliqdir olam,  
Harir hovur ichra yayrar dala-tuz.  
Qoldi puchmoqlarda xazon yanglig' g'am,  
Demak, Bahor keldi,  
Kelmoqda Navro'z.

Yana ko'ngillardan rutubat ketdi,  
Yana shu'lalardan qamashmoqda ko'z.  
Yana dildorlikning fursati yetdi,  
Demak, Bahor keldi,  
Kelmoqda Navro'z.  
2001